

लूकाइ ष्हिबै

येशू ख्रीष्टदक्याले खबै सैं तोंबै ताँ

नसों बिल् पर्दिबै ताँ

चु काउदा ष्हिबै म्हि लूका। लूका पावलदे बालोन् प्रबै थु मुँलो। बाइबल ष्हिबै म्हिमें न्होरि चु मत्त्रे यहूदी म्हि आङिलो। लूका में लबै म्हि ते ल्हें खेबै म्हि मुँलो।

ष्हिबै क्ल्हयो: रोम सहर मुँलै।

ष्हिबै त्हे ई. सं. ६४ साल, अथवा बि. सं. १२७ सालत।

ष्हिबै ताँ: लूकाइ चु सैं तोंबै ताँ ष्हिमारे येशू इस्राएली म्हिमेंए लागिरे ते अरू ताँइ हेंबैं म्हिमेंए लागिरे जोगेमिंबै म्हि तम् बिइर उँइमुँ। चु काउदबैं मुख्य ताँ आयोन्बैदे सैं तोंबै ताँ बिद् बिइर परमेश्वरजी येशू कुल्मिंड बिइर लूकाइ ष्हिइमुँ। अभै ताइ मालमें खाँचो तबै म्हिमें म्रोंइर प्रभु येशूजी ल्हय खबै ताँमें चु काउदारि मुँ। चु काउदारि सैं तोंबै ताँ ता मुँ बिस्याँ नसोंबै पाठर येशू फिबै बारे धाइर लिसोंबै पाठर येशू स्वर्गर याबै ताँ मुँ। चु काउदा भरिन् मुख्य ताँ प्लिउलो ष्हिइमुँ:

१. प्राथना लब,
२. परमेश्वरए पबित्र प्ल्ह,
३. चमिरिमैइ येशूए सेवा लब,
४. परमेश्वरजी थिए फिर बिश्वास लबमेंए पाप क्षमा पिंब।

येशू दबै स्वर्गर याबै लिसों ताँइ क्ल्हयोजरेबै म्हिमेंइ प्रभु येशूए फिर बिश्वास लबै बारेबैं ताँमें या लूकाइ “कुल्मिंबै चेला चिबमेंए केमें (पेरित)” बिबै काउदारि ष्हिइमुँ।

चु कितबबैं मुख्य ताँमें

नसोंबै ताँ १:१-४

बप्तिस्मा पिंबै यूहन्ना ते येशू फिब धाइर कोलोबैं ताँ १:५—२:५२

बप्तिस्मा पिंबै यूहन्नाइ लबै के ३:१-२०

येशूजी बप्तिस्मा किंबै लिसों मोंइ जाँच लब ३:२१—४:१३

येशूजी गालील ह्युलरि के लब ४:१४—६:५०

येशू गालील ह्युलदक्याले यरूशलेमर याब ६:५१—१६:२७

येशूजी यरूशलेमर परमेश्वरए ताँ लोमिंब ते म्हिमेंइ येशू क्हाइर सैयाब

१६:२८—२३:५६

येशू सिब्दक्याले दबै सोइर रेखब, चेलामेंदे त्होब धाइर स्वर्गर याब २४:१-५३

नसांबे ताँ

1 ओ चिब थियोफिलस छयाज्यालो मुं।
 उचोए माजर ता-ता केमैं तइ बिइर
 ल्हें म्हिइ ष्हिलो। ²उँइँसोन चु ताँइ ताँ
 म्रोंब ते येशूदक्याले खबे सैं तोँबे ताँ बिमिंबे
 म्हिमैँइ च ताँमैं उचोदे सेल् पिलो। छतइर
 चमैँदक्याले लेदै ताँमैं योंइर म्हिमैँइ ष्हिमैं।
³छतइर डज्यै या चु ताँइ के उँइँसोदक्या
 खैले तइ बिइर छेनाले मैँइर क्योए लागि
 उँइँसोदक्याले लिसों समा तबै ताँमैं छेनाले
 ष्हिब ठिक तलै ड्वाँइर ष्हिइमुं। ⁴म्हिमैँइ
 क्योदे उँइँसोन लोमिंबे ताँमैं होलिन् तमैं बिब
 क्योइ अम्रै छेनाले सेदिगे बिइर डइ चु ताँ
 ष्हिइमुं।

यूहन्ना फिम् बिइर स्वर्गदूतइ उँइँसोन् बिमिंब

⁵यहूदीया ह्युलबैं हेरोद मुँए पलोरी चु केमैं
 तखइ। यहूदीमैँए माजर जकरिया बिबै खो
 पिंबे खेगि क्रिहें मुँलो। च तह्मद अबिया
 बिबै खो पिंबे खेगिए खलकबैं म्हि मुँलो।
 चए ष्हेंस्योए मिं इलिशिबा मुँलो। इलिशिबाए
 बा या खो पिंबे खेगि मुँलो। ⁶चमैं इह्यौलोइ
 परमेश्वरए उँइँसों ठिक के लबमुँलो धाइर
 परमेश्वरए ताँमैं डिँइर ठिमार बिब् दोँले
 छेनाले प्रमलो। ⁷इलिशिबा थरि मुँलो।
 छतइर चह-चमि ताइ आरेलो। जगो मत्रे
 आडिना, चमैं इह्यौलो खेब् खुयु तयालो।

⁸तिरो जकरियाल मन्दिरर खो पिंबे पलो
 तलो। छतइर चइ खेगिए के लदिलो।
⁹खेगिमैँए रोस अनुसार चिट्ठा चोमाले
 परमेश्वरए मन्दिर न्होर होंइर धुप चोँबे
 के जकरियाए मिर पदिँइ। ¹⁰चइ न्होर धुप
 चोदिमाले बैरुबै म्हिमैं परमेश्वरदे प्राथना

लदिलो। ¹¹च त्हेर्न परमेश्वरए स्वर्गदूत
 क्रिहें धुप चोँबे क्ल्ह्योए क्योलो हार
 रादिब् म्रोंइर ¹²जकरिया बेल्ले आदिदिइर
 फाड्ठियाइ।

¹³छेंबिलेया स्वर्गदूतइ चदे बिइ,

“ओ जकरिया, क्योँ फाआड्ठिन्!

तलेबिस्याँ परमेश्वरजी क्योँए ताँ
 थेइमुँ।

तारे क्योँए ष्हेंस्यो इलिशिबाइ चह क्रिहें
 फिब्मुँ,

च चहए मिं क्योँइ यूहन्ना थेन्।

¹⁴चह फिब्दक्याले क्योँ बेल्ले सैं तोँबुँ।

धाइर अरू लेदै म्हिमैं या सैं तोँबुँ।

¹⁵तलेबिस्याँ च चह परमेश्वरए उँइँसों
 थेबले तब्मुँ।

चइ पा ते अरू म्हेरबै मालमैं खैँमैँइ
 थुँदिब् आरे।

च आमाए फोदक्याले परमेश्वरए
 पबित्र प्लहजी प्लिंब्मुँ।

¹⁶चइ इस्राएल हेंबैं ल्हें म्हिमैं थेमैँए
 याहवेह परमेश्वर डाँइ ताइर
 बोखब्मुँ।

¹⁷परमेश्वरजी एलिया अगमबक्तादे
 शक्ति पिब् दोँलेन्

क्योँए चहज्यै या पबित्र प्लह ते शक्ति
 योँब्मुँ।

छतइर चइ आबा ते चह-चमिए माजर
 विहमिंब्मुँ,

धाइर परमेश्वरजी बिब् आडिंब्मैं
 छचाँबै क्योँर डोरेब्मुँ।

छले परमेश्वरजी कुल्मिंबै मुँ मादिबै
 लागि चइ म्हिमैं तयार लब्मुँ।”

¹⁸छेंबिलेया जकरियाइ स्वर्गदूतदे बिइ,
 “ड खेब् तयाल् खाँइ, डए माँबै या खुयु
 तयाइमुँ। छतइर डिइ चह योँम् बिइर खैले
 पतेब?”

19 स्वर्गदूतइ बिइ, “ड गब्रिएल का। ड परमेश्वरए उँइंसों रादिम्। क्योदे ताँ लबर ते चु सैं तोबै ताँ बिद् बिइर परमेश्वरजी ड कुलब् का। 20 छैबिलेया डइ बिबै ताँ क्योइ आपदेब्दक्याले क्यो लाठ तब्मुँ। चु ताँ पूरा आतन् समा क्यो पौल् खाँदिब् आरे। डइ बिबै ताँ ठिक त्हेर खैलेया पूरा तब्मुँ।”

21 छ तदिमाले बैरु खागु तबै म्हिमें जकरिया प्रेदिलो। जकरियाइ मन्दिर न्होर क्हेल् लब्दक्या म्हिमें हार म्हाँदियालो। 22 लिसों जकरिया बैरु त्होयुमाले च म्हिमेंदे पौल् आखाँडर योइ हस्ता लइ। छतइर मन्दिर न्होर चइ स्वर्गदूत प्रोमें बिबै ताँ बैरुबै म्हिमेंइ सेइ।

23 चदक्या जकरियाइ खेगिए के लल् खाँडर आफैए तिर याइ। 24 च लिसों चए प्हेंस्यो इलिशिबाइ प्हसें नोइर मैना डौलो समा तिर लोइर टिदिमाले चइ बिइ, 25 “म्हिमेंए उँइंसों ड हेल् आतदिगे बिइर डए फिर ल्हय खइर परमेश्वरजी ड प्हसे नोल् पिँइमुँ।”

स्वर्गदूतइ मरियमदे येशू फिम् बिइर उँइंसोन् बिमिंब

26 इलिशिबाइ प्हसें नोबै मैना ट्हुलोर परमेश्वरजी गब्रिएल स्वर्गदूत गालील ह्युलबै नासरत बिबै नाँसर कुल्मिँइ। 27 च नाँसर मरियम बिबै कन्ये क्रिहें मुँलो। च त्हम्द दाऊद मुँए कुलबै योसेफ बिबै म्हिइ ब्ह्या लब् बिइर ह्थिँलो। परमेश्वरजी गब्रिएल स्वर्गदूत मरियम डारँ कुल्मिँइ। 28 गब्रिएल स्वर्गदूत च डारँ युइर बिइ, “ओ नानि, चमिरिमै न्होरि क्यो बेल्ले ड्हो सब

मुँमें। तलेबिस्याँ परमेश्वर क्योदे प्रे मुँ, छतइर थीजी क्योए फिर आशिक पिँइमुँ।”

29 स्वर्गदूतइ बिबै ताँ डेंइर मरियम बेल्ले फाङ्गिँइर “डदे तले छ बिगे? चुइ बिल् म्हेबै ताँ ता मुँगे?” बिइर मैबर होइ।

30 दबै स्वर्गदूतइ मरियमदे बिइ,

“ओ मरियम, क्यो फाआङ्गिँयुँ!

तलेबिस्याँ परमेश्वरजी क्योए फिर ल्हय खइमुँ।

31 डेंन्! तारे क्योइ प्हसें नोइर चह फिम्मुँ।

क्योइ थिए मिं येशू थेंन्।

32 थि बेल्ले थेबले तब्मुँ।

धाइर ताँइ म्हिमेंइ थीदे ताँइ बन्दा थेबै परमेश्वरए चह बिब्मुँ।

थिए खे दाऊद दांले परमेश्वरजी थी मुँ लमिँब्मुँ।

33 याकूबए कुल इस्राएली म्हिमेंए फिर थीजी खोयोन् बिलै ग्याल्स लब्मुँ।

थिए ग्याल्स खैमेंइ च्हिँरिब् आरे।”

34 छैबिलेया मरियमइ स्वर्गदूतदे बिइ, “ड कन्ये का। डइ खैले चह फिम्मुँ?”

35 स्वर्गदूतइ चदे बिइ,

“पबित्र प्ल्ह क्योए फिर युब्मुँ,

धाइर ताँइ बन्दा थेबै परमेश्वरए

शक्तिए छरिदक्याले क्योइ प्हसें नोब्मुँ।

छतइर क्योए प्हसें पबित्र तब्मुँ,

म्हिमेंइ थीदे परमेश्वरए चह बिब्मुँ।

36 जगो मत्त्रे आङिँ,

क्योए नातो न्होबै आना इलिशिबा

खुयु तबै त्हेरै या प्हसें नोइमुँ।

तारे चइ प्हसें आफि, थरि तयाइ बिइर म्हिमेंइ बिमलो।

छैबिलेया चड प्हसें नोइर तोगो मैना
टहुलो तइमुं।

37 तलेबिस्यां परमेश्वरजी लल् आँखाँब
ताइ आरे।”

38 चदक्या मरियमइ बिइ, “ड परमेश्वरए
के लबै चमिरि का। क्योँइ बिब् दौले
डए छहर तदिगे।” च लिसों स्वर्गदूत
मरियमदक्याले याहइ।

मरियम इलिशिबादे त्होबर याब

39 स्वर्गदूतए ताँ डेंइर मरियम आतुरले
यहूदीया ह्युलबै कोर मुँबै नाँस क्रिहेर
याइ। 40 च जकरियाए तिर होंइर थिए आना
इलिशिबा छचाज्यालो लइ। 41 मरियमइ
छचाज्यालो बिब इलिशिबाइ डेंमाले चए
फो न्होबै कोलो चलेइ, च बितिकन्
इलिशिबा पबित्र प्लहजी प्लिंयाँइ। 42 चदक्या
इलिशिबाइ थेबै कै तेइर मरियमदे बिइ,

“ओ नानि, चमिरिमैं न्होरि क्योँइ बेल्ले
आशिक योँइमुं,

धाइर क्योँए फोबै कोलोलाज्यै या
परमेश्वरजी आशिक पिँइमुं।

43 क्योँ डए प्रभुए आमा तलैया
ड डारँ खब्दक्या ड बेल्ले ड्हो सब्
तइमुं।

44 तलेबिस्यां क्योँइ उइब डइ डेंबै
बितिकन्

डए फोबै कोलो सैं तोंइर चलेइ।

45 परमेश्वरजी क्योँदे बिबै तामैं पूरा
तब्मुं बिब् पतेइर
क्योँ बेल्ले ड्हो सब् तइमुं।”

मरियमइ परमेश्वरए मिं क्वेब

46 चदक्या मरियमइ बिइ,
“डए सैं न्होंदक्याले परमेश्वरए मिं
क्वेमुं।

47 ड जोगेमिंबै परमेश्वरदे बालो ड
बेल्ले सैं तोम्।

48 तलेबिस्यां ड दो तबै आह आसेबै
आफैए केब्स्योए फिर थीजी
लह्य खइर च्योइमुं,
तारेदक्या ताँइ म्हिमैइ डदे ‘ड्हो सब्
मुँमैं,’ बिब्मुं।

49 ताँइ लमिल् खाँबै परमेश्वरजी डए
लागिर बेल्ले थेबै के लमिँइमुं।
थिए मिं पबित्र मुँ।

50 थिए मान लब्मैए पुस्ता-पुस्ताए फिर
थीजी लह्य खम्।

51 थीजी आफैए पोबै योइ थेबै केमैं
लइँमुं,

सैं न्हो-न्हो छलम् छुलम् बिइर थेब्
प्हैबैं सग्याँ प्हग्याँ लवाइमुं।

52 थीजी थेब् प्हैबै मुँमैं चमैए
राजगहिदक्या तवाइमुं,

- आयों आख्युब्मै कैंडो लमिंडमुं।
 53 फो खेंबमैं थीजी सबै मालमैं चल
 पिंडमुं,
 छैबिलेया प्लबमैए यो बिस्यां थीजी
 कहोतेन् लइर तामिंडमुं।
 54 परमेश्वरजी डचोए खेमैने फैबै बाछा
 पूरा लइर
 आफै मादिबै इस्राएलीमैं ल्होबर थि
 युडमुं।
 55 डचोए खे अब्राहाम ते थिए कुलबैं
 सन्तानमैदे
 थीजी खोंयोइ बिलै ल्हय खदिम्।”
 56 च त्हेर मरियम मैना सोल्दे इलिशिबादे
 टिइर आफैए तिर याहइ।

बप्तिस्मा पिंबै यूहन्ना फिब

- 57 चदक्या इलिशिबाए सुत्केरि तबै त्हे
 तइर च्ह फिइ। 58 परमेश्वरजी इलिशिबाए
 फिर जगो थैबै ल्हय खइर बेल्ले थैबै के
 लइमुं बिबै तां डेंडर इलिशिबाए ड्हेब्-ट्हुब्मैं
 ते हजे-म्हजेमैं चदे बालोन् सैं तोइ।
 59 कोलो प्रेरो तबै लिसों कोलोए ज्युर
 चिनु लइर मिं थेंबर तांइ ड्हेब्-ट्हुब्मैं ते
 हजे-म्हजेमैं खागु तइ। चमैइ कोलोए मिं
 आबाए मिं दोन् तब जकरिया थेंल् म्हैलो।
 60 छैबिलेया चए आमाइ “आडिं, चुए मिं
 यूहन्ना थेंब् का,” बिइ।
 61 चमैइ बिइ, “छैबिलेया केमैए हजे-म्हजेमैं
 न्होरि छैलि मिं सुलै आरे।” 62 छतइर चमैइ
 कोलोए आबादे हस्ता लइर “कोलोए मिं ता
 थेंल् झूँडमुं?” बिइर डचोएमारे
 63 चइ प्हिबै माल हिइर “चुए मिं यूहन्ना
 का बिइर” प्हिमिंड। छतइर चमै तांइ
 अचम्मा तयइ। 64 च बितिकन् जकरिया

पोल् खाब् तइर परमेश्वरए मिं क्वेंबर
 होंइ। 65 परमेश्वरजी लबै छैलि के म्रॉइर
 चमैए ड्हेब्-ट्हुब्मैं छक्क तइर परमेश्वरदे
 फाङ्गियाइ। चु तांए बयन यहूदीया ट्युलबैं
 कों-कोता थेनेइ। 66 च तां थेब्मैं तांनइ “चु
 कोलो लिसों खैलि तब् ड्हे?” बिइर आफैए
 सैर मैइ। तलेबिस्यां परमेश्वरए शक्ति चए
 फिर मुंलो।

जकरियाइ परमेश्वरए मिं क्वेब ते लिसों तखबै तां बिमिब

- 67 जकरिया पबित्र प्ल्हजी प्लिसि
 अगमबाणि पोंबर होंइ,
 68 “इस्राएलीमैइ मादिबै परमेश्वरए मिं
 थेबले तदिगे।
 तलेबिस्यां आफैए म्हिमैं जोगेमिंबै
 लागिर थि युडमुं।
 69 दाऊद मुंए कुलर डचो जोगेमिंबै
 लागिर
 थीजी थेबै शक्ति मुंबै मुक्तिदाता
 कुल्मिंडमुं।
 70 थीजी चु तां त्हेम्दक्या आफैए पबित्र
 अगमबक्ताए सुंदक्या पोंलो।
 71 थीजी डचोए शत्तुरमैं ते
 डचोए फिर खैच्छिजिले पोंब्मैदक्याले
 डचो जोगेमिंडमुं।
 72 थीजी डचोए खेमैदे फैबै पबित्र बाछा
 मैइर
 डचोए फिर ल्हय खमिंडमुं।
 73 थीजी डचोए खे अब्राहामदे होलिन्
 डइ फैबै बाछा पूरा लमिंभुं
 बिइर बाछा फैलो।
 74 छतइर डचोए शत्तुरमैए योदक्या
 डचो फ्रेमिंभुं,

75 छतइर डचो फाआङ्गिन्ले आफैए छह
भरिन् परमेश्वरए के छेनाले लइर
थिए उँइँसों छचाँबै छह थोल् खाँमैं
बिबै ताँ उँइँसों पुँलो।

76 ओ डए चह, कयों ताँइ बन्दा थेबै
अगमबक्ता तब्भुँ,
तलेबिस्याँ परमेश्वरजी कुल्मिंबै भ्रुँए
उँइँसों याइर

थिए लागि र कयोंइ कयों छचाँभुँ।

77 पापदक्याले क्षमा योंइर मुक्ति योंभुँ
बिबै ताँ

कयोंइ परमेश्वरए म्हिमैदे लोमिँभुँ।

78 तलेबिस्याँ डचोए परमेश्वर ल्हय
माया मुँब मुँ,

छतइर नानरि प्योबै त्हाँइ दोले थिए
चारबै हवे स्वर्गदक्याले डचोए
फिर चारभुँ।

79 चदक्या मिछु खैबर टिभुँ ते कालए
सुँर फेल् म्हाँमैइ चारबै हवे
योंभुँ,

धाइर च हवेइ डचो शान्ति कयों
डोरेभुँ।”

80 च लिसों कोलो यूहन्ना थेब तब्दै याइर सैं
या चिदै याइ। छैबिलेया इस्राएलीमैए माजरि
चु ताँमैं बिबै त्हे आतन् समा यूहन्ना म्हि
आटिबै कल्ह्योरि टिइ।

येशू फिब

2 यूहन्ना फिबै त्हेर ह्युल तिगोंबैं म्हिमैं
च्योबै लागि र मिं प्हिहल् पर्दिम् बिइर
अगस्टस बिबै रोमी भ्रुँइ बिइ। ²(चु उँइँसोंबै
जनसंख्या च्योमारे क्युरिनियस बिबै म्हि
सिरिया ह्युलबैं रोमी क्रथे मुँलो।) ³ ताँइ म्हिमैं
आ-आफैए नाँसर मिं प्हिबर याइ।

⁴ छतइर योसेफै या गालील ह्युलबैं नासरत
सहरदक्याले यहूदीया ह्युलए बेथलेहेम बिबै
नाँसर याइ। तलेबिस्याँ थिए खे दाऊद मुँ
च बेथलेहेम नाँसबैं मुँलो। ⁵ छतइर थिइ
हिथेबै मरियम बोइर मिं प्हिबर याइ। च
त्हेर मरियम प्हसें नोसिन् मुँलो। ⁶ चमैं
बेथलेहेमर मुँमाले मरियम सुत्केरि तबै त्हे
तइ। ⁷ चदक्या थिए च्हे थेब फिइर क्वेँइ
म्होरइर खेदोमैइ चब् चबै डोंडर नेथेँइ,
तलेबिस्याँ चमैं टिबै लागि र ठाँटि र कल्ह्यो
आरेलो।

प्होंछैमैं ते स्वर्गदूतमैं

⁸ च बेथलेहेम बिबै नाँसए पखता प्होंछैमैं
आफैए क्युमैं रूँबर म्हुँइँसर टिदिलो। ⁹ च
त्हेर्न स्वर्गदूत क्रिहें चमैए उँइँसों रायुमारे
परमेश्वरए चारबै हवे चमैए कारग्युले
चारइ। छतइर चमैं बेल्ले फाङ्गियाइ।
¹⁰ छैबिलेया स्वर्गदूतइ चमैदे बिइ,
“फाआङ्गिन्! तलेबिस्याँ ड केमैदे बेल्ले सैं
तोबै छचाँबै ताँ बिम्। चु ताँ ताँइ म्हिमैए
लागि र तब्भुँ। ¹¹ तिनि बेथलेहेम बिबै
दाऊदए नाँसर केमैए लागि र मुक्ति पिँबै
म्हि फिइमुँ। थीन् परमेश्वरजी कुल्मिंबै
प्रभु स्त्रीष्ट ग। ¹² चु ताँ केमैइ खैले था
सेम् बिस्याँ च भखेर फिबै कोलो क्वेँइ
म्होरइर खेदोमैइ चब् चबै डोंडर नेथेँब केमैइ
प्रोंभुँ।”

¹³ छ बिबै बितिकन् अरू लेदै स्वर्गदूतमैं
या तिखेर्न चमैं डार रायुइर परमेश्वर बेल्ले
थेब मुँ बिइर छले क्वे प्रिँइ,

¹⁴ “स्वर्गरि परमेश्वर मिं थेब तदिगे,
पृथ्वीरि थीजी त्हाँबै म्हिमैदे शान्ति
तदिगे!”

15 छले परमेश्वरए मिं क्वेइर स्वर्गदूतमैं स्वर्गदक्या तायाबै लिसों। प्ह्लोँछैमैँइ थैमैँए न्होर ताँ लइ, “तारे परमेश्वरजी ड्चोदे बिब् दौलेन् बेथलेहेम नाँसर याइर चर तबै ताँमैँ च्योना।” 16 छ बिइर चमैँ युन्ले यामाले मरियम, योसेफ ते डोंडर नेथेबै च्योने कोलो प्रोंइ। 17 च कोलो प्रोंमाले स्वर्गदूतइ थैमैँदे चु कोलोए बारेर बिबै ताँ चमैँइ ताँइ म्हिमैँदे बिमिँइ। 18 प्ह्लोँछैमैँइ बिबै ताँ थेब्मैँ ताँइ अचम्मा तयाइ। 19 छैँबिलेया मरियमइ चु ताँइ ताँ छेनाले मैँइर सैँर थेंइ। 20 चदक्या स्वर्गदूतइ खै बिलो छैलिन् प्ह्लोँछैमैँइ प्रोंल् योंइर चमैँइ परमेश्वरए मिं बेल्ले थेब् लइर थी धन्यबाद पिँइर क्वे प्रिँदै तायाइ।

कोलोए मिं येशू थेंब

21 प्हसें फिइर प्रेरोर कोलोए ज्युर चिनु लइर थिए मिं येशू थेंइ, तलेबिस्याँ प्हसें नोब् बन्दा उँइँसोन् स्वर्गदूतइ च मिं आमादे बिथेंलो।

येशू मन्दिरर बोखब

22 परमेश्वरजी ड्चोए खे मोशादे पिँबै ठिंमर बिब् दौले चमैँए रो छोंल् खाँबै लिसों चमैँइ कोलो येशू परमेश्वरए डार्र अर्पण लबर यरूशलेम सहरर बोइ। 23 तलेबिस्याँ “चह थेब्मैँ याहवेहए लागिंर पबित्र तब्मुँ,” बिइर परमेश्वरए छ्वेर प्हिइमुँ। 24 चदक्या परमेश्वरए छ्वेर बिब् दौले “तिजोर तोंगु

मुँले परेवाए चहज मुँले” किँइर चमैँ खो पिँबर मन्दिरर याइ।

25 च त्हेर यरूशलेम सहरर शिमियोन बिबै म्हि क्रिहें टिमलो। च छ्याँबै के लबै म्हि ते परमेश्वर मादिबै म्हि मुँलो, चदे बालो परमेश्वरए पबित्र प्ल्ह मुँलो। इस्राएली म्हिमैँ परमेश्वरजी जोगेमिँब्मुँ बिइर शिमियोनइ लेँदै बर्ष उँइँसोन् परमेश्वरए क्याँ च्योदिलो। 26 परमेश्वरजी कुल्मिँबै मुँ ख्रीष्ट आम्रोंन् समा क्याँ आसि बिइर पबित्र प्ल्हजी चदे उँइँसोन् था पिँलो। 27 चदक्या पबित्र प्ल्हजी बिब् दौले शिमियोन मन्दिर न्होर होंमाले। परमेश्वरए छ्वेर बिब् दौले लबर आबा-आमाइ कोलो येशू मन्दिर न्होर बोखइ। 28 चदक्या चइ कोलो आफैँए क्वेँदर किँइर परमेश्वर धन्यबाद पिँइर बिइ,

29 “ओ प्रभु, तोगो क्याँजी उदे बिबै ताँ पूरा लमिँइमुँ,

तारे उ छेनाले सियाल् खाँम्।

30 तलेबिस्याँ क्याँजी कुल्मिँबै मुँ ख्रीष्ट उए मिइ प्रोंल् योंइ। 31 ताँइ हेंबै म्हिमैँइ थी प्रोंदिगे बिइर क्याँजी कुल्मिँब् ग।

32 चु कोलो अरू हेंबै म्हिमैँ क्याँए क्याँ उँइँमिँबै चारबै ह्वे ग,

छलेन क्याँए इस्राएली हेंबै म्हिमैँए मिं थेब् लमिँबै चारबै ह्वे थीन् ग।”

33 चु ताँ थेमाले कोलोए आबा-आमा प्लेटोयाइ। 34 चदक्या शिमियोनइ चमैँए फिर आशिक पिँइर मरियमदे बिइ,

“थेद्, इस्राएलीमैँ न्होरि लेँदै म्हि नास लबर ते लेँदै म्हि जोगेमिँबर

चु कोलो कुलइमुं।
 चु कोलो परमेश्वरजी कुलबै चिनु तब्मुं,
 लेंदै म्हिइ चु कोलोए बिरोधर पोंब्मुं।
 35 छतइर थीजी म्हिमैए सैं न्होर्बै तामैं
 उँईमिंब्मुं।
 चदक्या सेलाँइ (तरवारइ) म्लोब् दोले
 क्योए सैं बेल्ले नब्मुं।”

अगमबक्तास्यो हन्ना खुयु

36 चदक्या च मन्दिरर हन्ना
 अगमबक्तास्यो मुँलो। चए आबा फनुएल
 बिब् मुँलो, च आशेरए कुलबै मुँलो। च
 हन्ना ब्ह्या लबै डिदिंर प्युं सियाइर म्हेरेस्यो
 तयालो। 37 च प्रेच्युसे प्लिदिं तयालो।
 छैबिलेया च बर्त टिइर प्राथना लइर
 त्हेँइ म्हुँइस परमेश्वर सैर मैँइर मन्दिरर
 टिदिमलो। 38 च त्हेर्न हन्ना खइर परमेश्वर
 धन्यबाद पिंबर होइ। चदक्या परमेश्वरजी
 यरूशलेम जोगेमिंब्मुं बिइर क्योँ च्योदिबै
 ताँइ म्हिमैँदे चइ चु कोलोए बारेर ताँ लमलो।

नासरत नाँसर तायाब

39 परमेश्वरए छुवेर बिब् दोले लल् पर्दिबै
 ताँइ के लल् खाँइर योसेफ ते मरियम कोलो
 बोइर गालील ह्युलबै नासरत बिबै आफैए
 नाँसर तायाइ। 40 परमेश्वरए आशिक थिए

फिर मुँलो। छतइर कोलो फारदै पोंब ते
 हब-सेब तब्दै याइ।

कोलो येशू मन्दिरर मुँब

41 कोलोए आबा आमा सालै क्होंसे दुःखदे
 फ्रेबै चाड मादिबर यरूशलेमर याब्ले लमलो।
 42 येशू च्युसे छ्दिंर्बै तमाले येशू बोइर चमैं
 चाड मादिबर यरूशलेमर याइ। 43 चाड
 मादिल् खाँबै लिसों येशूए आबा आमा तिर
 तायाइ। येशू बिस्याँ यरूशलेमर टिइ। येशू
 चर टियाइ बिइर आबा आमाइ आसेलो।
 44 क्योँर प्रबै म्हिमैए हुलर थि मुँले झाँइर
 चमैं तिरोबै क्योँ प्रइर याइ। म्हुँइस तबै
 लिसों चमैँइ हजे-म्हेजेमैं ते डो सेब मिं
 सेब्मैए न्होरि येशू म्हेबर होइ। 45 छैबिलेया
 येशू खनरै आयोमाले चमैं दबै येशू म्हेदै
 यरूशलेमर ताखइ। 46 सोरो लिसों चमैं
 मन्दिरर यामारे येशू परमेश्वरए ठिम लोमिबै
 म्हिमैए माजरि कुँइर चमैँए ताँ थैइर चमैँदे ताँमैं
 डचोएदिब स्याइ। 47 थिए क्होबै शक्ति ते
 छचाँबे ज्वाफमैं पिंब् प्रोँइर थिए ताँ थेब्मैं
 ताँइ प्लेटोयाइ। 48 थि प्रोँइर आबा आमैया
 प्लेटोयाइ। धाइर आमाइ थीदे बिइ, “मुख्या,
 क्योँइ तले डि छैलि दुःख पिंलो? क्योँए
 आबा ते ड बेल्ले न्हुँ खइर क्योँ म्हे-म्हे प्रइ!”
 49 येशूजी चमैँदे बिइ, “केमैँइ तले ड
 म्हेदिलो? डए आबाए तिर ड मुँल् पर्दिम्
 बिब केमैँइ आसेल् आ?” 50 छैबिलेया

येशूजी बिबै ताँ मरियम ते योसेफइ आक्होलो।

51 च लिसों येशू चमैदे प्रे नासरत नाँसर तायाइ, धाइर आबा आमाइ बिबु डिंडर टिइ। चर मोबै ताँइ ताँमै आमाइ सैर थेंइ। 52 येशू बिस्साँ ज्ञान बुद्धि ते ज्युर फारदै परमेश्वर ते म्हिमैइ खोबै म्हि तब्दै याइ।

बप्तिस्मा पिंबै यूहन्ना

3 रोम सहरबै तिबेरियस बिबै म्हिइ च्युसे इहदिं समा ग्याल्स लमाले पन्तियस पिलातस यहूदीया ह्युलबै क्रथे मुँलो। च त्हेर गालील बिबै ह्युलर हेरोद मुँ मुँलो। इतुरिया ते त्राखोनितिस बिबै ह्युलर हेरोदए अलि फिलिप मुँ मुँलो। अबिलेने बिबै ह्युलर लुसानियास बिबै म्हि मुँ मुँलो। 2 चदक्या यरूशलेमर हन्नास ते कैयाफा खो पिंबै खेगि क्रथेमै मुँलो। च त्हेर क्यु आयोबै क्ल्ह्योर जकरियाए चह यूहन्नादे परमेश्वरए ताँ युइ। 3 छतइर यूहन्ना यर्दन स्योए खागुबै ताँइ क्ल्ह्योजरे स्युरइर म्हिमैदे पाप लब पिइर परमेश्वरउँइ सै ताद् धाइर क्युर प्लुइर बप्तिस्मा किन्। छलस्याँ परमेश्वरजी केमैए पाप क्षमा लमिंभुँ बिइर परमेश्वरए ताँ बिब्दै प्रबर होंइ।

4 त्हम्दबै यशैया अगमबक्ताइ यूहन्नाए बारे उँइसोन् छले प्हिइमुँ,

“क्यु आयोबै क्ल्ह्योर म्हि क्रिहेंड कै तेइर छ बिसिन् मुँ,

‘याहवेहए लागिंर क्योँ छ्याद्!

थि प्रबै लागिंर आछ्याँबै क्योँमै बनेद्!

5 ताँइ होंल्दोमै म्यारभुँ

चदक्या ताँइ कोमै चेप्ला लभुँ,

कदकुदि क्योँमै सोजो तयाभुँ,

कर आयोबै क्योँमै कर योब तयाभुँ।

6 छले ताँइ म्हिमैइ परमेश्वरजी जोगेमिंमै बिइर सेभुँ।”

छले यशैयाइ प्हिथेंबै ताँ यूहन्ना खइर पूरा लइ।

7 छतइर क्युर प्लुँइर बप्तिस्मा पिन् बिइर लेदै म्हिमै यूहन्ना डारं खइ। छले खमाले यूहन्नाइ चमैदे बिइ, “ओ, फुरि दों तबै म्हिमै! परमेश्वरजी पिंबि छेबै सजैदक्याले स्योल् खाँम् बिइर सुइ केमैदे बिलो? 8 छतइर केमैए सै परमेश्वरउँइ ताइर छ्याँबै के लइर उँइन्। ‘डि यहूदीमै परमेश्वरजी त्हाँबै म्हि अब्राहामए कुलबै सन्तानमै ग। छतइर डिइ परमेश्वरदक्याले सजै आयो बिइर केमैइ आमैन्’ तलेबिस्साँ परमेश्वरजी चु युँदक्याले अब्राहामए लागिंर सन्तानमै लमिंल् खाँम्। 9 तोगोन् सिंदुँए जरर त पर्दिंल् खाँइमुँ छतइर छ्याँबै रो आरोबै सिंदुँमै ताँइ थोइर मिर चोँभुँ।”

10 चु ताँ थेंइर ल्हें म्हिमैइ “छ बिस्साँ तारे डिइ ता लल् पर्दिंम्?” बिइर यूहन्नादे ड्योएइ।

11 यूहन्नाइ बिइ, “सुदे खेबै क्वें झिजोर मुँ, चइ आरेबै म्हिमै तिजोर पिदिगे, सुदे चबै सै मुँ चइ फो खेंभै चल् पिदिगे।”

12 चदक्या रोमी मुँए लागिंर बालि रेभै या क्युर प्लुँइर बप्तिस्मा किंबर खलो। चमैइ यूहन्नादे “ओ गुरु, तारे डिइ ता लल् पर्दिंम् बिइर ड्योएइ?”

13 यूहन्नाइ चमैदे बिइ, “सरकारइ तोक्दिब् बन्दा लेदै मुइ आकिन्।”

14 को-कोइ सिपाइमैज्यै या “डिइ खै लल् पर्दिंम्?” बिइर यूहन्नादे ड्योएइ।

यूहन्नाइ चमैदे बिइ, “सुज्यै या अनिया लइर स्योलिबै छ्याब् ल्हैदिइर आलुट्दिद्। केमैए नों सै कति योँमुँ चहगोर्न सन्दोक तद्।”

15 मुक्ति पिंभै मुँ ख्रीष्ट खोंयों युम् ड्हे बिइर म्हिमें ह्हेदिलो। छतइर “परमेश्वरजी कुल्मिंबै मुँ ख्रीष्ट यूहन्नान् मुँड उ?” बिइर ताँइ म्हिमेंड मैदिलो।

16 छतइर यूहन्नाइ चमैं ताँइदे बिइ, “डइमि केमैं क्युर प्लुँइर बप्तिस्मा पिंम्, छैबिलेया ड बन्दा शक्ति मुँबै म्हि क्रिहें युब्मुँ, थिए जुत्ताए तनि प्लबर ड्हेब ड आरे। थीजी परमेश्वरए पबित्र प्लह ते मिड केमैं बप्तिस्मा पिंब्मुँ। 17 सोंग्याँ टाबै नउलि थीदे मुँ। च नउलिइ आफैंए सोंग्याँ छेनाले टाब्मुँ, गहुँ भकारिर खागु लब्मुँ पुइ बिस्याँ खैमेंड आसिबै मिर खोंब्मुँ।”^a

18 छैलि ल्हें खालबैं अर्थिए ताँमैं बिइर यूहन्नाइ परमेश्वरजी कुल्मिंबै मुँ ख्रीष्टदक्याले खबै सैं तोबै ताँमैं म्हिमेंदे बिइर प्रइ। 19 छैबिलेया हेरोद मुँड आफैंए अलिए प्हेंस्यो हेरोदियास प्हेंस्यो लइर थेंब ते चइ आछ्याँबै केमैं लब्दक्या यूहन्नाइ च हौदिलो। 20 चदक्या यूहन्ना भेलर च्युयाइर हेरोदइ आछ्याँबै के लबै फिरै या भन् आछ्याँबै के लइ।

येशूजी यूहन्नादक्याले बप्तिस्मा किंब

21 यूहन्ना भेलर च्युयाब् बन्दा नसों चए योदक्या ताँइ म्हिमेंड क्युर प्लुँइर बप्तिस्मा किंइ। चदक्या येशूज्यै बप्तिस्मा किंइर परमेश्वरदे प्राथना लदिमाले स्वर्ग थोंयाँइ। 22 चदक्या परमेश्वरए पबित्र प्लह तोंगुए क्होर येशूए फिर युइर टिइ। चदक्या “क्यों डए खोबै च्ह ग, क्यों प्रोंइर ड बेल्ले सैं तोँडमुँ,” बिबै कै स्वर्गदक्याले युइ।

येशू प्रभुए खेमैं

23 येशूजी ताँइ बन्दा उँडंसों औदिबै के लबर होंमाले थि सोंच्यु बर्षबैं दे मुँलो। थि योसेफए च्ह ग बिइर म्हिमेंड मैमलो।

योसेफए आबा एली मुँलो।

24 एलीए आबा मत्तात मुँलो।

मत्तातए आबा लेबी मुँलो।

लेबीए आबा मल्की मुँलो।

मल्किए आबा यान्ना मुँलो।

यान्नाए आबा योसेफ मुँलो।

25 योसेफए बा मत्तियाह मुँलो।

मत्तियाहए आबा आमोस मुँलो।

आमोसए आबा नहूम मुँलो।

नहूमए आबा इसली मुँलो।

इसलिए आबा नगै मुँलो।

26 नगैए आबा मात मुँलो।

मातए आबा मत्तियास मुँलो।

मत्तियासए आबा सेमैन मुँलो।

सेमैनए आबा योसेख मुँलो।

योसेखए आबा योदा मुँलो।

27 योदाए आबा योआनन मुँलो।

योआननए आबा रेशा मुँलो।

रेशाए आबा यरुबाबेल मुँलो।

यरुबाबेलए आबा शालतिएल मुँलो।

शालतिएलए आबा नेरि मुँलो।

28 नेरिए आबा मल्की मुँलो।

मल्कीए आबा अदी मुँलो।

अदीए आबा कोसाम मुँलो।

कोसामए आबा इलमादाम मुँलो।

इलमादामए आबा एर मुँलो।

29 एरए आबा यहोशू मुँलो।

यहोशूए आबा इलाजार मुँलो।

इलाजारए आबा योरीम मुँलो।

^a ३:१७ चु अहानए मतलब तारे प्रभु येशू छ्याँबै के लब् ते आछ्याँबै के लबै म्हि फेलबर तयार मुँ बिब् ग।

योरीमए आबा मत्तात मुँलो ।
 मत्तातए आबा लेबी मुँलो ।
 30 लेबीए आबा शिमियोन मुँलो ।
 शिमियोनए आबा यहूदा मुँलो ।
 यहूदाए आबा योसेफ मुँलो ।
 योसेफए आबा योनान मुँलो ।
 योनानए आबा एल्याकिम मुँलो ।
 31 एल्याकिमए आबा मलेआ मुँलो ।
 मलेआए आबा मिन्ना मुँलो ।
 मिन्नाए आबा मत्ताथा मुँलो ।
 मत्ताथाए आबा नातान् मुँलो ।
 नातानएआ आबा दाऊद मुँलो ।
 32 दाऊदए आबा यिशै मुँलो ।
 यिशैए आबा ओबेद मुँलो ।
 ओबेदए आबा बोअज मुँलो ।
 बोअजए आबा सल्मोन मुँलो ।
 सल्मोनए आबा नहशोन मुँलो ।
 33 नहशोनए आबा अम्मीनादाब मुँलो ।
 अम्मीनादाबए आबा आराम मुँलो ।
 आरामए आबा हेस्रोन मुँलो ।
 हेस्रोनए आबा फारेस मुँलो ।
 फारेसए आबा यहूदा मुँलो ।
 34 यहूदाए आबा याकूब मुँलो ।
 याकूबए आबा इसहाक मुँलो ।
 इसहाकए आबा अब्राहाम मुँलो ।
 अब्राहामए आबा तेरह मुँलो ।
 तेरहए आबा नाहोर मुँलो ।
 35 नाहोरए आबा सरूग मुँलो ।
 सरूगए आबा रऊ मुँलो ।
 रऊए आबा पेलेग मुँलो ।
 पेलेगए आबा एबेर मुँलो ।
 एबेरए आबा शेलह मुँलो ।
 36 शेलहए आबा केनान मुँलो ।
 केनानए आबा अर्पक्षद मुँलो ।
 अर्पक्षदए आबा शेम मुँलो ।

शेमए आबा नोआ मुँलो ।
 नोआए आबा लेमेख मुँलो ।
 37 लेमेखए आबा मतूशेलह मुँलो ।
 मतूशेलहए आबा हनोक मुँलो ।
 हनोकए आबा येरेद मुँलो ।
 येरेदए आबा महलालेल मुँलो ।
 महलालेलए आबा केनान मुँलो ।
 38 केनानए आबा एनोश मुँलो ।
 एनोशए आबा शेत मुँलो ।
 शेतए आबा आदम मुँलो ।
 आदमए आबा परमेश्वर मुँलो ।

दुष्टइ येशूए जाँच लल म्हैब

4 येशू क्युर प्लुँडर बप्तिस्मा किंबै लिसों स्योँदक्याले ताखमाले पबित्र प्लहजी प्लिंडर यर्दन आयोंबै क्ल्हयोर बोइ । 2 येशू चर प्लिच्यु त्हिँइ समा टिमाले दियाबलस बिबै दुष्ट जाँच लबर चर खइ । चहगो त्हिँइ समा तोइ आचन्ले टिमाले येशू फो खेंलो । 3 छतइर दुष्टइ येशूदे बिइ, “क्यों होलिन् परमेश्वरए चह ग बिस्यां चु युँम ‘चबै सै तयादिगे’ बिइ ।”

4 छैबिलेया येशूजी चदे बिइ, “‘म्हि कहेँइ मत्रे सोल् आँखाँ!’ बिइर परमेश्वरए छ्वेर प्हिइमुँ ।”

5 च लिसों चइ थी नुबै कोर बोइर ह्युलबै ताँइ ग्याल्समै उँइँइ । 6 दुष्टइ येशूदे बिइ, “‘चु ताँइ ग्याल्सबै मालमै पिँडर डइ क्यों चुबै क्लहे तल् पिँस्यो । तलेबिस्यां चु ताँइ डइ योंइमुँ छतइर डइ सुदे पिँपिं झूँमुँ पिँल् खाँम् । 7 छतइर क्योंइ ड स्यो लस्यां डइ चु ताँइ मालमै क्यों पिँबुँम् ।”

8 येशूजी चदे बिड़,

“क्योंइ याहवेह आफैए परमेश्वर मत्रे
स्यो लइर,

थिए सेवा मत्रे लद्,” बिड़र
परमेश्वरए छ्वेर ढ्हिड़मुं।

9 दबै च दुष्टइ थी यरूशलेम सहरर बोइर
मन्दिरए ताँइ बन्दा नुबै चहोर राल् पिंइर थीदे
बिड़, “क्यों परमेश्वरए चह ग बिस्याँ चुदक्या
फाल् चोन्। 10 तलेबिस्याँ परमेश्वरए छ्वेर
छैलि ढ्हिड़मुं,

‘क्यों जोगेमिबै लागिर

परमेश्वरजी आफैए स्वर्गदूतमैं
कुलब्मुं।

11 चदक्या चमैइ क्यों यो-योर तोब्मुं,
छ आलस्याँ क्योंए प्हले युंमर
थुरयाब्मुं,’ बिड़र ढ्हिड़मुं।”

12 छैबिलेया येशूजी चदे बिड़,

“क्योंइ आफैए याहवेह परमेश्वरए
जाँच आलद्,’ बिड़र परमेश्वरए
छ्वेर ढ्हिड़मुं।”

13 दियाबलसइ येशूदे ताँइ खालबै जाँच
लइर थी पापर चहोल् आखाँमाले “तारे मौका
च्योइर जाँच लल् पर्दिलै” झूँइर च थी वार्थेइर
याइ।

येशूजी गालील ह्युलदक्याले आफैए के लल् म्हाब

14 च लिसों येशू परमेश्वरए पबित्र प्लहए
शक्ति योँइर गालील ह्युलर ताखइ। छले
ताखमाले थिए बारेबै ताँ च खागुबै ताँइ
नाँसजरे थेनेइ। 15 थीजी चबै चहों तिता
परमेश्वरए ताँ लोमिंबर होइ। छले लोमिमाले
ताँइ म्हिमैइ थिए छ्याँबै बयन लमलो।

आफैए नाँसमैइ येशू आपतेब

16 चदक्या येशू आफैए फाराबै सहर नासरतर
याइ। प्रिबै त्हिँइर थि चहों तिर याब्ले लबै
बाँनि मुँलो। छतइर थि चहों तिर याइर
परमेश्वरए छ्वे खेबर राइ। 17 चबै म्हिमैइ
थीदे यशैया अगमबक्ताइ ढ्हिबै छ्वे पिंइ।
थीजी च छ्वे फैइर चु ताँ चमैए लागिर खेमिंइ:

18 “याहवेह परमेश्वरए प्लह डए फिर मुँ,
तलेबिस्याँ झूँदुमैदे सैं तोबै ताँ बिमिंबर
थीजी ड त्हाँइमुं।

कैदिमैं भेलदक्या तेमिंबर,
धाइर कनमैं मि प्रॉल् लमिंबर।

अरु म्हिइ क्र ओल् आपिब्मैं रेमिंबर
थीजी ड कुल्मिंभ ग।

19 याहवेहजी आफैए म्हिमैं जोगेमिबै
त्हे खइमुं बिबर

थीजी ड कुल्मिंभ क।” 20 चहगो खेल्
खाँइर थीजी परमेश्वरए छ्वे
चहों तिबै म्हिदे पिंइर थि कुँइ।
चहों तिर मुँबै ताँइ म्हिमैइ थी
च्योबै च्योब् लदिलो। 21 चदक्या
थीजी चमैदे बिड़, “तिनि केमैइ
चु ताँ डेन-डेन परमेश्वरए छ्वेइ
ता बिड़मुं छैलि तइमुं।”

22 ताँइ म्हिमैइ “चुम् छ्याँबै म्हि मुँमैं।”
बिड़र थिए छ्याँबै बयन लइर थीजी पोबै सैं
तोबै छ्याँबै तामैं डेँइर चमैं ताँइ प्लेटोयाइ।
छाइले “चुम् योसेफए चह आडिँ आ?” बिड़र
चमैइ बिड़।

23 येशूजी चमैदे बिड़, “ओ बैद्य, क्यों आफैए
फैल् लद्। क्योंजी कफर्नहुमर ता-ता केमैं
लइमुं बिब डिँड थेलो। छतइर चर लब् दों
तबै केमैं आफैए नाँसरे या लद् बिबै चु अहान्
होलिन् केमैइ डदे बिब्मुं आडिँ आ।”

24 दबै थीजी चमैदे बिड़, “होलिन् ड केमैदे बिमुं, अगमबक्ता सुलाज्यै या आफैए ह्युलबै म्हिमैइ आपते। 25 होलिन् ड केमैदे बिमुं, इस्राएल ह्युलर एलियाए पलोर साडे सोदिं समा नां आयुमाले थेबै अङ्गल् तलो। च त्हेर चर म्हरेस्योमै लेदै मुंलो। 26 छैबिलेया परमेश्वरजी चमैं डाँर एलिया आकुललो। बरु इस्राएल ह्युल बन्दा अर्को सिदोन ह्युलबै सारफत बिबै नाँसबै म्हरेस्यो क्रिहें डाँर मत्त्रे ल्होबर एलिया कुललो। 27 चदक्या एलीशा अगमबक्ताए पलोर इस्राएली म्हिमैं न्होर कोर खबै म्हिमैं लेदै मुंलो। छैबिलेया च कोर खबै न्होरि सुइ आसलो, अरू ह्युलबै सिरियालिथे नामान बिबै म्हि मत्त्रे एलीशा डाँर खइर फैइ।”

28 चु ताँ डेंइर च्हों तिर मुंभै ताँइ बेल्ले सु खइ।^a 29 छतइर चमैइ नाँसदक्या येशू बैरु तेयाइर थेंमैइ बनेबै सहरए कोर्बे च्होर बोइर थी क्युरु भ्योयाल् म्हैइ। 30 छैबिलेया येशू हुलए माँजदक्या क्युलइर त्हांयाइ।

येशूजी मोंइ स्याबै म्हि फैल् लमिंब

31 च लिसों येशू गालील ह्युलबै कफर्नहुम बिबै नाँसर याइर प्रिबै त्हिंइर म्हिमैं लोमिंदिलो। 32 थीजी लोमिंबै ताँ थेबैं प्लेटोयाइ तलेबिस्याँ थीजी हग मुंल्ले

ताँ पोमलो। 33 च्हों तिर मोंइ स्याबै म्हि क्रिहें मुंलो। चइ थेबै कैले चिरइर, 34 “ओ नासरतबै येशू, क्योइ डि ता लल् म्हैलो? डि सैबर खल् आ? क्यो परमेश्वरजी कुलिंभै पबित्र म्हि ग बिइर डइ सेइमुं।”

35 छबिमाले येशूजी हौदिदै च मोदे बिइ, “आपोन्, च म्हिदक्या त्हांइर याद्।” बिमाले मोंइ च म्हिमैए माजर प्योवाइर चलाइ ताइ न्होहों आलन्ले च मों म्हिदक्या त्हांयाइ।

36 छ तब् प्रोइर ताँइ म्हिमैं प्लेटोयाइर “चु खैतबै ताँ जा? चुइमि हग ते शक्ति मुंल्ले मोमैं हौदिबै बितिकन् मोमैं यामन बिइर आफै-आफै ताँ लबर होइ।” 37 छतइर प्रभु येशूए छचाँबै बयन चताबै ताँइ ह्युलता थेनेइ।

येशू प्रभुजी ल्हें नबै म्हिमैं फैल् लमिंब

38 येशू च्हों तिंदक्या त्हांइर सिमोन बिबै म्हिए तिर यामाले सिमोनए स्युमिं बेल्ले जर खइर नदिलो। छतइर चबै म्हिमैइ चु सल् लमिन् बिइर येशूदे यो छ्युं लइ। 39 छबिमाले थि चए डाँर राइर जरदे हौदिइ, छले हौदिमाले जरइ च पियाइ। धाइर फैबै बितिकन् रेइर थेंमैए सेवा लइ।

40 त्हांइ लिबि छेमाले चताबै लेदै खालबै नभमै म्हिमैइ येशू डाँर पखइर थीजी क्रि-क्रिए

^a ४:२८ च्हों तिर मुंभै ताँइ बेल्ले सु खइ तले सु खइ बिस्याँ, परमेश्वरजी अरू हेंमैलाज्यै या आशिक पिंम बिबै ताँ येशूजी बिलो। छतइर सु खइ।

फिर आफैँ यो थेंडर चमैँ ताँइ फैल लमिंइ।
41 लैदै म्हिदक्या मोमैँ थैबै कैले “क्यों परमेश्वरए चह ग,” बिब्दै त्होंयाइ।

छैंबिलेया थीजी हौदिइर चमैँ पौल् आपिलो। तलेबिस्याँ “येशू परमेश्वरजी कुल्मिंबै मुँ स्त्रीष्ट ग!” बिइर च मोमैँइ सेमलो।

प्रभु येशू तले युइ बिबै ताँ

42 न्हांग मि मोंबै लिसों येशू सुइ आरेबै कल्ह्योर याइ। छैंबिलेया म्हिए हुलइ म्है-म्है थि डारं खइर “डि पिइर आयामिन् बिइर,” यो छचुँ लइ।

43 छैंबिलेया थीजी चमैँदे बिइ, “तारे परमेश्वरजी ग्याल्स लबर होंइमुँ। छतइर थीजी बिब डिन्, थीजी केमैँए फिर आशिक पिंभुँ।^a बिइर चु सैं तोबै ताँ उइ अरू कल्ह्योरै या बिल् पर्दिम्। तलेबिस्याँ चुए लागिंर परमेश्वरजी ड कुल्मिंब ग।”
44 चहगो बिइर थि यहूदीया ह्युलबै च्हों धिंजगोर परमेश्वरदक्याले खबै सैं तोबै ताँ बिब्दै प्रइ।

येशूजी ताँइ बन्दा नसोबै चेलामैँ त्हाँब

5 तिगैँ येशू गनेसरत बिबै तालए रेर रादिमाले परमेश्वरए ताँ डेबर लैदै म्हिमैँ थि डारं खलो।² येशूजी तालए रेर दुँङ्गा इह्यौलो मोँइ। ताँग कहाब्मैँ बिस्याँ दुँङ्गादक्या त्होंइर थेंमैँए जाल खुदिलो।³ च दुँङ्गा इह्यौलोर दुँङ्गा क्रिहें सिमोनल् मुँलो। सिमोन बिबै म्हिए दुँङ्गार येशू क्रेइर चदे

दुँङ्गा छेगोदक्याले दे क्याइ बोयाद् बिइर थि च दुँङ्गार कुँइर म्हिए हुलदे परमेश्वरए ताँ लोमिंबर होंइ।

4 ताँ लोमिंल् खाँबै लिसों थीजी सिमोनने बिइ, “दुँङ्गा गैरू क्युउँइ बोइर ताँग कहाबर केमैँए जाल प्रिन्।”

5 छबिमाले सिमोनइ बिइ, “गुरु, डिइ म्हुँइँतिमि सिया-सियाले जाल प्रिमेंया ताँग क्रिहें या आस्या। छैंबिलेया क्योँइ प्रिन् बिब्दक्या उइ जाल प्रिम्।”⁶ थीजी बिब् डिँइर चमैँइ जाल प्रिमाले ल्हें ताँग स्याइर जालैया टोयाबर होंइ।⁷ छतइर चमैँइ अर्को दुँङ्गार मुँबै थुमैँदे “चुर खइर डि ल्होमिन्!” बिइर हस्त लइ, चमैँ खइर दुँङ्गा इह्यौलोर ताँग प्लिंल् लइ, जगो लैदै ताँग तब्दक्या दुँङ्गाजगो या प्लुबर होंइ।

8 छतब् मोँइर सिमोन पत्रुसइ येशू प्रभुए उँइर पत्खु तइर बिइ, “ओ प्रभु क्योँ ड दाक्या हेंगो तयाद्, तलेबिस्याँ ड पापि म्हि गो।”⁹ जगो ल्हें ताँग स्याब् मोँइर सिमोन ते चए थुमैँ ताँइ प्लेटोयाइ।¹⁰ छलेन सिमोनए गमस्ता थुमैँ जब्दियाए चहमैँ याकूब ते यहन्ना या प्लेटोयाइ।

चदक्या प्रभु येशूजी सिमोनदे बिइ, “फाआङ्गिन्! तारेक्या क्योँइ ताँग खुबै के आडिं, म्हिमैँ खुइर ड डारं बोखबै के लब्मुँ।”¹¹ छबिमाले चमैँइ आफैँए दुँङ्गाजगो तालए रेर भ्योँथेंइर ताँइ माल वाथेंइर प्रभु येशूए लिलि याइ।

येशूजी कोर खबै म्हि फैल् लमिंभ

12 तिरौ येशू नाँस क्रिहेंर मुँमाले ज्यु भरि कोर खबै म्हि क्रिहें चर मुँलो। चइ येशू मोँइर

^a ४:४३ प्रिक क्युइर परमेश्वरए ग्याल्स (राज्य) बारेर

पदखु तइर येशूदे यो छचुं लइर बिइ, “ओ प्रभु, क्योइ डए कोर फैल् लमिंबै सैं मुंस्यां फैल् लमिल् खांम।”

13 थीजी यो स्योइर “डज्यै क्यो फैंयादिगे झूँडमुं, क्यो फैंयाद्” बिब्दै चदे छुइबै बितिकन् चए कोर फैंयाइ। 14 छतइर येशूजी चदे “डेंन, चु तां सुलाज्यै खैलसे आबिद्। बरु क्योए कोर फैंयाब सेदिगे बिइर सरासर खो पिंबै खेगि डारं याइर क्योए ज्यु उँइर तह्मद मोशाइ प्हिबै ठिमार बिब् दौले ‘क्यो शुद्ध तयामै’ बिइर म्हिमैदे उँइबै लागि र खो पिन्,” बिइर ल्हैदिइ।

15 छैं बिले येशूए बयन नसों बन्दा भन् खन्तोदोन थेनेइ। छतइर थिए तां डेंबर ते आ-आफैए नब फैल् लमिदिगे बिइर म्हिए हुल थि डारं खमलो। 16 छैंबिलेया येशू म्हिइ आम्रोबै कल्ह्योउँइ याइर परमेश्वरदे प्राथना लब्ले लमलो।

येशूजी स्याले तबै म्हि फैल् लमिंब

17 तिरो येशूजी परमेश्वरए तां म्हिमैदे लोदिमाले गालील ते यहूदीया ह्युलबै ताँड नाँसदक्या, यरूशलेमदक्याले खबै फरिसीमै^a ते शास्त्रिमै या येशूए रेर कुँदिलो। याहवेह परमेश्वरए नब फैल् लबै शक्ति येशूदे मुँलो। 18 च त्हेर्न स्याले तइर चलेल् आखाँबै म्हि क्रिहें खाटने बालोन नोइर म्हिमैइ पखइर च नबै म्हि तिं न्होर बोइर येशूए उँइर थेंल् म्हेइ। 19 छैंबिलेया म्हिए हुलइ लमाले च म्हि न्होर बोबै क्यो आयोमाले चमै तिंए फिर क्रेइर

तिंए प्हें ओइर नबै म्हि खाटदे प्रे येशूए उँइर तवाइ। 20 चमैए जगो थेबै बिश्वास म्रोइर येशूजी च नबै म्हिदे बिइ, “ओ बाबु, क्योए पाप क्षमा तइ।”

21 चु तां थेइर फरिसीमै ते शास्त्रिमैइ आफै आफै “परमेश्वर म्हि आच्छिल्ले पोंब चु सु जा? परमेश्वरजी मत्त्रे पापए क्षमा पिंल् खाँम् आडिं आ? बिबर होंइ।”

22 छैंबिलेया येशूजी चमैए सैबैं तां था सेइर बिइ, “केमै आफैए सैर तले छैलि तां मैदिलो? 23 प्रल् आखाँबै म्हिदे ता बिब् छचॉब तम्? ‘रेसि प्रद्’ बिब् उ ‘क्योए पाप क्षमा तइ’ बिब तो बिब् सजिल् मुँ? 24 छैंबिलेया म्हिए च्हेदे पृथ्वीर पाप क्षमा पिंबै हग मुँ बिइर केमैइ सेद्।” जगो बिइर थीजी च स्याले म्हिदे “रेद्, क्योए खाट नोइर तिंर याद्,” बिइ। 25 येशूजी छ बिबै बितिकन् च नबै म्हि चमै ताँनए उँइर रेइर आफै रोदिबै खाट नोइर परमेश्वरए मिं थेब लदै आफैए तिंर याइ। 26 छैलि म्रोइर चबैं ताँड म्हिमै प्लेटोयाइर परमेश्वरए के म्रोइर बेल्ले फाइँइर थिए मिं थेब लदै “तियाँ डिँइ औदिबै के म्रोइ,” बिइ।

येशूजी लेबी बिबै म्हि उइब

27 च लिसों येशू बैरु यामाले मालार बालि रेबै लेबी म्हि क्रिहें म्रोइ। च लेबी रोमी मुँए लागि र बालि रेबै म्हि मुँलो। येशूजी चदे “डए लिलि प्रद्,” बिइ। 28 छबिमाले च लेबीइ थिए ताँड माल वाथेंइर येशूए लिलि प्रयाइ।

^a ५:१७ फरिसीमै: परमेश्वरए ठिम मादिबै टोलिबैं म्हिमै मुँलो। ^b ५:२४ म्हिए च्हे मतलब सों मुँ। प्रभु येशूजी आफैजीन् आफैदे बिबे मिं ग। इह्यौलो: हिबू क्युइर चए मतलब “म्हि मत्त्रे” मुँलो। छतइर च मिं च्योन तब, कुरब मुँलो। (इजकिएल २:१; भजनसंग्रह ८:४ च्योद्।) सों: अर्को थेबे मतलब मुँ: परमेश्वरजी येशूलाइ कुलिम्बद क्या खील स्वर्ग ते पृथ्वीए फिर ग्याल्स लबै हग, शक्ति ते अधिकार मुँ। (दानिएल ७:१३,१४ च्योद्।)

29 चदक्या च लेबीइ येशूए लागिण आफैए तिर थैबै भोज लइ। चर रोमी मुँए लागिण बालि रेब्मै ते अरू ल्हें म्हिमै या चमैदे कुँइर चदिलो। 30 छले चदिमाले फरिसीमै ते चमै न्होर्बै शास्त्रिमैइ येशूए चेलामैए बिरोधर गनगन लइर “चु बालि रेब्मै ते पापिमैदे केमैइ तले चब्-थुँब् ललो?” बिबर होंइ।

31 छैबिलेया येशूजी चमैदे बिइ, “नब् छब् आतब्मैए लागिण बैद्य आचैदि, नब् छब्मैए लागिण मन्त्रे बैद्य चैदिम्। 32 छतइर ड धर्मि प्हेम्बै उइबर युब आङि, ‘पापिमैइ पाप लब् पिइर परमेश्वर उँइ सैं एदिगे,’ बिइर उइबर युब् ग।”

बर्त टिबै ताँ

33 चमैइ येशूदे बिइ, “बप्तिस्मा पिबै यूहन्नाए चेलामै बर्त टिब्ले लइर प्राथना लम्। फरिसीमैए चेलामैज्यै या छैलि के लम्, छैबिलेया क्योए चेलामै बिस्याँ त्हिंइ क्हाँसे चब् थुँब् लम् तले जा?”

34 येशूजी चमैदे बिइ, “ब्ह्या भत्यारर प्हेरो मुँन् समा प्हेरोदे खबै प्हेमैदे तोइ आचल्ले टिद् बिल् तम्मा? 35 छैबिलेया प्हेरो चमैदे फ्रेयाबै त्हिंइ खब्मुँ, च त्हेर बल्ल चमैइ बर्त टिब्मुँ।”

36 येशूजी चमैदे चु अहानै बिइ, “सुज्यै या छार क्वे टोइर स्योब क्वेर आखे। छ लइबिस्याँ छार क्वे या टोयाइर छार क्वेए टालो थौनि क्वेदे आक्हि।

37 “छलेन सुज्यै भर्खर त्हाँबै अँगुरए खु ट्हुबिए स्योब नेंदोर आचों। चोंइ बिस्याँ अँगुरए खुइ ट्हुबिए स्योब नेंदों टोवाइर खु डेयाम्, चदक्या नेंदों या टोयाम्। 38 छतइर

भर्खर त्हाँबै अँगुरए खु ट्हुबिए भोंबै नेंदोर चोल् पर्दिम्।

39 “चिबै अँगुरए लिंबे खु थुँब्मैइ आचिबै अँगुरए खु थुँबै सैं आल। तलेबिस्याँ चिबै अँगुरए खु चइ लिन छोरम्।”

प्रिबै त्हिंइए बारैबै ताँ

6 तिरों प्रिबै त्हिंइर येशू ते थिए चेलामै 6 गहुँ बारिए क्योँ तइर यादिमाले चेलामैइ गहुँए नाँ थुइर योर नेइर चइ। 2 छले चब् प्रोंइर को-कोइ फरिसीमैइ बिइ, “प्रिबै त्हिंइर ता लल् आत चन् केमैइ तले लमुँ?”

3 येशूजी चमैदे बिइ, “केमैइ परमेश्वरए छ्वेर आखेइमुँ आ? त्हम्द दाऊद ते थिए थुमै फो ख्रमाले चइ ता ललो? 4 चइ परमेश्वरए मन्दिरर होंइर परमेश्वरए मिर थेंबै क्हाँ चइर आफैए थुमैलाज्यै या च क्हाँ चल् पिंइ। खो पिबै खेगिमैइ बाहेक अरू सुज्यै या च क्हाँ चल् आतमलो।”

5 दबै येशूजी चमैदे बिइ, “म्हिए च्ह प्रिबै त्हिंइबै क्ल्हे ग।”

येशूजी प्रिबै त्हिंइर यो कारयाबै म्हि फैल् लमिब

6 दबै अर्को प्रिबै त्हिंइरै या येशू च्हाँ तिर याइर लोमिबर होंइ। चर क्योलो यो कारयाबै म्हि क्रिहें मुँलो। 7 छतइर थीजी प्रिबै त्हिंइरै या च नबै म्हिलाइ फैल् लमिम् उ फैल् लस्याँ थिए फिर छ्याब् ल्हेदिल् योम् बिइर को-कोइ शास्त्रिमै ते फरिसीमैइ थिए छै लदिलो। 8 छैबिलेया येशूजी चमैए सैं न्होर्बै

ताँ क्होइर यो कारयाबै म्हिदे “रेइर चुर खो,” बिमाले च म्हि रेइर राइ।

⁹ चदक्या येशूजी फरिसीमैं ते शास्त्रिमैंदे बिइ, “केमैंदे बालो डइ ताँ क्रिहें डचोएम्! प्रिबै त्हिंइर छचाँबै के लब छचाँब उ आछचाँबै के लब छचाँब? म्हि जोगेब छचाँब उ सिल पिंब छचाँब?” ¹⁰ छ बिइर थीजी ताँइ म्हिमैं डाँइ च्योइर यो कारयाबै म्हिदे “क्योए यो स्योन्,” बिइ। च म्हिइ यो स्योमाले चए यो फैयाइ।

¹¹ छ लब म्गोइर फरिसीमैं ते शास्त्रिमैं बेल्ले सु खइर चुदे ता लले बिइर थेंमैं न्होर मत लबर होइ।

येशूजी च्युसे ड्ह्यौलो कुल्मिबै चेला चिबमैं त्हाँब

¹² च त्हेजरे येशू कोर याइर म्हुँइंभरि परमेश्वरदे प्राथना लइर म्हुँइंस थोइ। ¹³ मि म्गोल् खाँबै लिसों येशूजी चेलामैं आफैं डाँर उइर चमैं न्होबैं च्युसे ड्ह्यौलो कुल्मिबै चेला चिबमैं त्हाँइर चमैंए मि “कुल्मिबै चेला चिबमैं” बिबै मि थेंइ। ¹⁴ कुल्मिबै चेला चिबमैंए मि छले मुँ:

सिमोन (चए मिं येशूजी पत्रुस थेंइ)

चए अलि अन्द्रियास,

याकूब, यहन्ना,

फिलिप ते बारथोलोमाइ,

¹⁵ मत्ती, थोमा,

अल्फयसए चह याकूब ते सिमोन, (चदे

“आफैंए ह्युलदे माया लबै म्हि या” बिमलो)।

¹⁶ याकूबए चह यहूदा ते यहूदा

इस्करियोतथें (चु इस्करियोतथेंइ

लिसों धोका पिंइर येशू शत्रुमैंए योर पियाम्।

आशिक ते सराप

¹⁷ च लिसों थि कोंदक्या चेलामैंदे बालोन् क्योरो युइर चेप्ल तबै क्ल्ह्योर राइ। चर यहूदीया, यरूशलेम ते मा ड्युँइए रेजरेबै टुरोस ते सिदोन सहर खागुबै ह्युलदक्याले या लेंदै म्हि खलो। चर थिए अरू चेलामैं या मुँलो। चमैं येशूजी लोमिबै ताँ डेबर ते आफैंए नब-छब् फैल् लमिदिगे बिइर खलो। ¹⁸ च त्हेर्न मोमैंइ स्याबै म्हिमैं या येशूजी फैल् लमिइ। ¹⁹ ताँइ म्हिमैंइ येशू छुइल् म्हेमलो, तलेबिस्याँ येशूदक्याले शक्ति त्होदिलो। छतइर चमैं ताँइ फैल् लमलो।

येशूजी सुख ते दुःखए बारेर ताँ लब

²⁰ चदक्या येशूजी थिए चेलामैं डाँइ च्योइर बिइ,

“ओ आयों आख्युबमैं, केमैंइ आशिक योँबुँ

तलेबिस्याँ परमेश्वरए ग्याल्स केमैल क।

²¹ ओ तोगो फो खेंबमैं, केमैंइ आशिक योँबुँ

तलेबिस्याँ केमैंइ प्रेंन्ले चलु योँबुँ।

तोगो क्रोबमैंइ आशिक योँबुँ,

तलेबिस्याँ केमैं नेस्योल् योँबुँ।

²² “म्हिए चहए फिर केमैंइ बिश्वास लब्दक्या म्हिमैंइ हेल लइर थेंमैंदक्या स्यो लइर केमैं फिर आछचाँबै ताँमैं पोंइर केमैं

पह्लुं, धाएर दुष्ट म्हिमें दों झूँडर म्हि आचिहन् लब्मुं। छ ललेया केमैँड आशिक योँब्मुं।²³ च त्हेर केमैँ सेँ तोइर उफरदिद्, तलेबिस्याँ स्वर्गर केमैँए इनाम थेब तब्मुं। त्हेम्द चमैँए खेमैँज्यै या अगमबक्तामैँदे छैलि दुःख पिँलो।

²⁴ छैँबिलेया धिक्कार केमैँ तोगो प्लब्मैँ! सै न्होरए लिलि प्रब्मैँ केमैँड परमेश्वरए ग्याल्सर तोइ योँदिब् आरे।

तलेबिस्याँ केमैँड सुख योँल् खाँडमुं।

²⁵ धिक्कार, केमैँ तोगो ग्रें-ले चल् योँब्मैँ!

तलेबिस्याँ लिसों केमैँ फो खेँल् पर्दिब्मुं।

धिक्कार, केमैँ तोगो नेस्योब्मैँ!

तलेबिस्याँ लिसों केमैँ शोक लइर क्रोल् पर्दिब्मुं।

²⁶ धिक्कार, तोगो म्हिमैँड स्वाब म्हि बिइर थेब् लब्मैँ! तलेबिस्याँ चमैँए खेमैँज्यैया

स्योर ताँ पोँबै अगमबक्तामैँ स्वाब म्हि बिइर थेब् लमलो।^a

येशूजी शत्रुमैँलाज्यै या माया लद् बिब

²⁷ “छतइर डए ताँ डेब्मैँदे ड बिमुं, आफैँए शत्रुमैँलाज्यै या माया लद्, केमैँ हेल लब्मैँलाज्यै छ्याँब लद्।²⁸ केमैँए फिर सराप पिँब्मैँलाज्यै आशिक पिँन्, केमैँए फिर गाल् केब्मैँए लागि परमेश्वरदे क्षमा ह्छिइर प्राथना लमिन्।²⁹ सुज्यै क्योँए क्हाँबोर ल्हिस्याँ अर्को क्हाँबो या तोमिन्, छलेन सुज्यै क्योँए बक्खु प्हेँयास्याँ हेंगै या बोल्

पिँन्।³⁰ क्योँदे बालो ह्छिब्मैँदे पिँन्, क्योँए मालमैँ बोयाब्मैँदे दबै आहिद्।

³¹ “म्हिमैँड आफैँदे छ्याँब लदिगे झूँस्याँ केमैँज्यै या चमैँदे छ्याँबन् लद्।³² आफैँदे माया लब्मैँदे मत्रे माया लइ बिस्याँ केमैँदे तो फायदा तइ? तलेबिस्याँ पापिमैँज्यै या आफैँदे माया लब्मैँदे मत्रे माया लम्।³³ आफैँदे छ्याँब लब्मैँदे मत्रे छ्याँब लइ बिस्याँ, केमैँदे तो फायद तइ? तलेबिस्याँ पापिमैँज्यै या छैलि लम्।³⁴ फोल् खाँबै म्हिमैँदे मत्रे छे पिँड बिस्याँ, केमैँड तो इनाम योँम् रो? तलेबिस्याँ पापिमैँज्यै छे फोल् खाँबै पापिमैँ छे पिँम्।³⁵ छले आडिँ, आफैँए शत्रुमैँलाज्यै या माया लद्, चमैँए फिर ल्हय खद्, फोल् आखाँबै म्हिमैँलाज्यै या छे पिँन्। छलस्याँ परमेश्वरदक्याले केमैँड थेबे इनाम योँडर केमैँ ताँड बन्दा थेबे परमेश्वरए च्ह-चमि ठर्दिब्मुं, तलेबिस्याँ परमेश्वरजी बैगुनिमैँ ते दुष्टमैँए फिर ल्हय खम्।³⁶ केमैँए परमेश्वर आबाजी ताँनए फिर ल्हय खब् दोँले क्हेमैँज्यै या ताँनए फिर ल्हय खद्।

येशूजी आउए फिर छ्याब् आल्हैदिद् बिब

³⁷ “आउए फिर छ्याब् आल्हैदिद्, आउने चम् आछ्याँबै के लबै म्हि क आबिद्। छलस्याँ परमेश्वरज्यै या केमैँए फिर छ्याब् ल्हैदिब् आरे। अरू क्षमा पिँन्, परमेश्वरज्यै या केमैँ क्षमा पिँब्मुं।³⁸ आफैँदे मुँबै मालमैँ अरूलाज्यै या पिँन् छलस्याँ खाँदि-खाँदिइर, म्युरुरुले डेयाल्ले परमेश्वरजी भन् लेदै मालमैँ केमैँ पिँब्मुं। केमैँड खैले क्हाँएँडर पिँम्, छलेन परमेश्वरजी क्हेमैँलाज्यै या क्हाँएँडर पिँब्मुं।”

^a ६:२६ मतलब, म्हिमैँद क्या मान योँब आडिँ परमेश्वरद क्या मान योँल् पर्दिम्।

39 येशूजी चमैदे अहान् क्रिहें बिइ, “कन क्रिहेंड अर्को कन डोरेल् खांम् आ? कनइ कन डोरेस्यां ड्ह्यौलोन् हौल्दोर आपाय? 40 चेला आफैए गुरु बन्दा थेबले आत, छैबिलेया गुरुइ लोमिबै तामें हल् खांबै लिसों मत्रे च गुरु दोब तल् खांम्।

41 “क्योइ आफैए अलिऐ मिबै कसिं प्रोम्, छैबिलेया आफैए मिबै म्हुंड बिस्यां तले आम्रो? 42 क्योइ आफैए मिबै म्हुंड आम्रोस्यां, आफैए अलिदे ‘ओ अलि क्योए मिर कसिं मुंमै तेमिले ओ,’ बिइर क्योइ खैले बिल् खांम्? ओ फिब्लो पार्दिबमै! नसों आफैए मिबै म्हुंड तेद्, बल्ल आफैए अलिऐ मिबै कसिं तेबर क्योइ छेनाले प्रोल् खांम्।

छचांब ते आछचांबै रोमैं

43 “छचांबै सिं दुंर न्होयाबै रो आरो। छलेन आछचांबै सिं दुंर छचांबै रो आरो। 44 सिं दुंर खैलि मुं, रोए छैलिन् तम्। रो प्रोइर सिं दुंर खैलि मुंमै बिब था सेम्। पुजुए दुंदक्या म्हिमैड तुंबुए रो थुल् आखां, छलेन पुलुए दुंदक्या पलां थुल् आखां। 45 छचांबै सैं प्याबै म्हिइ आफैए सैर मुंबै छचांबै सैंदक्या छचांबै तामें पोम्, आछचांबै सैं प्याबै म्हिइ आफैए सैर मुंबै आछचांबै सैंदक्या आछचांबै तामें पोम्। तलेबिस्यां सैर ता मुं चन् म्हिए सुंदक्या तहोम्।”

तिं बनेबै म्हि ड्ह्यौलो

46 येशूजी दबै अर्को तां बिइ, “डइ बिबै तां आडिस्यां केमैड तले डदे ‘ओ प्रभु, प्रभु’ बिम्? 47 सु म्हि ड डार खइर डइ बिबै तां

थेइर डइ खै बिम् छैलि लम्, च म्हि खैबै तम् बिइर ड केमैड बिम्। 48 च म्हि तिं बनेबै म्हि दों तब् ग। च म्हिइ गैरु जग ताइर पारए फिर जग चोइ। चदक्या नां बाडि तइर थेबै प्हेले च तिंए फिर उंयालेया च तिं तोइ आत, तलेबिस्यां चइ पोन्ले तिं बनेलो। 49 छैबिलेया सुइ डए तां थैलेया डइ बिब् दों आल, च म्हि अर्को तिं बनेबै म्हि दों तब् क। च म्हिइ गैरु जग आतल्ले सए फिर तिं बनेइ। च तिंए फिर प्हेले युमाले युनन् फुयाम्। चदक्या चल थेबै नोक्सन् तयाम्।”

येशूजी रोमी कप्तानए के लबै म्हि फैल् लमिंब

7 छले थीजी बिल् पर्दिबै तामें तांइ बिल् खांबै लिसों येशू कफर्नहुम बिबै नांसर याइ। 2 च नांसर रोमी कप्तानइ बेल्ले खोबै के लबै म्हि क्रिहें नइर सिबि छेलो। 3 च कप्तानइ येशूए बारेबै तां थेलो। छतइर थिए के लबै म्हि फैल् लमिदिगे बिइर यहूदीमैए चिबनांभै येशू डार यो छयुं लबर कुलइ।

4 चमै येशू डार खइर यो छयुं लदै बिइ, “ओ गुरु, कप्तानए के लबै म्हि बेल्ले नइर सिबर होंडम्, छतइर चलाइ फैल् लमिदिगे बिइर क्योदे यो छयुं लबर थिइ डि चुर कुलब् ग। थि क्योइ ल्हय लबै लायकबै मुं। 5 तलेबिस्यां च ड्यो यहूदीमैलाज्यै या माया लबै म्हि ग, ड्योए च्हों तिं चजिन् बनेमिब् क।”

6 चमैए तां थेइर येशू चमैदे याइ। कप्तानए तिर फेखबि लमले च कप्तानइ थिए थुमै येशू डार छ बिबर कुलइ: “ओ प्रभु, क्यो दुःख आयोदिद् तलेबिस्यां क्यो डए तिर खइर टिबै लायकबै ड आरे। 7 डै या क्योए डार खबै लायकबै आरे। बरु क्योजी सुंइ मत्रे पोमिलै

या डए के लबै म्हि फैयाब्मुं।⁸ डज्यै या थेबै म्हिमैदक्या हुकुम योंडर डए न्होबै सिपाइमैदे हुकुम पिंम। डइ क्रिहेदे 'याद्' बिस्यां च याम्, अर्कोदे 'खो' बिस्यां च खम् डए के लबै म्हिदे या 'डइ तो लद्' बिमुं चइ चन् लम्।"⁹

⁹ चु ताँ थैडर येशू प्लेटोयाइर आफैए लिलि खबै हुल डाँड तोइर बिइ, "ड केमैदे बिमुं, जगो थेबै बिश्वास लबै म्हि डइ तोगो समा खैमैड आम्रोलो। छैलि बिश्वास इस्राएली म्हिमैदे या आरे।"¹⁰ चदक्या कप्तानइ कुल्मिंबै म्हिमै चए तिर तायाइ चमै तिर फेनेमाले नबै म्हि फैयाब् म्रोंड।

येशूजी सियाबै कोलो सोगों लमिंब

¹¹ न्हांग येशू नाइन बिबै नाँसर यामाले थिए चेलामै ते म्हिए हुलै या थीदे बालोन् यालो।¹² नाँसर फेखबि छेमाले ल्हें म्हिमै सियाबै कोलो सबर यासिन् मुँलो। च कोलोए आमाल च च्ह क्रिहें मुँलो, चए बा या नसोन् सिल् खाँलो।¹³ च कोलोए आमा म्रोंडर येशूए सैर बेल्ले ल्हय खइर चदे "आक्रोद्," बिइ।¹⁴ थीजी च कोलो नोबै खाट छुडब्दक्या कोलो नोबमै रायाइ। येशूजी च सियाबै कोलोदे बिइ, "ओ बाबु, डइ कयोदे बिमुं, 'रेद्!'"¹⁵ येशूजी छबिमाले सियाबै कोलो सोगों तइर कुँडर पोंबर होइ। चदक्या येशूजी कोलो चए आमामे पिंइ।¹⁶ छैलि के म्रोंडर ताँड म्हिमै बेल्ले फाङ्गियाइर "परमेश्वर बेल्ले थेब ते छचाँब् मुंमै! डचोए माजोर थेबै अगमबक्ता युड्मुं! थि आफैए म्हिमै जोगेमिबर युड्मुं," बिइ।¹⁷ येशूजी छले कोलो सोगों लमिंबै ताँ यहूदीया ते च खागुबै ह्युल भरिन् थेनेइ।

बप्तिस्मा पिंबै यूहन्नाइ कुल्मिंबै म्हिमै

¹⁸ च त्हेर क्युर प्लुइर बप्तिस्मा पिंबै यूहन्ना भेलर मुँलो। छतइर थिए चेलामै भेलर खइर येशूजी लबै ताँड केमै यूहन्नादे बिइ।¹⁹ चु ताँ थैडर यूहन्नाइ आफैए चेलामै न्होबै ड्ह्यौलो म्हि प्रभु येशू डाँर चु ताँ डचोएबर कुलइ, "युल् पर्दिबै मुँ स्त्रीष्ट कयो उ? डिइ अर्को म्हिए कयो च्योल् पर्दिब् जा?"²⁰ चेलामै येशू डाँर खइर बिइ, "क्युर प्लुइर बप्तिस्मा पिंबै यूहन्नाइ कयो डाँर चु ताँ डचोएबर डि कुलइमुं, 'युल् पर्दिबै म्हि कयो उ, डिइ अर्को म्हिए कयो च्योले?'" (चेलामै येशू डाँर खइर "युम् बिबै म्हु स्त्रीष्ट कयो उ डिइ अर्को म्हिए कयो च्योल् पर्दिब् जा? बिइर क्युर प्लुइर बप्तिस्मा पिंबै यूहन्नाइ कयो डाँर चु ताँ डचोएबर डि कुलइमुं," बिइ।)²¹ च त्हेर्न येशूजी ल्हें म्हिमैए नब-छब ते मोमैड स्याबै म्हिमै फैल् लमिंडर, लेदै कनमैलाज्यै या मि प्रोंल लमिंलो।²² चदक्या येशूजी चमैदे बिइ, "केमैड चुर तोगो ता-ता म्रोंड ता-ता थैड च ताँड यूहन्ना डाँर याइर बिमिन्। कनमैड दबै म्रोंड्मुं, डुँड्मुं प्रड्मुं, कोर खब्मै फैड्मुं, न्हउसिमैड न्हपे थैड्मुं, सियाबमै या सोगों तड्मुं, झूँड्मुंमैलाज्यै या सै तोंबै ताँ बिमिंड्मुं बिद्।"²³ चु ताँ या बिद्, सुइ संका आलल्ले डए ताँ पतेमुं, चए फिर परमेश्वरजी आशिक पिंम्मुं।"

²⁴ यूहन्नाइ कुल्मिंबै चेलामै तायाबै लिसों येशूजी यूहन्नाए बारेर म्हिए हुलदे बिइ, "केमै क्यु आयोंबै कल्ह्योर तो च्योबर यालो? खैड लाबै म्वो दुँ च्योबर याल् आ?"²⁵ केमै तो च्योबर यालो? छचाँबै कवे खेबै म्हि च्योबर याल् आ? छचाँबै कवे खेइर सब्-सब् चबै

⁸ ७:८ मतलब, येशूजी परमेश्वरद कया थेबै हक योंबद कया थीजी तो पोंमुं छैलि तम्।

म्हिमें भ्रुँए दरबारर टिम्।²⁶ बित्ति! केमैं तो च्योबर यालो? अगमबक्ता च्योबर याल् आ? ड केमैदे बिम्, अगमबक्ता बन्दा थेबे म्हि क्रिहें केमैड प्रोड्मुं! ²⁷ परमेश्वरए छ्वेर यूहन्नाए बारेर छले प्हिड्मुं:

‘च्योद्! क्योए क्यॉ तयार लमिदिगे बिडर क्यॉ बन्दा नसों^a डए स्यारबो डइ कुल्मिम्।’

²⁸ ड केमैदे बिम्, चमिरिदक्याले फिब्मैं न्होरि यूहन्ना बन्दा थेबे म्हि सुड आरे, छैबिलेया सुड डइ लबै के प्रोडर डइ बिबै ताँ थेडर डइ बिब् दोले परमेश्वर मादिम्, च म्हि च्योब मुंलेया यूहन्ना बन्दा थेब तम्।”^b

²⁹ चु ताँ थेडर ताँड म्हिमें ते बालि रेब्मैज्यै या परमेश्वरए होलिन्बै ताँ पतेड। तलेबिस्याँ चमैड यूहन्नादक्याले क्युर प्लुँडर बप्तिस्मा किलो। ³⁰ छैबिलेया फरिसीमें ते परमेश्वरए छ्वे लोमिब्मैड बिस्याँ परमेश्वरजी आफैं डारं खबै लागि र बनेबै क्यॉ केर आफेब् झूँडर यूहन्नादक्याले क्युर प्लुँडर बप्तिस्मा आकिलो।

³¹ दबै येशूजी बिड, “तिन्हाबै म्हिमें डइ तो सैदे चहैले? चमैं तो दाँब मुँ? ³² चमैं बजारर कुँदिबै कोलोमें दाँ तब मुँ, चमैड थैमैए न्होर्न क्रिड-क्रिदे छ बिदे हौदिम्।

‘डिड केमैए लागि र मुरालि हामिँड, छैबिलेया केमैं आसे।

डि क्रोमाले केमैं आक्रो।’

³³ बप्तिस्मा पिबै यूहन्ना युड, चड कहेँ आचमलो पा या आथुँमलो। छैबिलेया केमैड चलाड ‘मोँड स्याड्मुँ’ बिमलो। ³⁴ परमेश्वरजी कुल्मिंबै म्हिए चह चु ह्युलर

युडर चमाले, थुँमाले ‘चुम् चप्ला पाको बालि रेब्मैं ते पापिमैए थु मुँमैं,’ बिडर केमैड बिम्। ³⁵ छैबिलेया बुद्धि ठिक क बिबै ताँ बुद्धिए लिलि प्रब्मैड मत्त्रे बुद्धि ठिक क बिडर ठर्दिल् खाम्।”

येशजी पापि चमिरि क्षमा पिंब

³⁶ तिगैं फरिसी क्रिहेंड येशू चब् चबर निम्तो ललो। छतडर थि चए तिर याडर चबर टिड। ³⁷ च सहरर आछ्याँबै छह थोबै पापि चमिरि क्रिहें मुँलो। येशू च फरिसीए तिर मुँ बिब् थेडर सै लेदै फेबै अत्तर पुरुर चोँडर च चमिरि चर खड। ³⁸ चदक्या येशूए लिसोँदक्या खडर थिए प्हेले डारं राडर क्रो-क्रोड चए मिग्लिड येशूए प्हेले प्हाँबर होँड, धाडर च्हि तुँडर आफैंए क्रप्होड थिए प्हेले पयोमलो। येशूए प्हेलेर म्वें लदै चड छ्याँबै थाँ खबै अत्तर फोमिमलो।

³⁹ छ लब् प्रोँडर येशू निम्तो लबै फरिसीड सैं न्हो-न्हो “चु म्हि होलिन् अगमबक्ता डिब् कबिस्याँ थीदे छुड्बै चमिरि खैतबै म्हि जा बिडर चुड सेमलो। चु पापि चमिरि क!” बिबर होँड।

⁴⁰ येशूजी फरिसीए सैबैं ताँ सेडर “ओ सिमोन क्योँदे ताँ क्रिहें बिल् पर्दिड्मुँ,” बिड। सिमोनड बिड, “तो ताँ मुँ गुरु? बिद्।”

⁴¹ येशूजी चदे बिड, “प्लबै म्हि क्रिहेल छे बोबै असामि ड्ह्यौलो मुँलो। चमैड क्रिहेँदे हजार ड्हौलो अर्कोदे ड्हच्यु हजार मुड किँल् पर्दिमलो। ⁴² च ड्ह्यौलोड च छे फोल्

^a 7:27 क्योँ बन्दा नसों बिबे अर्थ, परमेश्वरजी कुल्मिंबे मुँ बन्दा नसों। ^b ७:२८ सुड डइ लबै के प्रोडर डइ बिबे ताँ थैसि डइ बिब् दोले परमेश्वर मादिम्, च म्हि च्योब मुंलेया यूहन्ना बन्दा थेब तम् प्रिक क्युडरि, परमेश्वरए ग्याल्सर मुँबे ताँड बन्दा च्योबै म्हि यूहन्ना बन्दा थेब तम्।

आखाँबदे प्लबै म्हिइ चमैं ड्ह्यौलोए छे माफ लमिंइ। छतइर लु बिति! तारे चमैं ड्ह्यौलोए न्होरि सुइ च म्हिदे लेदै माया लले?”

43 सिमोनइ बिइ, “उए सैर, छे लेदै माफ योबै म्हिइ लेदै माया ललै।”

येशूजी चदे बिइ, “क्योइ ठिक ताँ मैन्।” 44 चदक्या येशूजी च चमिरि डाँइ तोइर सिमोनदे बिइ, “चु चमिरि म्रोंइमुँ आ? ड क्योए तिर खमाले क्योइ प्हेले खुबै क्यु या आपि, छैबिलेया चुइ थिए मिल्गिइ डए प्हेले खुमिंइर क्रप्होइ फ्योमिंइ। 45 क्योइ ड म्वेँ आल, छैबिलेया ड चु तिर होंबदक्या चुइ डए प्हेले म्वेँ लब आपिइमुँ। 46 क्योइ डए क्रर छचुगु आफोमिं, छैबिलेया चुइ डए प्हेलेरै या सै ल फेबै अत्तर फोमिंइमुँ। 47 छतइर ड क्योदे बिमुँ, चुइ ड लेदै माया लइमुँ। छतइर चुए पाप लेदै मुँलेया क्षमा तइमुँ, छैबिलेया च्युगुदे पाप माफ योबै म्हिइ डदे च्युगुदे माया लमुँ।”

48 चदक्या येशूजी च चहमिरिदे “क्योए पाप क्षमा तयाइमुँ,” बिइ। 49 चु ताँ थैइर अरू चब् चबर टिबैइ, “पाप क्षमा पिंब चु सु जा?” बिइर थें-थेमैन् बिबर होंइ। 50 छैबिलेया येशूजी च चहमिरिदे बिइ, “क्योए बिश्वासइ लमाले क्यो जोगेइमुँ, छिं झूँइर याद।”

येशूए सेवा लबै चमिरिमें

8 च लिसों येशू सहर-सहर, नाँस-नाँसर स्युरइर परमेश्वरए ग्याल्सबै सैं ताँबै ताँ बिबदै प्रइ। थीदे बालो च्युसे ड्ह्यौलो चेलामें या मुँलो। 2 अरू लेदै चमिरिमें या थीदे बालो मुँलो। च चमिरिमें मोंइ स्याइर फैबै ते अरू नब छब्दक्या फैबै मुँलो। चमैं न्होरि मरियम बिबै मगदालाथेंस्यो मुँलो। च मरियमदक्याले

येशूजी मों डिउँलो ल्हालो। 3 चमैं न्होरि योअन्ना बिबै चमिरि क्रिहें मुँलो। च खुजास बिबै म्हिए प्हेस्यो मुँलो। च खुजास हेरोद म्रुँए दरबार क्रथे तइर के लमलो। चदक्या अर्को सुसन्ना बिबै चमिरि मुँलो। चमैं ते अरू ल्हे चमिरिमैज्यै या आफैँए मुइ खर्ज लइर थिए सेवा लमलो।

प्लु प्लुबै म्हिए अहान्

4 नाँस-नाँसदक्याले म्हिए हुल खागु तइर थि डाँर खइ। चदक्या थीजी चमैदे चु अहान् क्रिहें बिइ। 5 “तिगैं म्हि क्रिहें प्लु प्लुबर यालो। प्लु प्लुमाले कोइ प्लु क्यार तेइ, कोइ प्लु गेगरर तेइ, कोइ प्लु पुचु मुँबै क्ल्ह्योर तेइ, कोइ प्लु छचाँबै स मुँबै क्ल्ह्योर तेइ। क्यार तेबै प्लुमैँ म्हिमैँइ प्लेवाइ, नमेमैँ खइर चइ। 6 गेगरर तेबै प्लुमैँ म्लोखलेया युनन् सियाइ तलेबिस्याँ चबै स कारयालो। 7 छलेन पुचु मुँबै क्ल्ह्योर तेबै प्लु म्लोखलेया पुचुए छचारइ च प्लु बडिल् आपिं। 8 छचाँबै सर तेबै प्लु बिस्याँ छेनाले म्लोखइ। धाइर च प्लु थैब तइर लेदै रो रोइ।”

जगो बिल् खाँइर येशूजी थैबै कैले बिइ, “डेंबै न्ह मुँबैँइ थैदिगे।”

अहान् चाँबै कारण

9 थीजी बिबै ताँ चेलामैँइ छेनाले आकहोइर चु अहानइ बिल् म्हैब तो जा बिइर येशूदे ड्योएइ।

10 येशूजी चमैदे बिइ, “परमेश्वरए ग्याल्सबै थैब थैबै ताँमैँ क्होबै ज्ञान केमैदे

पिंइमुं। छैंबिलेया अरूमैदे बिस्याँ ड
अहानदक्या पोंबुं, तलेबिस्याँ परमेश्वरए
छ्वेर प्हिब् दोले:

‘चमैइ च्योलेया आम्रोदिगे,
थेलेया आकहोदिगे।’”

प्लु प्लुबै अहान् कहोमिंब

11 येशूजी चमैदे बिइ, “अहानए अर्थ चु कः
प्लु बिब परमेश्वरए ताँ क। 12 क्यारं तेबै
प्लु चुन् गः परमेश्वरए ताँ डेबमैइ आकवेदिगे
धाइर चमै जोगेल् आयोदिगे बिइर दुष्ट
खइर^a चमैइ थेबै ताँ ताँइ युनन् म्लेयाल्
लम् धाइर पतेल् आपिं। 13 चदक्या गेगरर
तेबै प्लु चुन् कः सुइ परमेश्वरए ताँ डेइर
सैं तोइर पतेम्। छैंबिलेया चमैए जर आत।
छतइर चमैइ तिस्याँदे मत्रे च ताँ पतेम्,
तलेबिस्याँ आफैए फिर दुःखमै तमाले बिब
दों आतमाले चमैइ पियाम्। 14 छलेन पुचु मुँबै
क्ल्टयोर तेबै प्लु चुन् कः सुइ परमेश्वरए
ताँ डेंमुं। छैंबिलेया लिसों चु छह खैले थोब
इहे बिइर न्हँ लमुं धाइर सैं न्होर खैले योब
इहे बिइर ह्युलबै मालर सैं याइर चमैए
बिश्वास म्हयाम्। छतइर चमै पोंबले आत।
15 छैंबिलेया छचाँबै सर तेबै प्लु चुन् कः
सुइ परमेश्वरए ताँ डेंइर छेनाले खोर थेंमुं।

धाइर चए फिर तोइ तखलेया सैदिइर लेदै रोमैं
रोम्।”

बत्तिए बारेबै ताँ

16 येशूजी दबै बिइ, “सुज्यै बत्ति प्रोइर
भाँडोइ आहुथें, खाट न्होरै या आथें। बरु
तिं न्होर खबमैइ मि प्रोदिगे बिइर बत्ति नुबै
क्ल्टयोर थेंम्।^b 17 तो माल या लोइर थेंल्
आँखाँ, लोइर आम्रोबै माल ताइ आरे। छलेन
लोथेंबै ताँमैं ता मुँलेया लिसों खन्तोदोन्
थेनेइर ताँनइ था सेम्।

18 “छतइर न्ह क्रों मि क्रों तद्, केमैइ
डेंबै ताँ छेनाले सैं थेंन्। तलेबिस्याँ डइ
लोमिंबै ताँ छेनाले डेंबमैइ भन् कहोल् योंबुं,
डए ताँ आडेंबमैइ कहोइ बिइर हब् प्हेलेया
चमैदाक्या प्हेयाबुं।”^c

येशूए आमा ते अलिमैं

19 तिमैं येशूए आमा ते अलिमैं येशूदे त्होबर
खइ। छैंबिलेया म्हि हुलइ लमाले चमैइ येशूदे
त्होल् आयोलो। 20 छतइर म्हि क्रिहेंइ येशूदे
बिइ, “क्योए आमा ते अलिमैं क्योदे त्होबै सैं
लइर बैरु रादिइमुं।”

^a ८:१२ दुष्ट बिबै माल खसि ग्रिक क्युइर दियाबलसए अर्थ स्योर्गु ग। ^b ८:१६ चु अहानए मतलबः येशूजी बिबै ताँ लोथेंल् आत। ^c ८:१८ तलेबिस्याँ... प्हेवाबुं ग्रिक क्युइर, तलेबिस्याँ सुदे मुं चलाइ भन् ल्हें पिंबुं। चदक्या सुदे आरे, चदे तो मुं बिसि चइ मैमुं, चै या च दा क्या प्हेवाबुं

21 छबिमाले येशूजी चमैदे बिइ, “सुइ परमेश्वरजी बिबै तां थेइर थीजी बिब् दोले लमुं, चमैन् डए आमा अलिमै क।”

येशूजी थेबै नां खैं च्यां लमिंब

22 तिगैं येशू आफैए चेलांमैदे डुंझार क्रेइर “तारे, डचो तालए कयांजा याले ओ,” बिइर याइ। 23 छले यादिमाले येशू न्हरु चहुइयाइ। तालर थेबै नां खैं खइर डुंझार क्यु प्लिंबर होंइ। छतइर चमैं बेल्ले आतिदिइ।

24 चदक्या चेलांमैं येशू डारं खइर “ओ गुरु, डचोम् क्युर प्लुइर सिबर होंइ,” बिब्दै थी छोरइ।

छबिमाले येशू रेइर नां खैं ते क्युए भेल हौदिइ। छले हौदिमाले नां खैं ते क्युए भेल च्यां तयाइ। 25 चदक्या येशूजी थिए चेलांमैदे बिइ, “केमैए बिश्वास खन याइ?”

चमैं फाङ्गिसि प्लेटोयाइ धाइर थेंमैं थेंमैं न्होर “चु म्हि सु मुंगे? नां खैं ते क्युए भेललाज्यै या थीजी च्यां तयाद् बिमाले चमैंज्यै या थीजी बिब डिंब!” बिबर होंइ।

येशूजी मोंइ स्याबै म्हि फैल् लमिंब

26 येशू ते थिए चेलांमैं गालीलए कयांजा गेरासेनस ह्युलर फेखइ। 27 चदक्या येशू डुंझादक्याले पखर त्होमाले मोंइ स्याबै नांसबैं म्हि क्रिहें येशूदे त्होइ। च म्हिइ लेदै उँइसोदक्या क्वें आखेमलो धाइर तिरै या आटिमलो छगोंजरे टिमलो। 28 चइ येशू प्रोंबै बितिकन् चिरदै थिए उँइर पदखु तइर थेबै कैले बिइ, “ओ ताँइ बन्दा थेबै परमेश्वरए

चह येशू, कयोंल डदे ता के मुं? यो छयुं लमुं, ड दुःख आपिन्।”

29 तलेबिस्यां येशूजी च म्हिदक्या मों त्होंइर याद् बिलो। च म्हिलाइ लेदै खे मोंइ दुःख पिंबले लमालो। छतइर च सँउँलिइ फेइर म्हिमैइ रूंमलो। छैबिलेया चइ थी फैथेबै सँउँलि छयाँन् छिन् लइर टोंवामलो। धाइर मोंइ क्यु आयोंबै कल्ह्योजरे च बोयामलो।

30 येशूजी चदे “क्योंए मिं तो जा?” बिइर डचोएमाले

चइ बिइ, “डए मिं फौज क।” तलेबिस्यां लेदै मोंमैइ च स्यालो।

31 “डि सजैं पिंबर क्रोर आल्हाद्,” बिइर मोंमैइ येशूदे यो छयुं लइ। 32 चेंदोबैं कोर तिलिए बगाल रेंदिलो। धाइर चमैइ तिलिमैए न्होर होंल् पिन् बिइर यो छयुं लमाले येशूजी च मोंमैं याल् पिंइ। 33 चदक्या मोंमैं च म्हिदक्या त्होंइर तिलिमैए न्होर होंयाइ। छतइर तिलिमैं सोबल तइर कोंदक्या मा डचुंइर तेयाइर सियाइ।

34 छ तब् प्रोंइर च तिलि छबै म्हिमैं न्हेयाइर च तांमैं सहर ते नांसजरे बिमिंइ। 35 चमैए तां थेइर “तो तगे” बिइर च्योबर म्हिमैं येशू डारं खमाले नसों मोंइ स्याइर सोबल् तबै म्हि सैं चिइर क्वें खेइर येशूए प्हले डारं टिदिब चमैइ प्रोंइ। छैलि प्रोंइर चमैं फाङ्गियाइ। 36 च मोंइ स्याबै म्हि खैले फैइ बिइर प्रोंबैमैइ च्योबर खबैमैदे बिमिंइ। 37 छतइर गेरासेनस ह्युलबैं म्हिमैइ येशू थेंमैए नांसदक्या यामिन् बिइर यो छयुं लइ, तलेबिस्यां चमैं बेल्ले फाङ्गियाँलो। छबिमाले येशू डुंझार क्रेइर याब्लि छेमाले।

38 मोंइ स्याइर च फैयाबै म्हिइ येशूदे “ओ प्रभु डै या क्योदे बालो याल् पिन् बिइर यो छयुं लबर होंइ।”

छैंबिलेया येशूजी चदे बिइ, ³⁹“क्यों आफैए तिर तायाइर परमेश्वरजी क्योंए लागिर लमिंबै जगो थेबै के अरूमैदे बिइ।”

छबिमाले च म्हि याइर येशूजी थिए लागिर लमिंबै थेबै के ताँइ नाँसजरे बिबर होंइ।

याइरसए चमि ते को त्हबै चमिरि

⁴⁰येशू ताल क्याँजदक्या ताखमाले म्हि हुलइ थी बेल्ले मान लइ, तलेबिस्याँ चमै तानइ येशू खोंयोँ खब् ड्हे बिइर हेदिलो। ⁴¹च त्हेर्न च्हों तिंबै याइरस बिबै चिब क्रिहें येशू डारं खइर स्यो लइर चए तिर खमिन् बिइर थीदे यो छयुँ लइ। ⁴²तलेबिस्याँ चल च्युसे ड्हिदिंबै घिदे मुँबै चमि सिबि छेलो। चए फिर ल्हय खइर येशू चदे बालो याइ। छले यादिमाले म्हिए हुल कारग्यु तखइर बेल्ले घच्याट तलो। ⁴³च हुल न्होरि च्युसे ड्हिदिं समा को त्हबै बेथाइ दुःख योबै चमिरि क्रिहें मुँलो। चइ थिए बेथा सबर ल्हें म्हिमैदे इह्योब्-लिब लइर आफैदे मुँबै ताँइ मुइ खर्ज लल् खाँलो। छैंबिलेया सुज्यै या फैल् लल् आखाँलो। ⁴⁴च चमिरिइ येशूए लिसोंदक्या खइर येशूए क्वेए डोर छुइबै बितिकन् चए को त्हब टियाइ।

⁴⁵च त्हेर्न येशूजी “ड सुइ छुइ?” बिमाले चबै ताँइ म्हिमैदे “डिइ आछुइ,” बिइ। छैंबिलेया पत्रुस ते चमैदे मुँबैइ बिइ, “ओ गुरु, क्योंए कारग्युले म्हिए हुल घचेत तदिइमुँ।”

⁴⁶छैंबिलेया येशूजी बिइ, “म्हि क्रिहेंड ड छुइबन् क। तलेबिस्याँ ड दक्या शक्ति त्हांयाब डइ सेलो।”

⁴⁷जगो तब्दक्या तारे लोइ टिदिब आत बिब सेइर च चमिरि फाड्ङ्ङर त्हारदै थिए

नसों पत्खु तइ। चइ येशू तले छुइ, धाइर छुइबै बितिकन् थि खैले सइ बिबै ताँइ ताँ म्हिमैए उँइर बिइ।

⁴⁸येशूजी च चमिरिदे बिइ, “ओ चमि, क्योंए बिश्वासइ लमाले क्यों सयाइमुँ, छतइर छिं ड्ङ्ङर याइ।”

⁴⁹येशू च चमिरिदे पोंदिमाले च्हों तिंबै चिबए तिंदक्या म्हि क्रिहें खइर याइरसदे बिइ, “क्योंए चमि सिल् खाँइ। तारे गुरु दुःख आपिन्।”

⁵⁰चु ताँ थैइर येशूजी याइरसदे बिइ, “फाआड्ङ्ङन्! डए ताँ पतेइ! क्योंए चमि सोब्मुँ।”

⁵¹चदक्या याइरसए तिर फेनेइर येशूजी पत्रुस, याकूब, यूहन्ना ते चमिरि कोलोए बा-आमा बाहेक अरू सुलाज्यै या थीदे बालु तिं न्होर होल् आपिं। ⁵²चर ताँइ म्हिमै क्रोदिलो। चदक्या येशूजी चमैदे “आक्रोद्, कोलो आसिइमुँ, न्हरु च्हुइदिइमुँ,” बिइ। ⁵³च कोलो सियाल् खाँइ बिब सेइर चमैइ येशू प्हबर होंइ। तलेबिस्याँ च कोलो होलिन् सियाल् खाँलो।

⁵⁴छैंबिलेया येशूजी च चमिरि कोलोए योर क्हाइर “ओ चमि रेद्,” बिमाले ⁵⁵च चमिरि कोलो सोइर युन्ले रेइ। धाइर येशूजी “चु कोलो चबै मालमै पिन्” बिइर ल्हैदिइ। ⁵⁶छैलि प्रोंइर कोलोए बा-आमा प्लेटोयाइ। छैंबिलेया “चुर तबै ताँ सुलाज्यै या आबिद् ओ बिइर येशूजी चमैदे,” बिइ।

येशूजी च्युसे इह्यौलो चेला चिबमै कुलब

9 च लिसों येशूजी आफैए च्युसे इह्यौलो चेलामै उइर चमैदे मों ल्हाल् खाँब ते नब छबमै फैल् लल् खाँबै शक्ति ते अधिकार

पिंइ।² चदक्या “परमेश्वरए ग्याल्सए^a बारेर बिब्दै नब् छब्मै फैल् लद्।³ केमै यामाले प्हरे, भोला, चबै माल, मुइ, फेर्दिबै क्वेमें ताइ आबोद्।⁴ केमै सुए तिंर होमुं चर टिद्, धाइर च तिंदक्या ताखो।⁵ सु नांसर केमैए मान आल, टिल् आपिं, चमैए नांसदक्या त्होमाले ग्वाइए लागिंर आफैए प्हलेर झूंबै त्हूल चमैए उँडैर खारथेन्।”⁶ थीजी बिब् दौले चेलामें नांस-नांसर याइर खन्तोदोन् परमेश्वरदक्याले खबै सैं तोंबै ताँ बिब्दै नब् छब्मै फैल् लमिंदै प्रइ।

हेरोद मुँ अलमल्ल तब

⁷ येशूजी लबै केमैए बारेर थैइर गालील ह्युलबै हेरोद मुँ अलमल्ल तयाइ, तलेबिस्याँ “क्युर प्लुइर बप्तिस्मा पिंबै यूहन्ना सिब्दक्याले दबै सोइर खमै,” बिइर को-कोइइ बिमलो।⁸ कोइइ “त्हम्दबै एलिया अगमबक्ता दबै सोइर खमै,” बिमलो। कोइइ “त्हम्दबै अगमबक्तामें न्होर्बै क्रिहें दबै सोइर खमै,” बिमलो।⁹ छैंबिलेया हेरोद मुँइ बिइ, “यूहन्नाए क्र उइ थोबर ल्हैदिलो। छैंबिलेया चु म्हि सु मुंगे? चुए बारेर जगो थैबै पतेल् आखाँबै तामें उइ थैइमुं।” छतइर चइ येशूदे त्होबै सैं लइ।

येशूजी हजार इहौलो म्हि चल् पिंब

¹⁰ कुल्मिंबै चेला चिब्मै ताखइर थेंमैइ लबै केमै ताँइ यशूने बिइ। चदक्या येशूजी चमै

बोइर बेथसेदा बिबै नांसर म्हिमैइ आसेल्ले याइ।¹¹ छैंबिलेया म्हिमैइ थि छले याब सेइर म्हिए हुल येशू डारं खइ। छले खमाले थीजी परमेश्वरए ग्याल्सबै बारेर चमैदे बिमिंइ। धाइर नब् छब्मै या फैल् लमिंइ।¹² चदक्या त्हेइ लिबि छेमाले च्युसे इह्यौलो चेलामें येशू डारं खइर बिइ, “चुर तिंमै आरे। छतइर चु हुलमै चु खागुबै नांसजरे याइर चबै सै ते टिबै क्ल्ह्यो म्हेदिगे बिइर चुमै कुलद्।”

¹³ छैंबिलेया येशूजी चमैदे बिइ, “केमैजिन् चमै चल् पिन्।”

छबिमाले चेलामेंइ बिइ, “डिंदे बालु चबै माल लेदै आरे। क्हें इहपो ते तांग इह्यौलो मत्त्रे मुं। आतस्याँ डि याइर चुमैए लागिंर चबै माल किंइर बोखल् पर्दिंलै।”¹⁴ च हुलर मुँयुंमै मत्त्रे हजार इहौलोदे मुंलो।

छैंबिलेया येशूजी थिए चेलामेंदे बिइ, “इहच्यु-इहच्युबै ल्हस्यार लइर ताँइ म्हिमें सर कुंल् पिन्।”¹⁵ चमैइ म्हिमें छलेन् कुंबर ल्हैदिइ।

¹⁶ चदक्या येशूजी च क्हें इहपो ते तांग इह्यौलो छैइर मुउँइ च्योइर परमेश्वर धन्यबाद पिंइर क्हें लुंइर “हुलमै चुमिन्” बिइर चेलामेंदे पिंइ।¹⁷ चदक्या चेलामेंइ क्हें चुमिंइ, चदक्या चमै ताँनइ प्रेन्ले चइर डैबै क्हें लुंठेमें च्युसे इह्यौलो त्हलो चेलामेंइ खुइ।

पत्रुसइ येशूदे मुँ बिब

¹⁸ तिगै येशू थि क्रिहेंन् प्राथना लदिमाले चेलामें या थि डारं मुंलो। प्राथना लल् खाँइर थीजी चेलामेंदे “म्हिमैइ ड सु बिम्?” बिइर उच्योएइ।

^a 9:2 परमेश्वरए ग्याल्स अर्थ, “परमेश्वरजी राज लबर होइ। छतइर थीदे मादिद्, चदक्या परमेश्वरजी केमैए फिर आशिक पिब्बु,” बिद्।

19 चेलांमैइ बिइ, “कोइइ ‘क्युर प्लुइर बप्तिस्मा पिंबै यूहन्ना’ बिम्, कोइइ ‘तह्मदबै एलिया’ बिम्, कोइइ ‘अगमबक्तामै न्होबै क्रिहें दबै सोगों तइर खमै,’ बिम्।”

20 चदक्या येशूजी “केमैइ ड सु बिम्दि?” बिइर चमैदे डचोएइ।

छबिमाले पत्रुसइ बिइ, “क्योम् परमेश्वरजी कुल्मिंबै मुं क।”^a

आफैइ सैदिल् पर्दिबै दुःख बारेर येशूजी नसोन् बिब

21 चदक्या येशूजी “केमैइ चु तां खैलसे सुलाज्यै या आबिद् ओ,” बिइ। 22 थीजी दबै बिइ, “परमेश्वरदक्याले कुल्मिंबै म्हिण्णै चहजी लेदै दुःख नोल् पर्दिम्। खो पिंबै खेगि चिबमै, शास्त्रिमै ते अरू चिबनांभैइ खैचिहजी लइर थी सैयाभुं, छैबिलेया सोरोर दबै सोगों तइर खभुं।”

23 चदक्या थीजी चमै तांइदे बिइ, “सुज्यै डए लिलि खबै सैं लस्यां, चइ आफैए तांइ इच्छामै पियाल् पर्दिम्, कति दुःख तलेया सैदिइर त्तिहंइ क्होंसे डए लिलि प्रल् पर्दिम्।

24 “सुइ आफैए ज्यु जोगेबै सैं लमुं च नास तयाभुं। छैबिलेया सुइ डए लागिण्णै आफैए ज्यु पिंमुं चइ आफैए ज्यु जोगेभुं। 25 तलेबिस्यां ह्युलबै तांइ सुख सै न्होर योलैया आफै सिइर नर्गर याल् पर्दिस्यां तो फायदा तमुं? 26 म्हिण्णै चह स्वर्गर परमेश्वर बा ते थिए पबित्र स्वर्गदूतमैदे टिदिभुं। परमेश्वर आबाए मिं थेब लबर थिए शक्तिर स्वर्गदूतमैदे चु ह्युलर थि दबै युभुं। चदक्या

ड ते डए बचनदक्या फाफेइर सु-सुइ ‘डइ येशू डो आसे,’ बिलो, डज्यै या च त्हेर केमै डो आसे बिभुं। 27 छैबिलेया होलिन् ड केमैदे बिम्, केमै चुर राभै न्होर को-कोइ म्हिइ परमेश्वरजी ग्याल्स लब आम्रोन् समा सिदिब् आरे।”

येशूए क्हो फेर्दिब

28 चु तां बिबै सद क्रिहें लिसों पत्रुस, याकूब ते यूहन्ना बोइर प्राथना लबर थि कोउंइ याइ। 29 थि कोर फेनइर प्राथना लदिमाले येशूए लि फेर्दियाइर थिए क्वें बिजुलि चारब दोले चारयाइ। 30 च त्हेर्न थीदे बालु म्हि इह्यौलो तां सेदिलो। चमै तह्मदबै मोशा ते एलिया मुंलो। 31 चमै स्वर्गबै बेल्ले चारबै ह्वेर युइर येशू यरूशलेमर सिल् पर्दिम् बिइर थीदे तां सेदिलो।

32 पत्रुस ते चए थुमै न्हरु चहुइदिलो। छोरमाले बेल्ले चारबै ह्वेर येशूदे बालो म्हि इह्यौलो रादिब चमैइ प्रोइ। 33 मोशा ते एलिया येशूदक्याले याब्लि छेदिमाले पत्रुसइ येशूदे बिइ, “ओ गुरु, डचो चुर टिब छयांभ मुंमै। डचोइ सौलो प्हों बनेले ओ, क्रिहें क्योए लागिण्णै, क्रिहें मोशाए लागिण्णै, क्रिहें एलियाए लागिण्णै।” छले थिइ ता पोंइ बिब पत्रुसइ था आसेलो।

34 पत्रुसइ छ बिदिमाले म्हस्यो युइर थेंमै हुवाइ। थेंमै छले म्हस्योइ हुवाब् प्रोइर चमै बेल्ले फाङ्गियाइ। 35 चदक्या म्हस्यो न्होंदक्याले “चु डइ त्हांबै डए चह क। चइ बिबै तां छेनाले डेन्,” बिबै कै चमैइ थेइ।

^a ६:२० परमेश्वरजी कुल्मिंबै मुं ग्रिक क्युइर, ख्रीष्ट। चए अर्थ म्हिमै जोगेमिबै लागिण्णै परमेश्वरजी त्हांसि कुल्मिंबै मुं।

36 छ बिबै लिसों येशू थि क्रिहें चर रादिलो। छतब् प्रोइर चेलामें च्याँ तयाइ, चदक्या चमैइ प्रोबै तामें च त्हेर सुलाज्यै या आबिलो।

मोंइ स्याबै कोलो फैल् लमिंब

37 च न्हाँग येशू ते चेलामें कोंदक्या क्योरो युदिमाले म्हिए हुल थीदे त्होबर खइ। 38 च हुल न्होंदक्याले म्हि क्रिहेंइ कै तेइर बिइ, “ओ गुरु, ड क्योदे यो छयुं लमुं, डए चह फैल् लमिन्, तलेबिस्याँ च डए घिदे मुँबै चह क। 39 च मोंइ स्याइमुं। च बेल्ले ओरइर क्हरियाम् चए सुँदक्या पेबे त्होम्, नें आम्योन् समा च मोंइ डए चह आपि। 40 छतइर च मों ल्हामिन् बिइर क्योए चेलामेंदे डइ यो छयुं लइ। चमैइ ल्हाल् म्हैलेया ल्हाल् आखाँलो।”

41 येशूजी चमैदे बिइ, “ओ बिश्वास आरेबै आच्योबै म्हिमै, ड खोयोँ समा केमैदे तदिमुं, केमैदे कति सैदिल् पर्दिब् जा? क्योए चह चुर बखो।” 42 च कोलो बखइर खदिमाले मोंइ दबै सर प्योयाइर स्याला म्हाला लइ। छतइर येशूजी च मों हौदिइर च कोलो फैल् लमिंडर चए आबादे पिंइ। 43 परमेश्वरए जगो थेबै शक्ति प्रोइर चमै ताँइ प्लेटोयाइ।

येशूजी आफैं सिबै बारेर दबै बिमिंब

चदक्या येशूजी लबदे लबै केमैदक्याले ताँइ म्हिमै अचम्मा तब् प्रोइर थीजी आफैं चेलामेंदे बिइ, 44 “डइ बिबर होंबै ताँ केमैइ छेनाले सैर थेंन्, तलेबिस्याँ म्हिमैइ ड म्हिए चहलाइ म्हिमैए योर सुम्पिदियाब्मुं।” 45 छैबिलेया येशूजी बिबै

ताँ चेलामेंइ आकहो। तलेबिस्याँ चु ताँ चमैइ आकहोदिगे बिइर परमेश्वरजी चमैदक्याले चए अर्थ लोथेलो। चेलामेंइ चु ताँ आकहोलेया येशूदे डचोएबर फाङ्गियाइ।

सु थेब?

46 च त्हेर्न चेलामें न्होरि सु थेब् जा बिइर छलफल लदिलो। 47 छैबिलेया येशूजी चमैए सैबै ताँ था सेइर येशूजी च्योने कोलो क्रिहें बोखइर आफैं उँइर थेंइ। 48 चदक्या चेलामेंदे बिइ, “सुइ डए मिर चु कोलो मान लमुं, चइ डलाज्यै या मान लमुं। चदक्या ड मान लबमैइ ड कुल्मिंबै परमेश्वर आबालाज्यै या मान लमुं। छलेन केमैए न्होरि सु च्योने तइर टिमुं चन् ताँइ बन्दा थेब् तम्।”

केमैए बिरोध आलबमै केमैए ख लबमै तम्

49 चदक्या यूहन्नाइ बिइ, “ओ गुरु, क्योए मिर मों ल्हाबै म्हि क्रिहें डिइ प्रोइ, छैबिलेया डिइ चदे ‘छ आलद्’ बिइ, तलेबिस्याँ च म्हि डिदे बालो प्रइर क्योइ बिब् दोँ आल।”

50 छबिमाले येशूजी चदे बिइ, “चदे तोइ आबिद्, मों ल्हाल् पिन्, तलेबिस्या क्योए बिरोध आलबमै क्योए ख लबमै तम्।”

सामरियाथेंमैइ येशू मान आलब

51 थि स्वर्ग याबै त्हे चेंदो तखबदे येशूजी यरूशलेमर याबै सैं लइ। 52 चदक्या चब् टिबै तौदु लद् बिइर थीजी आफैं बन्दा नसों सामरिया ह्युलबैं नाँस क्रिहेंर म्हिमै कुलइ।

53 छैबिलेया “येशू यरूशलेमर याम्” बिब् था सेइर च नाँसमैड् थीदे मान आल। 54 छतब् प्रोइर येशूए चेलामें याकूब ते यूहन्नाइ बिइ, “प्रभु, क्योए सैर खै ड्वाँड्मुं? स्वर्गदक्याले मि कुलइर चुमै सैवाद् बिइर डिइ बिले आ।”

55 छबिमाले येशूजी लिंग्याँ तोइर चमै हौदिइ। 56 चदक्या थैमै अर्को नाँसर याइ।

येशूए लिलि प्रल् म्हेबै

57 थैमै क्यारं यादिमा म्हि क्रिहेइ येशूदे बिइ, “ओ गुरु, क्यो खनर यामुं डै या क्योए लिलि याम्।”

58 येशूजी चदे बिइ, “सेलमैल रो मुं, नमैमैल च्हों मुं, छैबिलेया म्हिए च्हे तलेया डल क्र लोबै कल्हयो या आरे।”

59 थीजी अर्को म्हि क्रिहेदे “डए लिलि प्रद्,” बिइ।

छैबिलेया च म्हिइ बिइ, “ओ गुरु, नसों डए बा पाबर याल् पिन्।”

60 थीजी चदे बिइ, “सिनुमै सिनुमैन पादिगे। क्यो बिस्व्याँ याइर ‘परमेश्वरजी ग्याल्स लबर होइ। थीजी बिब डिन्, चदक्या थीजी केमै आशिक पिंम्मुं’ बिब्दे प्रद्।”^a

61 अर्को म्हि क्रिहेज्यै या येशूदे बिइ, “प्रभु, क्योए लिलि ड प्रमुं, छैबिलेया नसों ड तिंर तायाइर तिंरै म्हिमैदे बिदा हिल् पिन्।”

62 छैबिलेया येशूजी चदे बिइ, “आफैए यो क्होरर थैइर लिंग्याँ तोइ च्योबमै सुइ या परमेश्वरए ग्याल्सर केर आफे।”

येशूजी डिच्यु चेलामें कुलब

10 च लिसों प्रभुजी अरू डिच्यु चेलामें त्हाँइर थि याब्लि छेबै सहर ते नाँसजरे आफै बन्दा नसों चमै इह्यौलो-इह्यौलो लइर कुलइ। 2 येशूजी चमैदे बिइ, “मिबै रोमै लेदै मुं, छैबिलेया रोमै खुबै प्रोमै बिस्व्याँ च्युगुदे मुं। छतइर ‘रा-रोमै खुबर प्रोमै कुल्मिन्,’ बिइर रोमैए कल्हेदे प्राथना लद्। 3 याद्! डइ केमै प्यांगुमैए हुलर क्युमै दाले कुलम्। 4 केमैइ मुइ, भोला, जुत्ता ताइ आबोद्। चदक्या क्यारं सुदे या ताँ सेबर लेदै आटिद्, बरू युना याद्।

5 “केमै सुए तिंर होमुं, चर होबै बितिकन् ‘चु तिंर शान्ति तदिगे’ बिद्। 6 च तिंर शान्ति म्हेबै म्हि मुंस्याँ केमैए शान्तिए आशिक चदे ल्हेदिम्मुं। च तिंर शान्ति म्हेबै म्हि आरेस्याँ च शान्तिए आशिक केमैदे बालो ताखब्मुं। 7 चदक्या च तिंर क्रिहेर बास टिद्। च तिंरै म्हिमैइ केमै ता पिंमुं चन् चइर चर टिद्। तलेबिस्व्याँ प्रोमैइ आफैए नों सै योल् पर्दिम्। 8 केमै सु नाँसर यामुं चर्बै म्हिमैइ केमै मान लइर चर्बै मालमै ता पिंमुं चन् चद्। 9 चदक्या च नाँसर्बै नब्-छब्मै फैल् लद्, धाइर ‘परमेश्वरए ग्याल्स केमैए डॉन फेखड्मुं’ बिइर चमैदे बिद्। 10 छैबिलेया केमै नाँस क्रिहेर यामाले चर्बै म्हिमैइ केमै बास आपिं, मान आल बिस्व्याँ च नाँसर्बै क्यारं जरे याइर बिद्, 11 ‘केमै परमेश्वरए बिरोधि तइ। छतइर चु छ्याब् पिंबै प्रमाणए लागिंर डिए फ्लेर ड्वाँबै त्हुल डिइ चुर खारथेम्।

^a ६:६० ग्रीक क्युइर, परमेश्वरए ग्याल्सए बारेर बिप्रद्।

छैंबिलेया चु ताँ सैर थंन् परमेश्वरए ग्याल्स केमैए डॉन फेखडुं, बिद्।¹² ड केमैदे बिमुं, परमेश्वरजी निसाफ लबै त्हिंइर सदोमथेमैइ बन्दा च नाँसमैइ भन् थेबै सजै योँब्मुं।

येशू आमादिबै नाँसमै

13 “धिककार मुँ खोराजीनथेमै! केमै बेल्ले सैं क्रोल् पर्दिम्! धिककार मुँ बेथसेदाथेमै, केमै या बेल्ले सैं क्रोल् पर्दिम्! तलेबिस्याँ केमैए नाँसजरे तब् दोंबै परमेश्वरए शक्तिए केमै टुरोस ते सिदोनर तस्याँ चबै म्हिमै त्हम्दन् हेगा खेइर मेब्रो फिर कुँइर थेमैए आछ्याँबै बानि पिइर परमेश्वरउँइ सैं तामलो।¹⁴ परमेश्वरजी निसाफ लबै त्हिंइर टुरोस ते सिदोनथेमैइ बन्दा केमैइ भन् थेबै सजै योँब्मुं।¹⁵ ओ कफर्नहुमथेमै! केमै स्वर्गर याल् योम् झूँल् आ? आयो! केमै नर्गर्न भ्योवाब्मुं।”

16 येशूजी दबै चेलामैदे बिइ, “सुइ केमैइ बिबै ताँ डेंमुं, चइ डए ताँ डेंम्। छैंबिलेया सुइ केमैइ बिब आडिंइर बिरोध लम्, चइ डए बिरोध लम्। छलेन सुइ डइ बिब आडिंइर बिरोध लम्, चइ ड कुल्मिंबै परमेश्वर आबालाज्यै या बिरोध लम्।”

चेलामै ताखब

17 च लिसों डिच्यु चेलामै बेल्ले सैं तोइर येशू डॉर ताखइर बिइ, “ओ प्रभु, डिइ क्योए

मिं किंइर मोमै ल्हामाले चमैइ डिइ बिबै ताँ डिंइ।”

18 छबिमाले येशूजी चमैदे बिइ, “ओ, काल्मि-तिम्लि युब् दोँले मोमैए म्रुँ दुष्ट स्वर्गदक्याले क्योरो खारयुब डइ म्रौइ।¹⁹ डए ताँ डेंन्! डइ केमै प्हुरिमै, बिच्छिमै प्लेल् खाँब ते शत्तुरमैए ताँइ शक्तिए फिर ट्होल् खाँबै हग पिंइमुं। छतइर ताइ मालज्यै या केमै न्होहोँ लल् खाँदिब् आरे।²⁰ छैंबिलेया केमैइ बिब मोमैइ डिंइ बिइर सैं आतोन्, बरु परमेश्वरजी केमैए मिं स्वर्गर त्हिथेंडुं बिइर सैं तोन्।”

येशूजी परमेश्वर आबा धन्यबाद पिंब

21 च त्हेर्न येशू परमेश्वरए पबित्र प्लहजी प्लिंइर सैं तोइर बिइ, “ओ बा, स्वर्ग ते पृथबीबै क्लहे क्योन् क, ज्ञान मुँब्मै ते हब-सेब्मैदक्याले लोथेबै छ्याँबै ताँ कोलोमै दोँ तबै तोइ आह आसेब्मैदे क्योँइ क्होमिंइमुं। ओ बा, क्योँजी छैलि के लब छ्याँब झूँइ। छतइर ड क्योँ धन्यबाद पिंमुं।

22 “डए परमेश्वर आबाजी ताँइ माल ड पिंइमुं। चह सु जा बिइर परमेश्वर आबाजी मत्त्रे सेमुँ अरूमैइ आसे, परमेश्वर बा सु जा बिइर चहइ मत्त्रे सेमुँ अरूमैइ आसे। ‘परमेश्वर बा डो सेदिगे’ बिइर डइ उँइँल् झूँब्मैइ मत्त्रे थी डो सेम्, अरू सुज्यै या परमेश्वर बा डो आसे।”

23 येशूजी आफैए चेलामै डॉइ तोइर अरू म्हिमैइ आथेल्ले बिइ, “केमैइ म्रोबै मालमै

म्रोल् योन्बै ड्हो सब्बै क।²⁴ तलेबिस्याँ डइ केमैदे बिम्, तह्मद अगमबक्ता ते मुँमैज्यै या केमैड म्रोबै केमै च्योल् झ्णालो, छैबिलेया च्योल् आयोलो। छलेन केमैड डेबै तामै डेल् झ्णैड, छैबिलेया डेल् आयोलो।”

डए डहेब-टहुब सु जा?

²⁵ परमेश्वरए छ्वे हबै म्हि क्रिहेंड येशूए जाँच लइर ताँ कहाल् पर्दिलै बिबै सै लइर थीदे “ओ गुरु, खेमैड आखाँबै छ्ह योबै लागिर डइ ता लल् पर्दिम्?” बिइर डचोएमाले

²⁶ येशूजी चदे बिइ, “मोशाए ठिमर ता प्हिइमुँ? चर क्योड ता खेड?”

²⁷ चइ बिइ, “क्योड आफैए प्रभु परमेश्वरदे आफैए खाँ न्होदक्याले, सै न्होदक्या, आफैड हब्दे, सेब्दे, खाँब्दे माया लद्, धाइर आफैए डहेब-टहुबमै आफै दोले माया लद्।”

²⁸ येशूजी चदे बिइ, “क्योड ठिक बिइ। छैलि केमै लद्, छ लइबिस्याँ क्योड खेमैड आखाँबै छ्ह योन्बुँ।”

²⁹ छैबिलेया च म्हिइ आफै ठिक के लबै म्हि क बिइर प्हेबर “छ बिस्याँ डए डहेब-टहुब सु जा?” बिइर डचोएमाले

³⁰ येशूजी अहानदक्या छले बिइ, “म्हि क्रिहें यरूशलेम सहरदक्याले जेरिको नाँसउँड याबै क्यारं थि क्रिहें यादिलो। छले यादिमाले क्यारं योमैड च कहाइर चए मार, मुड, ते क्वे प्हेयाइर क्लुँनन् लइर सो मत्त्रे चैल्ले बेल्ले तोइर क्यारं वाथेंड।³¹ तिस्याँदे लिसों

खो पिबै खेगि क्रिहें च घ्याँदक्या खइ। छैबिलेया योड तोबै म्हि म्रोइर च तिराइ प्रयाइ।³² छलेन च दोलेन् मन्दिरबै खेगि लेबीए खलकबै म्हि या च क्ल्टयोर फेखइर च म्हि म्रोमाले चै या क्योँए रेदक्या प्रयाइ।

³³ “च लिसों सामरिया ह्युलबै म्हि क्रिहें या^a च क्योँ तइर खदिमाले च योड तोबै म्हि म्रोइर चए सैर बेल्ले ल्हय खइ।³⁴ धाइर च डारं याइर मै फोमिइर चए धार पट्टि फैमिइर थिए गधाए फिर थेंडर ठाँटि क्रिहेंर बोइर चए सुसर लइ।³⁵ न्हाँग याबै त्हेर च सामरियाथेंड ठाँटिबै क्लहेदे चाँदिए मुड ड्ह्यौलो पिंइर चु म्हि छेनाले च्योमिन् अरू कति खर्ज ल्हौदिलेया ड ताखमाले फोमिस्यो,” बिइ।

³⁶ चु अहान् बिल् खाँइर येशूजी च ठिम लोमिबै गुरुदे “चु सौलो म्हिमै न्होरि सुइ च योड तोबै म्हिदे डहेब-टहुबमै दोले माया लइ?” बिइर डचोएमाले

³⁷ च ठिम लोमिबै गुरुइ बिइ, “चए फिर ल्हय खबै सामरियाथेंड।”

येशूजी चदे बिइ, “छ बिस्याँ याद् क्योँज्यै या छैलि केन् लद्।”

मार्था ते मरियम

³⁸ चदक्या येशू चेलामैदे बालु क्यारं यादिमाले नाँस क्रिहेंर फेखइ। च नाँसबै मार्था बिबै चमिरिइ थी आफैए तिर चब चबर उइ।³⁹ मार्थाल मरियम मि मुँबै अडाँ मुँलो। मरियम प्रभु येशूए प्हेले डारं कुँइर थीजी लोमिबै ताँ थेदिलो।⁴⁰ मार्था बिस्याँ चब् लबर आतुर तदिलो। छतइर मार्था येशू डारं

^a 10:33 सामरिया ह्युलबै म्हिमै च त्हेर क्यु आचल्दिबै हेबै म्हिमै मुँलो।

याइर बिइ, “ओ प्रभु, डए अडाँइ के लबर ड आल्हो! क्योँइ चु ताँए बिचार आल आ? के ल्होबर च ड डारँ कुलमिन्।”

41 छैबिलेया प्रभु येशूजी चदे बिइ, “ओ, मार्था क्योँइ लेदै ताँर न्हुँ लम्। 42 छैबिलेया क्रिहें ताँ मत्रे चैदिम्। कासि मरियमइ च छयाँबै ताँ त्हाँइ। छतइर च ताँ चदक्या डइ प्हेँदिब् आरे।”

येशूजी प्राथना लब लोमिंब

11 तिगैं क्ल्हयो क्रिहेंर येशू प्राथना लदिलो। थीजी प्राथना लल् खाँबै लिसों थिए चेला क्रिहेंइ थीदे बिइ, “ओ प्रभु, क्युर प्लुइर बप्तिस्मा पिंबै यूहन्नाइ आफैँए चेलामैं प्राथना लब् लोमिंब् दोले डिलाज्यै या लोमिन्।”

2 येशूजी चमैदे बिइ, “केमैइ प्राथना लमाले छले लद्:

‘ओ बा,

ताँइ म्हेमैइ क्योँए मिं पबित्र मादिदिगे,

क्योँए ग्याल्स युदिगे,

3 डिए त्तिहँइ क्वोसेबै चबै सै तिं डि पिनुँ।

4 डिए पाप क्षमा लमिन्,

तलेबिस्याँं डिए फिर आछयाँबै के

लबमैदे डिज्यै या क्षमा लम्।

डि सैदिल् आखाँबै जाँजर च्होल्

आपिनु।”

परमेश्वरजी चमैए प्राथना थेब्मुँ बिब

5 चदक्या येशूजी आफैँए चेलामैदे चु अहान् बिइ, “केमैए न्होरि सु मुँलेया म्हुँइँस आदार थु डारँ याइर ‘ओ थु, म्हन सों म्हलसि खिद्,’ बिम्। 6 तलेबिस्याँं थु क्रिहेंर तोगो ड डारँ बास टिबर खइम्, छैबिलेया डदे चल् पिंबै माल तोइ आरे।

7 “छैबिलेया क्योँए थुइ तिं न्होँदक्याले ‘छोक्रो झूँन आबित्ति। डइ प्रा तोरयाइ। तोगो डए कोलोमैं डदे बालो न्हरु चहुइदिइम्। तोगो ड रेइर क्योँ तोइ पिंल् आखाँ,’ बिम्।

8 “डइ क्वेमैदे बिम्, थु तमैं बिले च रेइर क्योँ तोइ आपिं, छैबिलेया क्योँइ हिबै-हिब् लमाले च रेइर क्योँ चैदिबै ताँइ माल पिंब्मुँ।^a

9 “छतइर ड केमैदे बिम्, तो माल चैदिम् हिब्ले लद्, चदक्या परमेश्वरजी पिंब्मुँ। म्हेब्दे लद् केमैइ स्याब्मुँ। प्रार हाब्दे लद् केमैए लागिरी थीजी प्रा थोमिंब्मुँ। 10 तलेबिस्याँं हिब्मैइ योंब्मुँ, म्हेब्मैइ स्याब्मुँ, चदक्या प्रार हाब्मैए लागिरी परमेश्वरजी प्रा थोमिंब्मुँ।

11 “सैर मैन्दि, केमैए न्होरि आफैँए चहइ क्वें हिमाले युँम पिंबै बा सु मुँगे धाइर ताँग हिमाले ताँगए साटोर प्हुरी पिंम् रो आ? 12 छलेन क्योँए प्हसेइ नग फुँ हिमाले क्योँइ बिच्छि पिंम् रो आ? आपिं! 13 केमैं दुष्ट तलेया आफैँए प्हसेमैदे छयाँबै मालमैं पिंल् हम् बिस्याँं, भन् स्वर्गर टिबै केमैए

^a 11:8 चैदिबै तोन्दोरि माल पिंब्मुँ छले हिबै हिबन् लब्दे ह्युलर मुँबै थुइमि केमैलाइ पिंम् बिस्याँं भन् केमैलाइ माया लबै परमेश्वर आबाजी कति लेदै पिलै।

परमेश्वर आबाजी थीदे बालो ह्बिम्दै कति लैदे पबित्र प्लह पिंब्मुं।”

येशू ते बालजिबुल

14 तिगैं येशूजी मोंइ स्याइर लड तयाबै म्हि क्रिहेंदक्या मों ल्हामाले मों त्हांयाबै लिसों च लड पोंबर होंइ। छ तब् म्रोंइर च खाउ मुंबै म्हिमै प्लेटोयाइ।¹⁵ छैंबिलेया चमैं न्होर्बै को-कोइइ “मोमैए चिब बालजिबुलदा क्याले^a चइ मोमैं ल्हाम्,” बिइ।¹⁶ अरू म्हिमैइ बिस्याँ “परमेश्वरजी क्योँ शक्ति पिंब् क बिस्याँ स्वर्गबैं चिनु क्रिहेँ उँइन्,” बिइर येशूए जाँच लइ।

17 छैंबिलेया येशूजी चमैए सैबैं ताँ सेइर चमैदे बिइ, “ग्याल्स क्रिहेँबैं म्हिमैं थें-थेमैए न्होर आक्हिस्स्याँ च ग्याल्स नास तयाम्। छलेन तिं क्रिहेँबैं परवामैं आक्हिस्स्याँ चमैं या नास तयाम्।¹⁸ च दोलेन् दुष्ट आफैं न्होर आक्हिस्स्याँ चए ग्याल्स खैले टिकिदल् खाँम्?

“तलेबिस्याँ बालजिबुलए शक्तिदक्या डइ मोमैं ल्हाम् बिइर केमैइ बिम्।¹⁹ बालजिबुलए शक्तिदक्या डइ मों ल्हाम् बिस्याँ, केमैए टोलिबैं म्हिमैइ सुए शक्तिदक्या मोमैं ल्हाम्? छतइर चमैइन केमैए निसाफ लब्मुं।²⁰ छैंबिलेया परमेश्वरए शक्तिदक्या डइ मोमैं ल्हाम् बिस्याँ, परमेश्वरए ग्याल्सबैं शक्ति केमैए माजोर तखइमुं बिइर केमैइ सेल् पर्दिम्।

21 “चदक्या अर्को ताँ थेद! पोबै म्हि क्रिहेँइ^b हत्यारमैं छेइर आफैंए तिं रूम्

बिस्याँ चए सै न्होर सुज्यै या बोल् आखाँ।²² छैंबिलेया च बन्दा पोबै म्हि^c चए फिर ह्वानेइर ट्होम्, धाइर च म्हिइ भर लबै हत्यारमैं प्हेयाम्, धाइर चए तिर मुंबै मालमैं बोइर अरूमैदे चुमिंम्।²³ छतइर डए ख आलबै म्हि डए बिरोधि क। धाइर डदे बालु आखुबै म्हिइ खन्तोदोंन् फ्रुंम्।

ल्हाबै मों दबै ताखब

24 “चदक्या अर्को ताँ: म्हिदक्या मों त्हांबै लिसों च मों बास म्हैबै लागिर छाइ छुइ खन्तोदोंन् प्रम्। छैंबिलेया खनरै बास आयोंब्दक्या ‘नसों टिबै तिर ड तायाम्,’ बिम्।

25 “छले च मों ताखमाले च तिं खाँसों ड्हांन् लइर फ्योइर सजेथेब् चइ स्याम्^d 26 छतइर च मों याइर अभै आफैं बन्दा दुष्ट मों डिउँलो बोखइर चमैं ताँइ च न्होर टिम्। चदक्या च म्हिए छ्ह नसोंबै बन्दा लिसोंबै भन् आछयाँब तम्।”

होलिन्बै आशिक योंब

27 येशूजी छ बिब्दै लमाले हुल न्होंदक्याले चमिरि क्रिहेँइ थेबै कैले बिइ, “क्योँ फिइर इहे तिबै आमाइ बेल्ले आशिक योंइमुं।”

28 छैंबिलेया येशूजी च चमिरिदे बिइ, “ओ नानि, डए ताँ डेंन्! परमेश्वरए ताँ थेर थीजी बिब् मादिबै म्हिइ भन् आशिक योंब्मुं।”

^a ११:१५ बालजिबुल दुष्ट बिबै स्योर तेबे थेबै मोंए अर्को मिं ग। ^b 11:21 भोबै म्हि क्रिहेँइ मतलब दुष्टइ।

^c 11:22 च बन्दा भोबै म्हि मतलब परमेश्वरए च्ह। ^d ११:२५ सजेथेब् चइ स्याम् च तिं, मतलब म्हि, कहोते मुं, तलेबिस्याँ च म्हिइ परमेश्वरए प्लह सैर आथेइमुं।

शक्तिए चिनु उँइन् बिब

29 छले म्हिए हल् लेदै तब्दे यामाले येशूजी बिइ, “तिन्हगबै म्हिमै दुष्ट क। चुमैइ ड परमेश्वरजी कुल्मिबै म्हि ग बिस्यां छिदे प्रमाण उँइन् बिम्। छैबिलेया त्हम्द योना बिबै अगमबक्ताए छहर तब् दो तबै चिनु मन्त्रे चुमैइ प्रॉल् योँब्म्, अरू चिनु प्रॉल् योँदिब आरे। 30 तलेबिस्यां निनबे बिबै सहरबै म्हिमैए लागि र योना^a औदिबै चिनु तब् दोले म्हिए चह तिन्हगबै म्हिमैए लागि र प्रमाण तब्म्। 31 चदक्या निसाफ लबै तिहँइर शेबा^b बिबै ह्युलबै म्रुँस्यो राइर तिन्हगबै म्हिमैदे छचाब् ल्हैदिब्म्, तलेबिस्यां त्हम्द इस्राएल ह्युलबै सोलोमन म्रुँए ज्ञानए ताँ उँबर हेंगोबै ह्युलदक्याले च म्रुँस्यो खलो। छैबिलेया डेन्! सोलोमन म्रुँ बन्दा भन् थेबै म्हि तोगो चुर मुँ। 32 चदक्या निसाफ लबै तिहँइर निनबे बिबै सहरबै म्हिमैइ तिन्हगबै म्हिमैए फिर छचाब् मुँब ठर्दिब्म्, तलेबिस्यां योनादक्या परमेश्वरए ताँ उँइर निनबे बिबै सहरबै म्हिमैइ आ-आफैए आछचाँबै के पिइर परमेश्वरउँइ सैं तालो। छतइर डेन्! योना बन्दा भन् थेबै म्हि चुर मुँ।”

येशूजी मि प्रोबै ताँए बारेर लोमिब

33 येशूजी दबै बिइ, “सुज्यै या बत्ति प्रोइर च्हेयोगों न्होर आलो, मतलब भाँडोइ आहथुँ, बरु तिं न्होर खबै म्हिमैइ मि प्रोदिगे

बिइर नुबै कल्ह्योर थेंम्। 34 क्योए मि ज्युबै बत्ति क। क्योए मिइ छचाँबै माल च्योइ बिस्यां क्योए सैं या छचाँब तइर चारब तम्। छैबिलेया मिइ आछचाँब माल च्योइ बिस्यां क्योए सैं या आछचाँब तइर मिछु तयाम्। 35 छतइर केमैदे मुँबै चारब मि मिछु आतदिगे बिइर सैं चिद्।^c 36 क्योए ज्युर मिछु आतल्ले ज्यु भरिन् चारब माल मुँस्यां बत्ति चारब दोले क्योए ज्युदक्या परमेश्वरए मिं चारब्म्।”^d

येशूजी फरिसीमैए फिर छचाब् ल्हैदिब

37 येशूजी चु ताँमै बिल् खाँबै लिसों फरिसी क्रिहेंइ येशू आफैए तिर चब् चबर उइ। चदक्या येशू चए तिर याइर चब् चबर कुँइ। 38 येशूजी यो आखुल्ले चब् प्रोइर च निन्तो लबै फरिसी प्लेटोयाइ। 39 छतइर येशूजी चदे बिइ, “केमै फरिसीमै थलि प्हेलाए फि-फि छेनाले म्याम्।^e छैबिलेया केमैए सैर बिस्यां आछचाँबै ताँमै ते लोबइ प्लिंइम्।”

40 “ओ, आमादुमै! बैरुबै माल बनेबै परमेश्वरजीन् न्होबै माल या बनेब आडिं आ? 41 क्योए थलि प्हेलर मुँबै मालमै आयों आख्युब्मै पिन्। छ लस्यां न्हो मुँलेया बैरु मुँलेया केमैए लागि र ताँइ चोखो तब्म्।

42 “धिककार मुँ फरिसीमै केमै सैं क्रोल पर्दिम्! केमैइ जिरा-मरिज पतिन छैलि च्युगुथिर मालमैले या च्योइर च्युबाँबै तिबाँ परमेश्वरए मिंर पिंम्, छैबिलेया केमैइ अरूए फिर ठिक निसाफ आल, धाइर सैं न्होंद

^a ११:३० योना योना थेबै ताँग न्होरि सोरों टिसि सोइ। च दोले येशू सियाइर पाबै सोरोर दबै सोइ। ^b 11:31 शेबा ग्रिक क्युइर, दक्षण ^c ११:३५ मतलब, लोमिबै तो-तो ताँ म्हिमैइ छचाँब ज्वाँम्, च ताँ लिसों आछचाँब आतदिगे बिसि सैं चिद्। ^d ११:३६ मतलब, छचाँबै मिइ परमेश्वरउँइ च्योइर सैर छचाँब छचाँबै ताँमै मन्त्रे तम्, छैबिलेया दुष्ट मिइ आछचाँबै च्याँउँइ च्योइर दुष्ट ताँमै सैर तम्। ^e 11:39 थलि प्हेलाए फि-फि छेनाले म्याम् भाँडोए फि-फि म्याब दोले चमैइ आफैए ज्यु या फि-फि खुम्।

क्याले परमेश्वरए माया आल। च्युबाँर तिबाँ पिब छचाँब क, छैबिलेया अरू केमै या केमैइ छेनाले लल पर्दिमलो।

43 “धिवकार मुँ फरिसीमै केमै सै क्रोल पर्दिम! केमै च्हो धिंजगोर यामाले मान लल पर्दिबै म्हिमै कुँबै कल्ल्हयोर कुँल् म्हेम! धाइर बजारजरे यामै या म्हिमैइ मान लइर मादिदिगे ड्वाँम्।

44 “धिवकार मुँ केमै सै क्रोल पर्दिम! केमै छचो म्हयो आयोबै छगो दों तब क, ‘न्होर सिनु मुँ’ बिब आसेइर म्हिमै चए फिफि प्रम्।”

45 शास्त्रिमैए न्होबै क्रिहेंइ येशूदे बिइ, “ओ गुरु, क्योंइ छैलि ताँमै बिइर डिए इजेत वाइ।”

46 येशूजी बिइ, “केमै शास्त्रिमैलाज्यै या धिवकार मुँ! सै क्रोल पर्दिम! म्हिमैइ नोल आखाँबै ते केमैइ नोद् बिमुँ, छैबिलेया केमै बिस्याँ यो च्याफैर टिदिम।

47 “धिवकार मुँ, केमै क्रोल पर्दिम! तलेबिस्याँ केमैए खेमैइ सैयाबै त्हम्दबै अगमबक्तामैए मान लब प्हेँइर केमैइ छचाँबै देवलमै बनेमुँ। 48 केमैइ छलमाले ‘डिए खेमैए केमै ठिक मुँलो,’ बिमुँ। तलेबिस्याँ चमैइ त्हम्द अगमबक्तामै सैयाइ, छैबिलेया केमैइ चमैए लागिण देवल बनेइ। 49 छतइर ‘डइ चमै डार अगमबक्तामै ते स्यारबो कुलम्,’ बिइर ताँइ सेबै परमेश्वरजी बिलो। ‘छैबिलेया च कुलम् न्होरि को-कोइ चमैइ सैयाब्मुँ, कोइदे हुगुदिब्मुँ।’ 50 छतइर ह्युल केब

कोदोंबै तियाँ समा अगमबक्तामै सैयाबै पापए सजै तिन्हगबै म्हिमैइ बेहोर्दिल् पर्दिम। 51 ओ, ड केमैदे बिमुँ, हाबिल सैयाबै त्हेदक्या पबित्र मन्दिर ते खो पिबै कल्ल्हयोए माजोर जखरिया सैयाबै त्हे समबै ताँइ सजै तिन्हगबै म्हिमैइ बेहोर्दिल् पर्दिम।

52 “केमै शास्त्रिमै धिवकार केमै क्रोल पर्दिम! केमैइ होलिन्बै ज्ञान बुद्धि योबै प्राए साँजु किबम् किंड, छैबिलेया केमै आफै न्होर आहों, हॉल् म्हेम्बैलाज्यै या केमैइ हॉल् आपि।”

53 येशू च तिन्हक्या त्होबै लिसों शास्त्रिमै ते फरिसीमैइ थिए बिरोध लब्दे थीदे लेदै ताँमै डचोएबर होइ। 54 “येशूजी ताँ पोंमाले खनिज्यै गल्लि स्याइर ताँ क्हाल् योम् उ?” बिइर चमैइ दाउ च्योबर होइ।

स्योर ताँर न्ह क्रों मि क्रों तल् पर्दिब

12 च त्हेर्न हजार हजार म्हिमै चर खागु तइ। छले लेदै म्हिमै तमाले म्हिइ म्हिन् प्लेबर होइ। धाइर येशूजी नसों आफैए चेलामैदे बिइ, “फरिसीमैए क्हेर चोबै प्लेढदक्याले जोगेइर टिद्। चमैल स्योर ताँमै लोमिंबै बानि^a मुँ। छतइर छेनाले ताँ क्होइर न्ह क्रों मि क्रोले टिद्। 2 तलेबिस्याँ तोगो केमैइ ता माल हुथेंलेया लिसों ताँइ म्हिमैइ प्रोँब्मुँ। चदक्या ता मुँले ताँ लोथेबै लिसों ताँइ म्हिमैइ सेब्मुँ। 3 छतइर केमैइ मिछु खेबर

^a 12:1 स्योर ताँमै लोमिंबै बानि मतलब, ताँ क्रिहें लम्, के अर्को लम्।

बिबै ताँमें लिसों त्तिंडर म्हिमैड थेब्मुं। तिं न्होर केमैड सो कैले पोबै ताँ या तिं प्हेदक्या (धुरि) खन्तोदोन् थेनेब्मुं।”

सु प्रॉइर ड्ङ्ल पर्दिम्?

4 येशूजी दबै बिड, “ओ डए थुमै! ड केमैदे बिम्, केमैए ज्यु सैल् खाँबै म्हिमै प्रॉइर फाआड्ङिन्। तलेबिस्याँ ज्यु सैल् खाँलेया चमैड च बन्दा लेदै ताइ लल् आखाँ। 5 छैबिलेया सु प्रॉइर फाड्ङ्ल पर्दिम् बिस्याँ ड केमैदे बिम्, केमै परमेश्वर प्रॉइर फाड्ङिन्, तलेबिस्याँ म्हि सैइर नर्गर भ्योयाबै शक्ति थीदे मुं।

6 “मुइ ड्ङिफुर कोमै ड्हौलो आलों आ? जगोन योबे कोमै क्रिहेलाज्यै या परमेश्वरजी आम्लेनले छेनाले च्योम् बिस्याँ 7 भन् केमैलम् क्रुफ्हो या क्रिहे क्रिहेले परमेश्वरजी च्योइर थेंडमुं। छतइर तिफुंड फाआड्ङिन्, परमेश्वरए उँइर लेदै कोमै बन्दा केमै सै लेदै फेब मुं।

येशू “डो सेम्” ते “डो आसे” बिब

8 “छतइर डइ केमैदे बिम्, सुइ म्हिमैए उँइर ‘येशू डए प्रभु क’ बिम्, च म्हिलाज्यै या परमेश्वरदक्याले कुल्मिबे म्हिए च्हजी परमेश्वरए स्वर्गदूतमैए उँइर ‘चुम् डए म्हि क’ बिब्मुं। 9 छैबिलेया सुइ म्हिमैए उँइर ‘डइ येशू डो आसे,’ बिम्, डज्यै या परमेश्वरए स्वर्गदूतमैए उँइर ‘चु डइ डो आसे,’ बिब्मुं।

10 “चदक्या म्हिए च्हए बिरोधर पोब्मैड क्षमा योब्मुं। छैबिलेया पबित्र प्ल्हए बिरोधर पोब्मैड^a क्षमा योदिब आरे।

11 “चदक्या म्हिमैड केमै च्हों तिंबै चिब्मै ते क्रुथेमै डार कहाइर बोमाले ‘डइ ता पोब डहे? डइ तो बिल् पर्दिब् डहे?’ बिइर न्हुं आलद्। 12 तलेबिस्याँ केमैड बिल् पर्दिबै ताँ पबित्र प्ल्हजी च त्हेर्न केमै लोमिंम्मुं।”

दिमाग आरेबै प्लबै म्हिए बारेबै अहान्

13 येशूजी आफैए चेलामै लोमिमाले हुलदक्या म्हि क्रिहेड येशूदे बिड, “ओ गुरु, डिए आबाल मुंबै सै न्होर अंश चुमिन् बिइर डए आगेंदे बिमिन् ओ।”

14 छैबिलेया थीजी चदे बिड, “ओ थु, केमैए फिर निसाफ लब् ते केमैए सै न्होर चुमिन् बिइर डदे सुइ ल्हैदिलो?” 15 थीजी दबै चर मुंम्मैदे बिड, “छेनाले मैन्, नना ओलिबै लोब् आलद्, तलेबिस्याँ म्हि कति प्लब तलेयाँ सै न्होरदक्या होलिन्बै छ्ह योल् आखाँ।”

16 च लिसों येशूजी चमैदे अहान् क्रिहे बिड, “प्लबै म्हि क्रिहेल प्रॉदक्या लेदै रा-रोमै खइ। 17 छतइर ‘जगो लेदै रा-रोमै थेबे धन्सार डदे आरे! तारे ड ता लब् डहे?’ बिइर चइ सै न्हो-न्हो मैड। 18 चदक्या चइ बिड, ‘डए धन्सारमै फुइर बेल्ले थेब् थेब् लर्मुं। चदक्या डए रा-रोमै ते अरू सै न्होर चर थेंम्। 19 चदक्या डइ आफैदे क्योए लागिर लेदै बर्ष समा योबै रा-रोमै मुं। तारेदक्या चदु, थुंनु, धाइर मोज-मज्जा लइर सुखले टिद्,’ बिब्मुं। 20 छैबिलेया चइ

^a १२:१० पबित्र प्ल्हए बिरोधर पोब्मैड मतलब, पबित्र प्ल्हए जोगेमिबे माया ते शक्ति वार्थसि आमादिब्मैड क्षमा हिरिब आरे, चदक्या क्षमा आयो!

छैलि मैदिमाले परमेश्वरजी चदे बिइ, ‘ओ आमादु! तियाँ म्हँडँसर्न कयो सिल् पर्दिम्मुँ। तारे क्योँड साँडर थँबे सै न्होर सुल् तब्मुँ?’”

21 येशूजी दबै बिइ, “आफैए लागिर सै न्होर थुपर्दिइर प्लब तब छैबिलेया परमेश्वरए उँडैर आप्लबै म्हिए गति छैलिन् तम्।”^a

परमेश्वरए फिर बिश्वास लइ

22 येशूजी आफैए चेलामैदे बिइ, “छतइर ड केमैदे बिमुँ, सोबै लागिर ‘ड ता चब् इहे? ता थुँब इहे? धाइर ज्युए लागिर ता खेब इहे?’ बिइर न्हुँ आलद्।²³ तलेबिस्याँ चबै माल बन्दा जिवन थेब मुँ, चदक्या क्वेँ बन्दा ज्यु थेब मुँ।^b

24 “कगमैँ च्योत्ति! चमैँइ खेति आल्हैदि, रो या आखु, चमैँल भकारि आरे, धनसारमैँ या आरे। छैबिलेया परमेश्वरजी चमैँ चल् पिदिइमुँ। छैलि नमेमैँ बन्दा केमैँ भन् बेल्ले थेब मुँ।²⁵ केमैँए न्होरि सुइ न्हुँ लइर आफैँए आयु चहौदे या थप्दिल् खाँम्मा? ²⁶ केमैँइ जगो च्योबै के या लल् आखाँ बिस्याँ अरू सैर तले न्हुँ लमुँ?

27 “चदक्या अर्को ताँ: बनर्बे प्हारबै टमैँ च्योइर सैर मैँन। चमैँइ दु:खै आल, आफैँए लागिर क्वेँ या आरो। छैबिलेया ड केमैँदे बिमुँ, तह्मद सोलोमन मुँ बेल्ले प्लइर छ्याँब् छ्याँबै क्वेँ खेलेया चु टमैँ प्हारब् दोले छ्याँब् आरेलो।²⁸ चु टमैँ तियाँ प्हारइर न्हॉंग कारयाइर म्हिँमैँइ मिर खोंयाम्। छ

तलेया परमेश्वरजी जगो छेनाले पैरेमिँडमुँ बिस्याँ भन् केमैँ बेल्ले छेनाले पैरेमिँडमुँ।

29 “छतइर ता चब, ता थुँब बिइर केमैँ म्हैइर आप्रद्, धाइर न्हुँ या आलद्।³⁰ छैलि न्हुँ परमेश्वर डो आसैँमैँइ लम्। केमैँ चु मालमैँ चैदिम् बिइर केमैँए परमेश्वर आबाजी सेम्।³¹ बरू नसों परमेश्वरए ग्याल्स म्हैद्।^c चदक्या थीजी चु ताँइ मालमैँ केमैँ पिँमुँ।³² ओ डए च्युगुथिरी बगाल, फाआङ्गिन्। तलेबिस्याँ केमैँए परमेश्वर आबाजी आफैँए ग्याल्स केमैँदे पिँबर सैँ तोँडमुँ।

33 “छतइर केमैँए सैँ न्होर चुँडर योबै मुइ आयोँम्बै पिन्। चदक्या आफैँए लागिर खैँमैँइ स्योब आतबै नेदोमैँ रोइर नाँस आतबै सैँ न्होर स्वर्गर साँडर थेंन। स्वर्गर थेंबै सैँ न्होर खैँमैँइ आम्ह, तलेबिस्याँ सुज्यै योल् आँखाँ, चदक्या प्हुँलुँज्यै आच।³⁴ तलेबिस्याँ केमैँए सैँ न्होर मुँबै कल्ह्योर केमैँए सैँ तब्मुँ।

प्रभु दबै युम् बिबै ताँ

35 “केमैँए क्रे फगिड खेइर न्ह क्रोँ मि क्रोले केमैँए बत्ति मोइर थेंन।³⁶ ँह्या भत्यारदक्या तिँ कल्हे खोँयो खम् बिइर कयाँ च्योदिबै केँळैँमैँ दोब केमैँ तल् पर्दिम्। तिँ कल्हे एखइर उडबै बितिकन् प्रा थोमिँबै केँळैँमैँ दोँ तब केमैँ तल् पर्दिम्।³⁷ तिँ कल्हे ताखमाले केँळैँमैँ तयार तइर न्ह क्रोँ मि क्रोले टिदिब स्यास्याँ कल्हे सैँ तोँडर केँळैँमैँइ स्याबासि योँम्मुँ। होलिन् ड केमैँदे बिमुँ, तिँ कल्हेइ

^a १२:२१ मतलब, सैँ न्होरए लिलि प्रब, छैबिलेया परमेश्वरए फिर बिश्वास आलबै म्हिँ दिमाग आरेब् ग।

^b १२:२३ मतलब, जिवन ते ज्यु परमेश्वरजी पिँबे दानमैँ ग, चदक्या चब्-खेब् बन्दा परमेश्वरए लिलि प्रब थेबै ताँ ग। ^c १२:३१ नसों परमेश्वरए ग्याल्स म्हैद् मतलब मुँ दोले थिँ मादिद्, मतलब माया लइर थिए ताँ मादिद्।

आफैए केब्लैमैं प्हेमैं दोले टिबै माल तिभिइर चबै माल चल् पिम्। 38 तिं क्लहे म्हुँडँस आदार खलेया च बन्दा कहैल्ले खलेया थिए केब्लैमैं न्हरु आचहुइल्ले टिदिब स्यास्याँ च केब्लैमैंड भन् स्याबासि योँब्मुँ।

39 “अभै चु ताँ सैर मैँडर थैन्, यो कति त्हेर खम् बिइर सेस्याँ तिं क्लहे न्हरु आचहुइल्ले टिदिमलो, धाइर यो तिं न्होर होल् आपिमलो। 40 छलेन केमैं या न्ह क्रों मि क्रोंले टिड्, तलेबिस्याँ केमैए सैरै आमैबै त्हेर म्हिए चह तायुब्मुँ।”

41 येशूए ताँ थैडर पत्रुसइ बिइ, “ओ प्रभु, चु अहानु डिए लागिर मत्त्रे बिल् उ, अरू म्हिमैए लागिरै बिलो?”

42 प्रभु येशूजी बिइ, “भर लल खाँब ते बुद्धि मुँबै म्हि सु जा? तिं क्लहेइ आफैए तिँबै ताँड मालए जिम्मा पिँडर याबै लिसों भर लल खाँब ते बुद्धि मुँबै म्हिइ अरू केब्लैमैं चब् थुँबै तौदु छेनाले लमिम्। 43 तिं क्लहे ताखमाले आफैजि लहैदिबै के केब्लैइ छेनाले लदिब स्याइबिस्याँ च केब्लैइ स्याबासि योँब्मुँ! 44 होलिन् ड केमैदे बिम्, क्लहेइ आफैए तिँबै ताँड सै न्होरए जिम्मा चलाइ पिँब्मुँ। 45 छैँबिलेया च केब्लैइ ‘डए क्लहे खब कहैलै तोगोन् आखालै,’ झूँडर अरू केब्लैमैं दोले, ता चच झूँमुँ चब, पा लेदै थुँडर म्हेरल्ले टिड् बिस्याँ, 46 चए सैरै आमैबै त्हेर थाइ आसेल्ले तिं क्लहे फेखब्मुँ, धाइर च सजैँ पिँब्मुँ। चदक्या चए गति परमेश्वर आमादिब्मैल् दोंब तब्मुँ।

47 “आफैए क्लहेए सैँबै ताँ कहोलैया थिए सैर मैँब दोँ आलब्मैँड बेल्ले दुःख योँब्मुँ। 48 छैँबिलेया तिं क्लहेए सैँबै ताँ आकहोइर लेदै सजैँ योँल् पर्दिबै के ललैया चइ च्युगुदे मत्त्रे सजैँ योँब्मुँ। परमेश्वरजी लेदै आशिक

पिँब्मैँदक्याले लेदै ह्निब्मुँ, छलेन लेदै मालए जिम्मा पिँब्मैँदक्याले भन लेदै किँब्मुँ।

ड किहल् लबर युब आडिं, आकिहल् लबर युब क।

49 “ड आछचाँबै मालमैं खोंबै लागिर पृथबीर मि भोर कुमिँबर युब । च मि नसोंदक्या त्हेवास्याँ छचाँब तमलो। 50 डइ किँल् पर्दिब थैबै दुःखबै बप्तिस्मा क्रिहेँ मुँ, च बप्तिस्मा आकिँन् समा डए सैँ छिँ आडूँ।

51 “ड पृथबीर किहल् लबर युब क बिइर केमैँड मैँल् आ? ड केमैँदे बिम्, किहल् लबर युब आडिं, बरू आकिहल् लबर युब क। 52 तलेबिस्याँ तारेदक्या म्हि ड्हौलो मुँबै परवार आ-आफैए न्होँर्न आकिहइर थैमैँए पार्लेन् टिब्मुँ। सौँलोए फिर ड्ह्यौलोइ बिरोध लब्मुँ, चदक्या ड्ह्यौलोए फिर सौँलोइ बिरोध लब्मुँ। 53 चमैँ आ-आफैए पारन् तब्मुँ।

आबाइ चहए बिरोध लब्मुँ,
चहइ आबाए बिरोध लब्मुँ।
आमाइ चमिँए बिरोध लब्मुँ,
चमिँड आमाए बिरोध लब्मुँ।
स्युमिँड चोँए बिरोध लब्मुँ
धाइर चोँड स्युमिँए बिरोध लब्मुँ।”

च त्हे खैले खम् बिइर क्हाब

54 येशूजी म्हि हुलदे बिइ, “केमैँड म्हस्यो ल्हुदक्या (पश्चिमदक्या) रेब् प्रोँमाले ‘नाँ युलै’ बिम्। चदक्या छैँलिन् तम्। 55 चदक्या दक्षिणदक्या नम्रो खब् सेइर केमैँड ‘बेल्ले

रुवाललै बिमुं।' चदक्या छैलिन् तम्।⁵⁶ ओ फिब्लो पार्दिबमै! पृथबी ते मुं च्योइर तारे तो तम् बिइर केमैइ सेम् बिस्यां, तिन्हग तदिबै तामै प्रोइर केमैइ तारे तखबै तामैए बारेर तले सेल् आखाँलो?

केमै युनन् किहल् पर्दिम्

⁵⁷“होलिन्बै तां ता जा? बिइर केमैइ तले आकहोलो? ⁵⁸क्योदे आक्हिबै म्हिइ निसाफ लबै म्हिए उँइर क्यो बोमाले खाँन् समा क्यॉन किहबै तां लद्, छ आलस्यां चइ क्यो नियाधिश डार चैइर बोबुं। चदक्या नियाधिशइ क्यो थैबै अफिसरए योर पियाबुं। चदक्या अफिसरइ क्यो भेलर च्युयाबुं। ⁵⁹ड क्योदे बिमुं, क्योइ फोल् पर्दिबै मुइ क्रिहें-क्रिहेंले आफोन् समा क्यो खैलसे या भेलदक्या त्हांल् योदिब आरे।”^a

परमेश्वरउँइ सै ताइर आखस्यां नास तयाबुं

13 “गालील ह्युलबै को-कोइ म्हिमैइ यरूशलेम सहरबै मन्दिरर परमेश्वरए मिर क्यु सैइर खो पिंमाले पिलातस बिबै रोमी क्रथेइ चमै सैइर च म्हिमैए को खो पिबै क्युए कोर कोवाल बिइर च त्हेर चर खागु तबै म्हिमैइ येशूदे,” बिइ।

²छबिमाले येशूजी चमैदे बिइ, “चमैइ छैलि फाडिन् तबै दुःख योइ बिबर्न अरू गालीलथेमै बन्दा चमै पापि मुंमै बिइर केमैइ मैल् आ? ³ड केमैदे बिमुं, छले आडिं। ताँइ

म्हिमै पापि मुं। केमैइ दुष्ट के लब् आपिइ बिस्यां केमै या छैलिन् नास तबुं। ⁴चदक्या अको तां, सिलोआम बिबै क्ल्हयोबै धरर फुयाइर च्युसे प्रेउलो म्हि सियालो। चमै या अरू यरूशलेमथेमै बन्दा लेदै पापिमै तइर सिब आ? ⁵ड केमैदे बिमुं, छले आडिं, ताँइ म्हिमै पापि मुं। केमैइ दुष्ट के लब् आपिइ बिस्यां केमै ताँइ छैलिन् नास तबुं।”

रो आरोबै सिदुं

⁶च लिसो येशूजी चु अहान् बिइ, “म्हि क्रिहेंइ आफैए प्रार तुँबु दुं क्रिहें रुँइलो। च दुँ रो रोइ उ बिइर च च्योबर खब्ले लमलो। खोंयो खलैया च दुँ रो आरोब प्रोइर ⁷चइ के लबै म्हिदे ‘डइ चु तुँबु दुँ रो म्हेब सोदिं तइ, छैबिलेया खैमैइ रो आरो। क्ल्हयो पैबर तले थेंदिब? छतइर चु दुं थोवाद,’ बिइ।

⁸“छैबिलेया के लबै म्हिइ बिइ, ‘ओ चिब, अभै तिदिंदे चु दुँ आथोले। डइ चु दुँए जरर ताइर मल चोम्। ⁹कहुरिमा रो रोइबिस्यां छचाँबन् तइ, आरोइ बिस्यां थोइ भ्योयाले।”

येशूजी प्रिबै त्तिंइर क्वार तबै चमिरि फैल् लमिं

¹⁰तिगै प्रिबै त्तिंइर येशू च्हों तिं क्रिहेंर लोमिसिन् मुँलो। ¹¹चर मोइ स्याइर नबै चमिरि क्रिहें मुँलो। च मोइ स्याइर नब च्युसे प्रेदिं तयालो। च क्वार् तयालो, ठाड्ले प्रल् आखाँमलो। ¹²येशूजी च चमिरि प्रोइ, धाइर

^a 12:57-59 चु ताँए मतलब, डचो ताँइ परमेश्वरए उँइर राल् पर्दिम् धै डचोएइ आछचाँबे के लमाले परमेश्वरजी सजै पिबुं। छतइर डचोएइ युनन् आछचाँबे बानि पिसि परमेश्वरदे किहल् पर्दिम्।

उडर बिड़। “ओ नानि, कयों ठाड़ तल् आपिंबै माल त्हांयाँइ, तारे कयों ठाड़ तल् खाँम्।”
 13 जगो बिड़र येजूजी आफैँए यो चए फिर थेंबै बितिकन् च चमिरि ठाड़ तइ धाड़र परमेश्वरए मिं क्वेबर होंइ।

14 येजूजी प्रिबै त्हिँइर च चमिरि फैल् लमिंब् प्रोंइर च्हों तिंबै चिब बेल्ले सु खइर चर्बै म्हिमैदे बिड़, “के लब टुरो मुँ, छतइर च टुरो न्होर खइर सस्याँ तम्। प्रिबै त्हिँइर छ लब आत।”

15 छैंबिलेया प्रभु येजूजी चदे बिड़, “ओ फिब्लो पार्दिबमैँ! केमैँए न्होरि सुज्यै या प्रिबै त्हिँइर आफैँए गधामैँ ते क्ल्यामैँ प्हांदक्या पिड़र क्यु थुँबर आबो आ? 16 चु अब्राहामए कुलबैँ चमि च्युसे प्रेदिं समा दुष्टइ फैथेंबै फैसों प्रिबै त्हिँइर प्लमिंब् पार्दिब् आडिं आ? 17 येजूजी चु ताँ बिल् खाँबै लिसों थिए बिरोधिमें ताँइ फाफेन् तयाइ। छैंबिलेया थीजी लबै औदिबै के प्रोंइर चर्बै म्हिमैँ बेल्ले सैं तोइ।”

पासगि प्लुए ताँ

18 येजूजी बिड़, “परमेश्वरए ग्याल्स ता दों तब मुँ? उइ ता सैदे च च्हैले? 19 च च्युगुथिरि पासगि प्लु दोंन् तब् क। म्हि क्रिहेंइ च प्लु आफैँए प्रोंर बोइर प्लुइ। चदक्या च फारइर सिं दुँ दोंले थेब तइ। धाड़र मुर्बै नमेमैँइ चए हाँगजरे च्हों थाइ।”

प्लेढाए ताँ

20 येजूजी दबै बिड़, “परमेश्वरए ग्याल्स उइ ता मालदे च्हैले? 21 च प्लेढा दों तबै माल क। चमिरि क्रिहेंइ क्हें चोंबै प्रो सोब्योर प्लेढा म्लोइर थेंमाले लिसों च ताँइ क्हें फुल्दिम्।”

रुबै प्रा

22 च लिसों येजू सहर सहर नाँ-नाँसर याइर म्हिमैँदे परमेश्वरए ताँमैँ लोमिंदै यरूशलेम उँइ याइ। 23 छले यादिमाले म्हि क्रिहेंइ थीदे “ओ गुरु, च्युगुदे म्हिइ मत्त्रे खैमैँइ आखाँबै छ्ह यॉम्मा?” बिड़र उचोएइ।

24 येजूजी चमैँदे बिड़, “रुबै म्नादक्या न्होर होंबै भों लद्, तलेबिस्याँ उ केमैँदे बिम्मुँ, लेदै म्हिमैँ रुबै म्नादक्या न्होर होंल् म्हैब्मुँ, छैंबिलेया होंल् खाँदिब् आरे। 25 तिं क्ल्हे रेइर प्रा तोरयाबै लिसों केमैँ बैरु राइर प्रा हादै ‘ओ प्रभु, प्रा थोमिन्,’ बिम्मुँ, छैंबिलेया ‘केमैँ खनिदक्या खलो उइ केमैँ डो आसे,’ बिड़र थीजी बिम्मुँ।

26 “च त्हेर केमैँइ ‘उइ क्योदे बालु चमलो थुँमलो। चदक्या डिए नाँसजरे क्योँजी लोमिंमलो,’ बिम्मुँ।

27 “छैंबिलेया ‘केमैँ खनिदक्या खलो उइ आसे। ओ दुष्ट के लबमैँ, उ दाक्या हेंगो तयाद् बिड़र च क्ल्हेइ केमैँदे,’ बिम्मुँ।

28 “चदक्या परमेश्वरए ग्याल्सर^a त्हम्द अब्राहाम, इसहाक, याकूब ते अगमबक्तामैं टिदिब केमैइ प्रोब्मुं। छैंबिलेया परमेश्वरजी केमै बैरु भ्योयाब्मुं, चदक्या केमै क्रो-क्रोइर स ह्वाब्मुं।²⁹ पूर्व, पश्चिम, उत्तर ते दक्षिणदक्या लेद म्हिमैं खइर स्वर्गबैं^b भत्यारर टिब्मुं।³⁰ डेंन! तोगो लिसों तब्मैं नसों तब्मुं, धाइर तोगो नसों तब्मैं लिसों तब्मुं।”

31 च त्हेर्न को-कोइ फरिसीमैं येशू डारं खइर थीदे बिइ, “चुदक्या याहद् तलेबिस्यां हेरोद मुंइ क्यो सैल् म्हेइमुं।”

32 येशूजी चमैदे बिइ, “‘तियां ते प्हेंना मोइ स्याइर नब्मैं ते अरू बेथाइ नब्मैं डइ फैल् लसिन् मुं, नोगि मत्त्रे डए के खांम्’ बिइर च सेल हेरोददे बिने।³³ ‘तिं, न्हाग ते नोगि या ड चु जरेन् प्रल् पर्दिम्। तलेबिस्यां यरूशलेम बाहेक अरू क्ल्ह्योर अगमबक्तामैं सैल् आखां।’”

येशूजी यरूशलेमथेमैए फिर ल्हय खब

34 चदक्या येशूजी बिइ, “यरूशलेमथेमैं, ओ यरूशलेमथेमैं, केमैइ अगमबक्तामैं सैयाइमुं, छलेन केमैं डारं खब्मैलाज्यै या युंमइ प्रिइ। नग आमाइ प्हेसेमैं प्ठ्याइ हुब् दोले डइ लेदै खे केमैं हुल् म्हेइ, छैंबिलेया केमैं आडिं।³⁵ च्योद्! तारे केमैए सहर परमेश्वरजी नास लवाब्मुं। ड केमैदे बिमुं, केमैइ ‘परमेश्वर आबाजी कुल्मिंबै म्हिए

मान तदिगे’ आबिन् समा केमैइ ड प्रोदिब् आरे।”

येशू फरिसीए तिर याब

14 तिगैं प्रिबै त्हिंइर येशू फरिसी क्रिहेंए तिर चब् चबर याइ। च म्हि फरिसीमैं न्होबैं चिब मुंलो। “येशूजी ता-ता लमगे?” बिइर म्हिमैइ छैं लदिलो।² च त्हेर्न यो प्हले रोंबै म्हि क्रिहें येशूए उँइंसो मुंलो।³ “प्रिबै त्हिंइर नबै म्हिमैं फैल् लब ठिक मुं उ आरे? बिइर येशूजी धर्मगुरुमैं ते फरिसीमैदे डचोएइ।”

4 छैंबिलेया चमैइ ताइ बिल आखां। येशूजी च यो प्हले रोंइर नबै म्हिए फिर यो थेंइर च फैल् लमिंइर कुल्मिंइ।⁵ च लिसों येशूजी चमैदे बिइ, “केमैं न्होरि सुलैया प्रिबै त्हिंइर क्ल्या खोल्सर पायस्यां केमैइ खोल्सदक्याले आते रो आ?”⁶ चमैइ चु तारै या ताइ ज्वाफ पिंल् आखां।

7 च फरिसीए तिर खबै प्हेमैइ चिब्मैं कुंबै छ्यां-छ्यांबै क्ल्ह्यो त्हाँदिब् प्रोइर येशूजी चु अहान् बिइ,⁸ “केमैं ब्ह्या भत्यारर यामाले छ्यांबै क्ल्ह्योर आकुंन्, तलेबिस्यां क्यो बन्दा थेबै म्हि च निम्तोर खल् खांम्।⁹ निम्तो लबै म्हिइ क्योदे ‘चु क्ल्ह्योर चु म्हि कुंल् पिंन् बिस्यां’ क्यो फाफेन् तइर ताँइ बन्दा च्योब्मैए क्ल्ह्योर कुंल् पर्दिब्मुं।¹⁰ छतइर सुज्यै क्यो निम्तो लइ बिस्यां ताँइ बन्दा च्योब्मैं टिबै क्ल्ह्योर याइर टिद्।

^a १३:२८ ग्रीक क्युइरि, परमेश्वरए ग्याल्सर

^b १३:२६ ग्रीक क्युइरि, परमेश्वरए ग्याल्सर

चदक्या निम्तो लबै म्हि खइर क्योदे 'ओहो, डए थु, चु छचाँबै क्ल्ह्योर कुँन' बिब्मुं, च त्हेर क्योदे बालो मुँबै प्हेँमैए उँइँसो क्योड मान योँब्मुं।¹¹ तलेबिस्याँ आफैँ थैब प्हेँबै म्हिमैँ परमेश्वरजी च्योब लब्मुं, छैँबिलेया आफैँ च्योने तइर टिब्मैँ परमेश्वरजी थैब लमिँब्मुं।”

¹² छलेन थीदे निम्तोर उइबै म्हिलाज्यै या येशूजी बिइ, “क्योड भत्यार लमाले आफैँए थुमैँ, हजे-म्हजे, आगें-अलि आफैँए म्हिमैँ ते प्लबै इहेब-ट्हुब्मैँ निम्तो आलद्, तलेबिस्याँ चमैँज्यै क्योँ निम्तोर उइब्मुं, धाइर खि फोब् दोँन तब्मुं।¹³ बरु भत्यार लमाले झूँदुमैँ, डुँडमैँ, खोडमैँ ते कनमैँ उइद्।¹⁴ छ लस्याँ क्योँड आशिक योँब्मुं। तलेबिस्याँ क्योँए खि चमैँइ फोल आखाँ। छैँबिलेया परमेश्वरजी बिब मादिबै म्हिमैँ सिइर दबै सोगोँ तमाले आयोँब्मैँदे पिँबै मालए खि परमेश्वरजी क्योँ पिँब्मुं।”

थेबै भत्यारए अहान्

¹⁵ चु ताँ डेंडर येशूदे बालो चबर टिब्मैँ न्होबैँ म्हि क्रिहेंड थीदे बिइ, “परमेश्वरए ग्याल्सबैँ भत्यार चल योँब्मैँ इहो सब्मैँ क।”

¹⁶ येशूजी चदे अहान् क्रिहें बिइ, “म्हि क्रिहेंड बेल्ले थेबै भत्यार लइर लेदै म्हिमैँ उइ।¹⁷ भत्यार चबै त्हेर च म्हिइ निम्तो योँब्मैँदे 'भत्यार तयार तइ तारे चबर खो' बिइर उइबर कुलइ।

¹⁸ “छैँबिलेया चमैँ ताँनइ निउ क्रिहें लबर होंइ। नसोँ त्होबै म्हिइ 'डलम् प्रोँ किँडमुँ छतइर ड च प्रोँ च्योबर याल् पर्दिम्। माफ

ल् ओ ड खल् आखाँ,' बिइ।¹⁹ चदक्या अकोँड 'डइ कल्या इहगुर किँडमुँ, छतइर ड कल्या क्योब च्योबर ह्याब्लि छेइमुँ। माफ लद् ओ ड खल् आखाँ,' बिइ।²⁰ छलेन अकोँज्यै या 'डल भर्खर ब्ह्या लइमुँ, छतइर ड खल् आयोँ,' बिइ।

²¹ “चदक्या के लबै म्हि ताखइर ताँइ ताँ आफैँए क्लहेदे बिइ, छतइर तिँ क्लहे सु खइर के लबै म्हिदे बिइ, 'तारे युन्ले सहरर याद् धाइर सहरबैँ क्योँए रेजरबैँ झूँदुमैँ, डुँडमैँ, खोडमैँ ते कनमैँ उइर बखो,' बिमाले के लबै म्हि दबै उइबर याइ।

²² “के लबै म्हि ताखइर बिइ, 'ओ चिब, क्योँड उइ बखो बिबै म्हिमैँ डइ उइ पखइ। छैँबिलेया भत्यारर टिबै क्ल्ह्यो अफैँ मुँ।’

²³ “दबै तिँ क्लहेड के लबै म्हिदे बिइ, 'डए तिँ प्लिँबैँ लागिर सहरबैँ क्योँए रेजरे खन्तोँदोँन याइर चबैँ ताँइ म्हिमैँ कर ल्हैदिइर बखो।²⁴ छेनाले डेंन्! नसोँबैँ निम्तो योँब्मैँ न्होरि सुज्यै या डए भत्यारबैँ चबैँ मालमैँ कति सब मुँगे बिइर म्ह्योँल् योदिब् आरे।”

येशूए चेलामैँइ फोल् पर्दिबै नोँ

²⁵ म्हि हुल येशूदे बालो यादिमाले थीजी लिँसोँ तोइर चमैँदे बिइ, ²⁶ “डए लिलि खब्मैँइ आफैँए बा, आमा, प्हेँस्यो, प्हसेमैँ, अलि-अडामैँ ते आफैँए ज्यु या ता दोइ आडूँ बिस्याँ च डए चेला तल् आखाँ।²⁷ सुइ आफैँए कूस नोइर डए लिँसोँ आप्र च डए चेला तल् आखाँ।¹

²⁸ “केमैँ न्होरि सुज्यै या तिँ बनेबैँ सैँ लस्याँ 'तिँ बनेबैँ लागिर खर्ज कति ल्हैदिम्? डदे

^a १४:२७ आफैँए कूस नोइर डए लिलि आप्र मतलब, चेला तबैँ लागिर प्रभुए लागिर ज्यु सुम्पिदिइर सिल् पर्दिलेया तयार तल् पर्दिम्।

मुँबै मुइइ योम् उ आयो?’ बिइर नसोन् चइ बिचार आल रो आ? ²⁹ बिचार आलस्यां चइ जग मत्त्रे चोइर तिं प्हें सैल् आखांस्यां प्रोब्मै तांनइ क्यो प्हेब्मुं। ³⁰ ‘चु म्हिइ तिं बनेबर होइ छैबिलेया तिं प्हें सैल् आखां बिइर चमैइ,’ बिब्मुं।

³¹ “चदक्या अर्को तां: मुँ क्रिहेइ अर्को मुँदे नेबर यामाले ‘डए हजार च्यु फौजइ ड्हुस्यु हजार फौज ट्हुल् खांम् उ आखां बिइर चइ नसोन् आमै रो आ?’ ³² आफैदे बालो भो आरेस्यां अर्को मुँ हेंगोन् मुंमाले चइ क्हिबै लागिर म्हि कुलब्मुं। ³³ छतइर केमैए न्होरि सुइ आफैदे मुँबै मालमै आवथे च डए चेला तल् आखां।

आङ्गाँबै चज

³⁴ “चज छचाँबै माल क, छैबिलेया चजए स्वाद म्हयाइ बिस्यां दबै चए स्वाद तोइ खल् लब? ³⁵ च म्हिमैए लागिर केर आफे सए लागिरे या मल आत। छतइर च स्वाद आरेबै चज म्हिमैइ भ्योयाम्।

“उँबै न्ह मुँबैइ थेदिगे।”

म्हयाबै क्यु

15 तिगै रोमी मुँए लागिर बालि रेब्मै ते अरू आछचाँबै के लब्मै^a थिए तां डेंबर थिए डार खलो। ² छैलि प्रोइर फरिसीमै ते शास्त्रिमैइ “चु म्हिइ आछचाँबै के लब्मै या

मन पूदिमै। चदक्या चमैदे बालोन् चब् थुँब् लमन बिइर,” गनगन लबर होइ।

³ छतइर येशूजी चमैदे चु अहान् बिइ, ⁴ “केमै न्होरि सुलेया क्यु प्र मुइबिस्यां च क्यु प्रए न्होरि क्रिहें म्हयास्यां चइ कुच्युसे कु क्यु बनर वाथेंइर म्हयाबै क्यु आयोन् समा आम्है रो आ? ⁵ म्हयाबै क्यु योँबै लिसो च कल्हे बेल्ले सैं तोइर क्यु काँदर तेंइर प्होर बोखम्। ⁶ छले प्होर खइर चइ आफैए थुमै ते ड्हेब-ट्हुब्मै उइर ‘ड बेल्ले तोइमुं, केमै या सैं तोन्। तलेबिस्यां डए म्हयाबै क्यु योँइ,’ बिम्।

⁷ “ड केमैदे बिम्, ‘डइ पाप के लइमुं ड क्षमा पिन्,’ बिल् आपर्दिबै कुच्युसे कु धर्मि म्हिमै बन्दा ‘ड पापि मुं, डइ पाप केमै लइमुं, ड क्षमा पिन्,’ बिइर सैं ताबै म्हि क्रिहें प्रोइर परमेश्वर स्वर्गर बेल्ले सैं तोम्।”

म्हयाबै मुइ

⁸ येशूजी दबै अर्को ताँ बिइ, “चमिरि क्रिहेदे चाँदिए मुइ च्युउँलो मुँलो। छैबिलेया चाँदिए मुइ क्रिहें म्हयास्यां चइ बत्ति प्रोइर कुजइ फ्योइर आयोन् समा फन् फन्ले आम्है रो आ? ⁹ च मुइ योँबै लिसो आफैए थुमै ते ड्हेब-ट्हुब्मै उइर ‘ड बेल्ले सैं तोइमुं, केमै या सैं तोन्। तलेबिस्यां डए म्हयाबै मुइ योँइ,’ बिइर चइ बिब्मुं। ¹⁰ ड केमैदे बिम्, च दोलेन् दुष्ट के पिइर थि डाँइ सैं ताइर छचाँबै क्यार प्रबै म्हि क्रिहें प्रोइर परमेश्वरए स्वर्गदूतमै बेल्ले सैं तोम्।”

^a 15:1 आछचाँबै के लब्मै चमै यहूदी ठिम छेनाले आमादि छतइर फरिसीमै ते धर्म-गुरुमैइ हेल लइ।

म्हयाबै चह

11 येशूजी दबै बिड़: “म्हि क्रिहेल चह इह्यौलो मुँलो। 12 चह च्योबइ आबादे बिड़, ‘बा, डए अँश कति योमुँ, च तोगोन् ड पिन्।’ चहइ छ बिमाले आबाइ आफैए सै न्होर चह इह्यौलो चुमिंइ। 13 दे त्हे लिसों चह च्योबइ आफैए अँश चुँवाँइर ताँइ मुइ खागु लइर तिंदक्या त्होयाइ। धाइर हेंगोबै ह्युलर याइर बेल्ले फुर्मास लइर मुइ ताँइ नुवाइ। 14 मुइ ताँइ नुवाल् खाँबै लिसों च ह्युलर थेबै अँङ्गल् तइर च फोत्तेन् तयाइ। 15 छतइर च ह्युलर्बै म्हि क्रिहें डार के म्हैबर याइ। च म्हिइ आफैए प्रोर तिलिमैं छबर कुलइ। 16 तिलिइ चबै मालमैं प्रोँइर च बेल्ले प्रोमलो। छैंबिलेया सुज्यै च चबै माल आपिमलो।

17 “च त्हेर बल्ल चइ आबाए तिं मैँइ। चदक्या चइ बिड़, ‘डए आबाए के लब्मैँइ चब् प्रेन्ले चज्यैया चबै माल डैमलो, ड बिस्याँ चुर चलु आयोँइर सिबर होँइमुँ। 18 तारे ड बा डार याइर आबादे छ बिम्, “ओ बा, डइ क्योए ताँ आडिँइर परमेश्वर ते क्योए बिरोधर आछ्याँबै के लइ। 19 तारे ड क्योए चह बिबै लायकबै आरे। बरु ड क्योए के लबै म्हि क्रिहें दोलेन् क्योँ डार टिल् पिन्,” बिब्मुँ’ बिड़र चए सैर मैँइ।

20 “चदक्या च रेइर बा डार यादिमाले च तिंदक्या हेंगोर खदिब चए आबाइ प्रोँइ। छले आफैए चह खदिब प्रोँइर बा बेल्ले सैँ तोंइर चह डार न्हेयाइर अँउलो खोइर म्वें लइ। 21 चहइ आबादे बिड़, ‘ओ बा, डइ क्योए ताँ आडिँइर परमेश्वर ते क्योए बिरोधर आछ्याँबै के लइ। तारे ड क्योए चह बिबै लायकबै आरे।’

22 “छैंबिलेया आबाइ के लबै म्हिमैं उइर बिड़, ‘युन्ले ताँइ बन्दा छ्याँबै क्वें ते च्या बोखइर चु खेमिन्, जुत्तै या खेमिन्। 23 चदक्या छोबै क्यु साँडे सैइर भत्यार लइर ड्यो बेल्ले सैँ तोंइर चले। 24 तलेबिस्याँ चु डए चह सियालो, सोइर खइ; म्हयालो, योंइ।’ छतइर चमैं सैँ तोंइर भत्यार लइर चब् थुँब लबर होँइ।

25 “च त्हेर चह थेब प्रोर मुँलो। च प्रोदक्या तिंए चेंदो फेखमाले तिंर बाजा हाइर सेब-प्रिब लदिबै कै थेइ। 26 छतइर चइ के लबै म्हि क्रिहें उइर ‘तिंर ता लबर होँइमुँ जा?’ बिड़र ड्योएइ।

27 “के लबै म्हिइ बिड़, ‘क्योए अलि खइमुँ, छले च छेनाले ताखब् प्रोँइर क्योए बा सैँ तोंइर ड्यो बाजा हादै सेइर प्रिँइर सैँ तोंइर चब् थुँब लले बिड़र छोबै क्यु सैइर भत्यार लइमुँ।’

28 “चु ताँ थेइर चह थेब बेल्ले सु खइर तिं न्होर याल् आडिँ। छतइर बा बैरु त्होँइर च वाँबर होँइ। 29 छैंबिलेया चइ आबादे बिड़, ‘जगो लेदै बर्ष समा डइ क्योए केब्लैँइ दोले के लइ। क्योँइ ल्हेदिबै के ता मुँलेया डइ आल! आबिमलो। छैंबिलेया डइ ता योंइ? सैँ तोंल्ले थुमैँदे स्योगैँ चदिगे बिड़र क्योँइ र-चहज क्रिहें या ड आपिं। 30 क्योए सैँ न्होर बोइर ताँइ नुवाबै चह ताखमाले चए लागिंर क्योँइ छोबै क्यु साँडे सैइर जगो थेबै भत्यार लमिंब आ।’

31 “छबिमाले आबाइ चदे बिड़, ‘मुख्या, क्योँम् खोंयोन् बिलै डदे बालोन् मुँ। डदे मुँबै सैँ न्होर ताँइ क्योँलन् क। 32 तिं ड्योइ भत्यार लइर बेल्ले सैँ तोंल् पर्दिम्। तलेबिस्याँ क्योँए अलि सियालो, सोइर खइ, म्हयालेया योंइ।’”

बाठो नाइकेए अहान्

16 येशूजी आफैए चेलामैदे बिइ, “प्लबै म्हि क्रिहेल चाँजो लबै नाइके म्हि क्रिहें मुँलो। चइ आफैए क्लहेए सै न्होर चिहेंवाइ बिइर म्हिमैइ चए फिर छचाब् ल्हैदिलो।

2 “छतइर प्लबै म्हिइ च उइर बिइ, ‘क्योंए बारर डइ डेंबै ताँ ता जा? क्योंइ लबै केए हिसाब डदे पिन्। तलेबिस्याँ तारे क्यों डए सै न्होरए चाँजो लल् योदिब् आरे।’

3 “छतइर च नाइकेइ सैं न्हो-न्हो बिइ, ‘डए क्लहेइ ड केदक्या तेबर होमैं। डइ ताब क्योब लल् आखाँ, म्हिमैदे ह्मिइर चब् बिलेया ड फाफेम्। 4 छतइर तारे डइ ता लल् पर्दिम् डइ मैल् खाँइमुँ। केदक्या तेवाबै लिसों डइ छयाँबै थुमैदे डो सेब् मिं सेब् लल् पर्दिइ। चदक्या क्लहेइ ड केदक्या तेवाबै लिसों च थुमैइ थेंमैए तिर ड मान लब्मुँ।’

5 “च लिसों चइ क्लहेए असामिमैं क्रिहें क्रिहेले उइर नसों खबै असामिदे ‘डए क्लहेदे फोल् पर्दिबै छे कति मुँ?’ बिइर डचोएइ।

6 “चइ बिइ, ‘हजार सों लिटर जैतूनए छच्युग फोल् पर्दिम्।’

“नाइकेइ चदे बिइ, ‘क्योंए तमसुकर तारे हजार ग्मिसे ड्हप्र मत्त्रे प्हिद्।’

7 “चदक्या चइ अर्कोदे बिइ, ‘क्योंइ कति फोल् पर्दिम् बिमाले।’

“च म्हिइ बिइ, ‘ड्मिप्र म्हुरि गहुँ फोल् पर्दिम्।’

“नाइकेइ च म्हिदे बिइ, ‘क्योंए तमसूकरै या प्रसे टुच्यु म्हुरि मत्त्रे प्हिद्।’

8 “च बेमान लबै नाइकेइ छले असामिमैंए छे च्युगुदे लमिंइ बिब् सेइर च क्लहेइ नाइके बाठो मुमैं बिइर सेइ। तलेबिस्याँ चु ह्युलबैं म्हिमैइ आफैए थुमैदे के लमाले चारबै ह्वे योंबै परमेश्वरए सन्तानमैं बन्दा बेल्ले बाठो तम्।

9 “ड केमैदे बिमुँ, आफैए लागिण ह्युलबैं सै न्होरदक्या क्लहेबै थुमैं बनेद्। छ लस्याँ केमैंए मुइ नुयाबै त्हेर चमैइ केमैं स्वर्गर स्वागत लब्मुँ।”^a

10 येशूजी दबै बिइ, “च्युगुथिरि ताँर भर लल् खाँबै म्हि थेब् थेबै ताँर या भर लल् खाँब तम्। छैंबिलेया च्युगुथिरि ताँर बेमान लबै म्हि थेबै ताँर या बेमान तम्। 11 छतइर केमैं ह्युलबैं सै न्होरर भर लल् खाँब आतइ बिस्याँ, स्वर्गबैं खेमैइ आखाँबै सै न्होरए जिम्मा केमैदे सुइ पिंमुँ? 12 केमैं अरूए सै न्होरर भर लल् खाँब आतइ बिस्याँ, केमैंजिन् योल् पर्दिबै सै न्होर सुइ पिंमुँ? सुज्यै आपिं।”

13 येशूजी दबै बिइ, “सुज्यै या ड्ह्यौलो क्लहेए के तिखेर्न लल् आखाँ। तलेबिस्याँ चइ क्रिहेदे हेल लमुँ, चदक्या अर्कोदे माया लमुँ। छलेन क्लहे क्रिहेइ बिब छेनाले डिमुँ, अर्को क्लहेदे ता दौड आड्ढाँ। च दोलेन् केमैंज्यै या परमेश्वर ते मुइए सेवा तिखेर्न लल् आखाँ।”

14 येशूजी बिबै ताँ थेइर फरिसीमैइ थि प्हइ। तलेबिस्याँ चमैंए लागिण मुइ थेबले माल मुँलो। 15 दबै येशूजी चमैदे बिइ, “केमैं म्हिमैंए उँडँसो ‘ड छयाँब धर्मि म्हि क’ बिइर थेब् प्हैम्। छैंबिलेया केमैंए सैं न्होर ता मुँ बिइर परमेश्वरजी सेम्। म्हिमैंए सैर थेबले

^a 16:9 चु ताँए मतलब, चु नाइके बाठो तइर आफैइ योंबै हगद क्या ह्युलबैं थुमैं बनेइ। छलेन म्हिमैइ परमेश्वरए फिर बिश्वास लइर चमैं डचोए थुमैं तदिगे बिइर डचो चु ह्युलर मुँमले डचोए सै न्होर ते डचोइ योंबै हगद क्या परमेश्वरए के लले। छलस्याँ डचोए सै न्होर नुयालेया डचो स्वर्गर फेनल् योंब्मुँ।

झूँबे माल परमेश्वरए उँइंसो ताइ आडिंबै माल क।

16 “बप्तिस्मा पिंबै यूहन्नाए पलो समा तह्मद परमेश्वरजी मोशादे पिंबै ठिम ते अगमबक्तामैइं प्हिबै छ्वे मत्रे मुँलो। च त्हेदक्या तिं समा ‘परमेश्वरजी ग्याल्स लबर होइमुँ। छतइर थी मादिद, छ लस्यां थीजी केमैए फिर आशिक पिंब्मुँ,’ बिइर परमेश्वरए ग्याल्सबै सैं तोंबै ताँ^a बिइर प्रइमुँ। छतइर ताँइ म्हिमै आफैइ खाँन् समा भों लइर परमेश्वरए ग्याल्सए न्होर होम्।¹⁷ छैंबिलेया मु ते पृथ्वी म्हायाल् खाँम्, परमेश्वरए छ्वे प्हिबै ताँ क्रिहें या आम्ह।

18 “छतइर आफैए प्हैस्यो वाइर अर्कोदे ब्ह्या लबै म्हिइ ब्यभिचार लम्। छलेन पार लबै चमिरिदे ब्ह्या लबै मुँयुँज्यैया ब्यभिचार लम्।”

प्लबै म्हि ते लाजरस

19 येशूजी दबै बिइ, “छैलि प्लबै म्हि क्रिहें मुँलो। चइ सै लेदै फेबै छचाँबे क्वेमैं खेमलो। त्हिंइ क्होंसे स-सबै चबै मालमैं चइर मजाले त्हिंइ थोमलो।²⁰ छैंबिलेया लाजरस बिबै झूँदु म्हि क्रिहें मुँलो। चए ज्यु भरिन् पोर मुँलो। छतइर अरू म्हिमैइ च प्लबै म्हिए तगारर बोखइर थेमिमलो।²¹ ‘प्लबै म्हिइ चब् चमाले सर तेयाबै क्हें ठाँड-ठुँडे चल् योम् उ?’ झूँइर लाजरस डाँइ च्योदिमलो। छैंबिलेया चल् आयोमलो, च मत्रे आडिं, नइमैं खइर चए पोरमैं ल्हैमलो।

22 “तिगैं लाजरस सियाइ। धाइर स्वर्गदूतमैं युइर च स्वर्गर अब्राहामए क्वेंदर बोइ^b चदक्या च प्लबै म्हि या सिइर म्हिमैइ पावाइ।²³ च नर्गर फेनेइर बेल्ले दुःख योमाले चइ कैडो स्वर्गदक्या च्योइ छले च्योमाले हेंगोदक्या अब्राहाम ते चए क्वेंदर लाजरस कुँदिब प्रोइं।

24 “चइ कै तेइर बिइ, ‘ओ बाज्यू अब्राहाम, डए फिर ल्हय खइर लाजरस ड डार कुल्मिन्। चए योरि क्युर प्लुइर डए सुँर चोमिदिगे। तलेबिस्या चु मिए राबर ड थेबे दुःख योदिइमुँ।’

25 “छैंबिलेया अब्राहामइ बिइ, ‘बाबु, क्योइ मैन्। क्योए छहर छचाँ-छचाँबै मालमैं योइर क्योइ सुखले छह थोइ। लाजरसइ बिस्याँ दुःखै दुःखर छह थोइ। दुःख योलेया चइ परमेश्वर मैइ, क्योइ बिस्याँ परमेश्वर खैमैइ आमैं, डम् डन बिइर टिइ। छतइर तोगो लाजरसइ चुर सुख योइमुँ, क्योइ बिस्याँ चर दुःख योइमुँ।²⁶ चुबै म्हिमैं चुदक्या चर याल् आखाँदिगे, धाइर चबै म्हिमैं या चुर डि डार खल् आखाँदिगे बिइर केमैं ते डिए माजोरि बेल्ले थेबे गैरु होल्दो मुँ।’

27 “छबिमाले च प्लबै म्हिइ बिइ, ‘छ बिस्याँ, ओ बाज्यू, ड यो छचुँ लम् क्योइ लाजरस डए आबाए तिंर कुल्मिन्।²⁸ तलेबिस्याँ डए त्येमैं डुहौलो चर मुँ। चमैं या चु नर्गर आयुदिगे बिबै लागिर लाजरस याइर चु दुःख योबै क्ल्ह्योए बारेबै ताँ चमैदे बिमिदिगे।’

29 “छैंबिलेया अब्राहामइ बिइ, ‘चमैदे बालो तह्मद मोशा ते अगमबक्तामैइं प्हिबै

^a १६:१६ ग्रिक क्युइर परमेश्वरए ग्याल्सए बारे

^b १६:२२ अब्राहामए क्वेंदर बोइ परमेश्वरजी थिए ताँ क्वेब्मेए लागिर स्वर्गर भत्यार पिंब्मुँ। च भत्यार ताँइ बन्दा थेबे म्हि अब्राहाम तब्मुँ। छले मान योबै प्हें अब्राहामए क्वेंदर टिब्मुँ।

छूवे मुँ। चमैइ च छ्वेर प्हिबै तामै छेनाले खेदिगे, थेदिगे।’

30 “च प्लबै म्हिइ दबै बिइ, ‘आडिं, बाज्यु अब्राहाम, चमैइ प्हिबै ताँ आपतेलै या सियाबै म्हिमैदक्या क्रिहें सोगों तइर चमै डाँर याइ बिस्याँ बल्ल चमैइ आफैँ आछचाँबै केमैदक्याले सैं ताइर परमेश्वरए ताँ पतेब्मुँ।’

31 “छैबिलेया अब्राहामइ चदे बिइ, ‘मोशा ते अगमबक्तामैए ताँ आपतेस्याँ म्हि क्रिहें सिबदक्याले सोगों तइर चमै डाँर यामै बिलै चमैइ पतेदिब् आरे।”

आछचाँबै के माफ पिंभ

17 येशूजी आफैँ चेलामैदे बिइ, “म्हि पापर चहोवाबै मालमै खैलसेया खब्मुँ, छैबिलेया आछचाँबै पाप केमै लबर ल्हैदिबै म्हिइ थेबै सजै योब्मुँ।² चु च्युगुथिरि कोलोमै दो तबै म्हि क्रिहें पाप के लबर ल्हैदिस्याँ च म्हिइ सजै योब् बन्दा चए खरिर हेंदो च्योइर मा ड्युँइर भयोयाब् चए लागिण छचाँब तब्मुँ।³ छतइर आफैँ बारेर न्ह क्रों मि क्रोले टिद्।

“क्योए अलिइ क्योए फिर आछचाँबै के लइबिस्याँ चलाइ छचाँबै सुँइ लोदा सैदा लद्, चदक्या ‘डइ पाप लइ ड माफ पिंन्,’ बिइर चइ बिस्याँ माफ पिंन्।⁴ क्योए अलिइ क्योए फिर तिगैर डिखे समा आछचाँबै के लमै बिले डिखेन् क्योँ डाँर खइर ड ‘माफ पिंन्’ बिस्याँ क्योँइ च माफ पिंल् पर्दिम्।”

⁵ कुल्मिंबै चेला चिम्बैइ प्रभुदे बिइ, “ओ प्रभु, डिए बिश्वास बडिमिन्।”

⁶ प्रभु येशूजी बिइ, “केमैदे पासगिए फुँ दोँ प्रेथेबै च्युगुथिरि मत्त्रे बिश्वास मुँ बिस्याँ ‘चु

काफलए दुँ मा ड्युँइर रुँइयाद्,’ बिलै चइ डिंब्मुँ।”

⁷ येशूजी दबै बिइ, “केमै सुज्यै या आफैँए के लबै म्हि प्रोंर के लइर र-क्यु छइर तिर खबै बितिकन् चदे युन्ले ‘कै चबर खो,’ बिम् रो आ? ⁸ छ बिबै साटोरि बरु ‘क्रेर फगि खेइर डए लागिण युन्ले कै, ट्हा ह्योइर ड चल् पिंन्। डइ चल् खाँबै लिसों मत्त्रे क्योँ चद्,’ आबि रो आ? ⁹ क्ल्हेइ ल्हैदिबै के लमै बिले क्ल्हेइ केब्छेंदे धन्यबाद पिंम रो आ? आपिं। ¹⁰ छलेन क्हेमैज्यै या आफैँदे ल्हैदिबै ताँइ केमै लल् खाँइर ‘डि केर आफेबै केब्छें क, डिइ लल् पर्दिबै के मत्त्रे लइमुँ।’ बिद्।”

कोर खबै म्हिमै फैल् लर्मिंभ

¹¹ येशू यरूशलेम सहर उँइ यामाले सामरिया ते गालील ह्युलए साँददक्या तइर याइ। ¹² येशू नाँस क्रिहेंर फेबि छेमाले चर थीदे कोर खबै म्हि च्युउलो त्होइ। चमैइ दे हेंगोन् राइर ¹³ येशूदे थेबै कैले बिइ, “ओ येशू प्रभु, डिए फिर ल्हय खमिन्।”

¹⁴ चमै प्रोंइर येशूजी बिइ, “याद्! खो पिंबै खेगि डाँर याइर आफैँ उँइन्।”^a येशूजी बिब् दोँले चमै खेगि डाँर यादिमाले क्यार चमैए कोर सयाइ। ¹⁵ चमैए न्होर म्हि क्रिहेंइ थि सयाब था सेइर थेबै कैले परमेश्वरए मि क्वेदै येशू डाँर ताखइ। ¹⁶ चदक्या येशूए प्हलेर स्यो लइर येशू धन्यबाद पिंइ। च सामरियाथें मुँलो।

¹⁷ येशूजी बिइ, “फैब म्हि च्युउलो आडिं आ? अरू म्हि कुउलो खनर मुँ? ¹⁸ परमेश्वरए मिं थेब् लबर चु सामरी मत्त्रे ताखइ आ अरू खनर याइ?” ¹⁹ च लिसों

^a १७:१४ परमेश्वरए छ्वेर कोर खब्मै फैइ उ आफैँइमुँ बिइर जाँच लबै हग खो पिंबै खेगिमैदे मत्त्रे मुँ।

येशूजी च सामरियाथेंदे बिइ, “रेइर आफैए क्यो क्हाद्। क्योए बिश्वासइ क्यो फेंडुं।”

परमेश्वरए ग्याल्स

20 कोइ फरिसीमेंइ येशूदे “परमेश्वरए ग्याल्स खोंयोदक्या खम्?” बिइर डचोएमाले येशूजी चमेंदे बिइ, “परमेश्वरए ग्याल्स म्हिमेंए मिइ प्रोल्ले आख। 21 ‘च्योत्ति! परमेश्वरए ग्याल्स चुर मुं’ ‘चर मुं’ बिइर सुज्यै बिल् आखां। तलेबिस्यां परमेश्वरए ग्याल्स केमेंए माजोर्न मुं।”^a

22 येशूजी थिए चेलामेंदे बिइ, “तिरो बिले म्हिए चहजी ग्याल्स लब् प्रोल्ले योस्यां तमलो बिबै ते फहँन लिसों खब्मुं, छैबिलेया केमेंइ प्रोल्ले योदिब् आरे। 23 म्हिमेंइ केमेंदे ‘च्योत्ति! येशू चर मुं,’ ‘चुर मुं,’ बिब्मुं। छैबिलेया चमेंइ बिब आपतेद्, चमेंए लिसों आप्रद्। 24 तलेबिस्यां मुर काम्लि-तिम्लि रामाले मुए छेउ क्रिहेंदक्या अर्को छेउ समा चारमुं, छलेन म्हिए चह युबै त्हेइरै या छैलिन् तब्मुं। 25 छैबिलेया थीजी नसों लेदै दुःख सैदिल् पर्दिब्मुं, धाइर चु पुस्ताबै म्हिमेंइ थीदे म्हि आच्छिइर थिए फिर बिश्वास आल।

26 “न्हम्द नोआए पलोर् खै तलो, म्हिए चह दबै युबै त्हेरै या छैलिन् तब्मुं। 27 नोआ क्यु भाजर आहोन् समा च तेहबै म्हिमें चब, थुंब, ब्ह्या लसिन् मुंलो, चमें छले दुक्कले आ-आफैए पालेन् प्रदिबै तेर्न थाइ आसेल्ले थेबै नां बाडि युइर म्हिमें ताँइ सैयाइ।

28 “न्हम्द लोतए पलोर् या छैलि तलो। सदोमथेंमें चसि-थुंसिन् मुंलो, चुंब-किंब

लसिन् मुंलो, बालि-पुलि ल्हैदिसिन् मुंलो, तिमैं बनेसिन् मुंलो। 29 छैबिलेया लोतइ सदोम सहर पिबै त्हेइर परमेश्वरजी मुदक्या मि ते बारुद भ्योमिइर चर्बै म्हिमें ताँइ सैयाइ। 30 म्हिए चह युबै त्हेरै या छैलिन् तब्मुं।

31 “च त्हेइर तिंए फि तलर मुंभैं आफैए चैदिबै मालमें किंबर याल् पर्दिलै बिइर क्योरो आतदिगे छलेन प्रोजेरे के लब्मेंया तिउँइ आताखदिगे। 32 लोतए प्हेस्योए तां केमेंइ मैन।^b 33 सुइ आफै जोगेल म्हैमुं, चइ खैमेंइ आखांबै छ्ह योदिब् आरे, छैबिलेया सुइ आफैलाइ ता दोइ आङ्गं चमेंइ खैमेंइ आखांबै छ्ह योब्मुं। 34 ड दबै केमेंदे बिमुं, च म्हुँइसर क्ल्हयो क्रिहेर रोदिब्मैं इह्योलोए न्होरि क्रिहें परमेश्वरजी बोब्मुं, क्रिहें वाथेब्मुं। 35 छलेन बालोन् हेंदो प्हेदिबै चमिरिमें इह्योलोर क्रिहें परमेश्वरजी बोब्मुं क्रिहें वाथेब्मुं। [36 च दोलेन्^c बारिर् के लब्में न्होरै या क्रिहें बोब्मुं, क्रिहें वाथेब्मुं।

37 छैलि तां डेंइर चेलामेंइ येशूदे “प्रभु चु केमें खनर तमुं?” बिइर डचोएइ,

येशूजी चमेंदे बिइ, “खनर सिनु तमुं चर क्त्रेमें खागु तम्।”

म्हरेस्यो ते नियाधिश

18 चेलामें खोंयोन् बिलै प्राथना लदिगे धाइर सैं च्योब आलदिगे बिबै सैं मैर येशूजी अहान् क्रिहें बिइ। 2 “सहर क्रिहेर नियाधिश क्रिहें मुंलो। च परमेश्वर प्रोज्येया फाआङ्गिमलो, म्हिमेंलाज्यै या ताइ वास्ता आलमलो। 3 च सहरर म्हरेस्यो क्रिहें

^a १७:२१ केमेंए माजोर्न मुं मतलब, येशूजी लबै केमें परमेश्वरए ग्याल्स ग। ^b १७:३२ लोतए प्हेस्यो सदोम सहरद क्याले त्होखमाले चइ लिंग्यां तोइर च्योमाले च चजए त्हो तयाइ। (उत्पत्ति १६:२६) ^c १७:३६ ताइ बन्दा नसोबे योइ प्हेबै कितबमैरि चु ब्राकेट न्होबै तांफुंमें आप्हिलो।

मुँलो। च नियाधिश डार्र याब्ले लइर 'डए शत्तुरइ ड बेल्ले दुःख पिंडमुँ। छतइर डए निसाफ लमिन्,' बिमलो। ⁴लेदै त्हे समा नियाधिशइ थेबै न्ह आलल्ले टिइ। छैबिलेया 'डइ परमेश्वरै या आमादि, म्हिमैलाज्यै या ताइ वास्ता आल, छैबिलेया चु म्हरेस्योइमि छोंक्रो झूँन् लइ,' बिइर चइ सै न्हो-न्हो मैँइ। ⁵छतइर तारे चुए निसाफ लमिन् पर्दिइ। निसाफ आलमिस्याँ च खब्ले लइर ड छोंक्रो झूँन् लब्मुँ।"

⁶प्रभुजी दबै चमैदे बिइ, "च अधर्मि नियाधिशइ ता बिइमुँ, मैन्दि। ⁷छलेन परमेश्वरजी त्हाँबै म्हिमैँइ त्हाँइ म्हूँइँस थीदे प्राथना लब्मैँए निसाफ थीजी आलमिं रो आ? केमैँए लागिंर निसाफ लमिंर थीजी कहैल् लम् रो आ? ⁸ड केमैँदे बिमुँ, थीजी आफैँए म्हिमैँए लागिंर युनन् निसाफ लमिंब्मुँ। छैबिलेया म्हिए च्हे दबै ह्युलर युमाले बिश्वास लइर टिदिब्मैँ थीजी त्हाँल् यौलै रो आ?"

प्राथना लबै म्हि इह्यौलो

⁹ड ठिक के लबै म्हि क बिब प्हाँइर अरूमैँ ता दोंइ आड्हाँबै को-कोइ म्हिमैँदे येशूजी चु अहान् बिइ, ¹⁰"म्हि इह्यौलो मन्दिरर प्राथना लबर याइ। चमैँ इह्यौलोर क्रिहें फरिसी टोलिबैँ म्हि, अर्को रोमी मुँए लागिंर बालि रेबै म्हि मुँलो।^a ¹¹फरिसी राइर सैँ न्हो-न्हो छले प्राथना लइ, 'ओ परमेश्वर, ड क्योँ

धन्यबाद पिंम्, तलेबिस्याँ ड अरू म्हिमैँ दोँले लोब लब, स्योर तेब, चमिरिमैँए फिर आछचाँबे सैँ मैँबै म्हि आडिं, धाइर चु बालि रेबै म्हि दोँ तबै या ड आडिं। ¹²ड सदर झूँखे बर्त टिम्। डइ योँबै ताँइ मालमैँदक्या च्युबाँबै तिबाँ क्योँए मिंर पिंम्।'

¹³"छैबिलेया च बालि रेबै म्हि हेंगोन् राइर 'डम् स्वर्गउँइ च्योबै लायकबैँ आरे' झूँइर सैँ च्योने लब्दै आफैँए तिंर ठौदिइर 'ओ परमेश्वर, ड पापि म्हि क। डए फिर ल्हय खमिन्,' बिइ।

¹⁴"ड केमैँदे बिमुँ, च फरिसी बन्दा बालि रेबै म्हि परमेश्वरए उँइँर ठिक ठदिइर तिंर तायाइ। तलेबिस्याँ तोगो च्योने तइर कुरब्मैँ परमेश्वरजी थेबले लमिंब्मुँ। तोगो डम् डन बिइर थेब् प्हाँब्मैँ परमेश्वरजी कुरवाब्मुँ।"

येशूजी कोलोमैँ आशिक पिंब

¹⁵थेमैँए कोलोमैँए फिर येशूजी यो थेंइर आशिक पिदिगे झूँइर म्हिमैँइ थि डार्र कोलोमैँ बोखइ। कोलोमैँ बोखब् म्रोइर चेलामैँइ चमैँ हौदिइ। ¹⁶छैबिलेया येशूजी कोलोमैँ आफैँ डार्र उइर चेलामैँदे बिइ, "कोलोमैँ ड डार्र खल् पिन्। चमैँदे आखो आबिद्, तलेबिस्याँ परमेश्वरए ग्याल्स चुमैँ दोँ तब्मैँल् क।^b ¹⁷होलिन् ड केमैँदे बिमुँ, आफैँए बा-आमाइ बिब चु च्योबै कोलोमैँइ डिंम्। छतइर केमैँ या परमेश्वरजी बिब् डिंन्। आडिंइ बिस्याँ केमैँ परमेश्वरए ग्याल्सर हौल् योँदिब् आरे।"

^a १८:१० च त्हेर युहूदिमैँइ बालि रेबैँ हेल लमलो, तलेबिस्याँ युहूदीमैँए सैँर चमैँइ रोमी मुँए लागिंर के लमाले युहूदी म्हिमैँ लुइर ख्याब चम् बिइर मैमलो। ^b १८:१६ ग्रिक क्युइर, परमेश्वरए ग्याल्स चु दोबै म्हिमैँल मुँ।

प्लबै म्हिए सैं परमेश्वरउँइ ताब गारो तम्।

18 चु ताँ डेंडर यहूदी चिब क्रिहेंड येशूदे “ओ स्वाबै गुरु! खैमैइ आखाँबै छ्ह योँबै लागि र डइ ता लल् पर्दिम्?” बिडर डचोएइ।

19 येशूजी चदे बिइ, “क्योंइ डदे तले स्वाब बिमुँ? परमेश्वर बाहेक अरू सुइ या स्वाब आरे। 20 परमेश्वरए छ्वेबै ताँ क्योंइ आसे आ? ‘व्यभिचार आलदु, म्हि आसैदु, आयोदु, स्योर आतेदु धाडर आफैँए बा-आमाइ बिब डिन्,’ बिडर चर प्हिइमुँ,” आडिँ आ।

21 चइ बिइ, “चु ताँमैं डइ फ़ेसिदक्या लइमुँ।”

22 चए ताँ डेंडर येशूजी चदे बिइ, “अभै क्योंइ लल् पर्दिबै के क्रिहें चैइमुँ। क्योंदे मुँबै मालमैं ताँइ चुँडर योँबै मुइ ड्वाँदुमैं चुमिन्, धाडर डए लिलि प्रद्, छलस्याँ क्योंइ स्वर्गर सै न्होर योँबुँ।”

23 येशूए ताँ डेंडर चए लि छु तयाइ। तलेबिस्याँ च बेल्ले प्लबै म्हि मुँलो।

24 चए लि छु तब म्रोडर येशूजी चदे बिइ, “प्लबै म्हिमैं परमेश्वरए ग्याल्सर होंब बेल्ले गारो मुँ। 25 तलेबिस्याँ प्लबै म्हिमैं

परमेश्वरए ग्याल्सर होंब बन्दा सलु (ऊँट) ताए मिर क्युलब सजिल् तम्।”

26 चु ताँ डेंडर “छ बिस्याँ सुइ मुक्ति योँल् खाँमुँ?” बिडर येशूदे डचोएइ।

27 येशूजी चमैदे बिइ, “म्हिमैइ लल् आखाँबै के परमेश्वरजी लल् खाँम्।”

28 छबिमाले पत्रुसइ बिइ, “डिम् आफैँए ति-नाँ वार्थेंडर क्योंए लिसों प्रइमुँ।”

29 येशूजी चमैदे बिइ, “होलिन् ड केमैदे बिमुँ: परमेश्वरजी बिब मादिबै लागि र सुइ ति-नाँ, मि-पहसे, अलि-अडाँ बा-आमा वार्थेंमुँ, 30 चइ चु जुगर्न अभै च बन्दा लेदै योंडर तारे खबै जुगरे या खैमैइ आखाँबै छ्ह योँबुँ।”^a

येशूजी आफैँ सिल् पर्दिबै ताँ बिब

31 च लिसों येशूजी आफैँए च्युसे ड्ह्यौलो चेलामैं तिराइ बोडर बिइ, “तारे डचो यरूशलेम सहरउइ यासिन् मुँ। म्हिए चहए बारेर अगमबक्तामैइ प्हिबै ताँइ ताँ पूरा तबुँ। 32 चमैइ प्हिबुँ दोले म्हिमैइ म्हिए चह अरू हेंमैए योर पियाबुँ। चमैइ थि प्हडर

^a १८:३० खैमैइ आखाँबै छ्ह योँबुँ मतलब खोयोन् बिलै परमेश्वरदे टिल् योँबुँ।

थुइइर थिए इजेत वाब्मुं।³³ चमैइ थि कोराइ पुइर कूसर च्योयाइर सैयाब्मुं। छैबिलेया सोरोर थि दबै सोगों तइर खब्मुं।”

³⁴ छैबिलेया चेलामैइ चु ताँ तिफुँए आक्हो। चु ताँए अर्थ परमेश्वरजी चमैदक्याले लोइर थेंइ। छतइर चमैइ येशूजी बिबै ताँ क्होल् आखाँ।

येशूजी कन म्हि प्रोल् लमिंभ

³⁵ येशू यरिहो सहरर फेखमाले चर मि आम्रोंबै म्हि क्रिहें क्याँए रेर कुँइर चर प्रबमैदे मुइ ह्दिदिलो।³⁶ क्याँर लेदै म्हि प्रबै कै थेंइर “ता तदिइमुँ जा?” बिइर चइ डचोएइ।

³⁷ म्हिमैइ चदे बिइ, “नासरतथें येशू चु च्याँदक्या खसिन् मुँ।”

³⁸ छ बिब् थेंइर चइ “ओ दाऊदए च्ह येशू! डए फिर ल्हय खमिंन्,” बिइर ओरइ।

³⁹ क्याँर प्रबै म्हिमैइ “तले छले ओरलो?” बिइर च हौदिइ।

छैबिलेया “ओ दाऊद मुँए कुलबै च्ह! डए फिर ल्हय खमिंन्,” बिइर च भन् ओरइ।

⁴⁰ चए कै थेंइर येशू प्रदिबै तोर्न राइर “च ड डारं बखो!” बिइ। चदक्याच मि आम्रोंबै म्हि थि डारं बोखबै लिसों येशूजी चदे ⁴¹ “क्यों ता चैदिइ? डइ क्योँए लागिरी ता लमिले?” बिइर डचोएइ।

चइ येशूदे “प्रभु डए मि प्रोल् खाँदिगे,” बिइ।

⁴² येशूजी चदे बिइ, “क्योंइ डए फिर बिश्वास लब्दक्या क्योँए मि प्रोल् खाँब् तयाइमुँ।” ⁴³ येशूजी छ बिबै बितिकन् चए

मि प्रोयाँइ। चदक्या च सैं तोंइर परमेश्वरए मिं क्वेइर येशूए लिसों प्रयाइ। छतब् प्रोंइर ताँइ म्हिमैज्यै या परमेश्वरए मिं क्वेबर होंइ।

रोमी मुँए लागिरी बालि रेबै जखायस

19 येशू यरिहो सहर तब्दै यादिमाले।² च सहरर जखायस बिबै म्हि क्रिहें रोमी मुँए लागिरी बालि रेबै न्होर्बै चिब ते प्लबै म्हि मुँलो।³ “येशू सु मुँगे” बिइर चइ च्योबै सैं लइ। छैबिलेया मोबले तब्दक्या म्हिए हुलइ लमाले चइ येशू प्रोल् आखाँलो।⁴ छतइर च उईसो न्हेयाइर येशू च्योबर तुँबुए दुँर क्रेइ। तलेबिस्याँ येशू च क्याँ तइर खसिन् मुँलो।⁵ येशू चर फेखइर ताइ च्योइर बिइ, “ओ जखायस, युन्ले क्योरो तयु, तलेबिस्याँ ड तिं क्योँए तिंर बास टिल् पर्दिइमुँ।”

⁶ छबिमाले च युन्ले सर तयुइर सैं तोंबै येशू तिंर बोइर मान लइ।⁷ छले येशू जखायसए तिंर याब प्रोंइर “अच्या छैलि पापि म्हिए तिंरै या प्हेँ तबर याइ बिइर म्हिमैइ थिए ताँ लबर होंइ।”

⁸ च त्हेर जखायस राइर प्रभु येशूदे बिइ, “प्रभु, ड तारे आफैए सै न्होरए आद भाग ड्हुँदुमै चुमिंम्। चदक्या डइ रोमी मुँए लागिरी बालि रेमाले सुलाज्यै या लुइर मुइ किमैं बिले तिबाँर प्लिबाँ तेंइर चमैं तामिंम्।”

⁹ येशूजी चदे बिइ, “तिं चु तिंरै म्हिमैइ मुक्ति योंइमुँ, तलेबिस्याँ चु या अब्राहामए सन्तान क।¹⁰ तलेबिस्याँ म्हिए च्ह क्याँ आसेइर म्हइर प्रदिबै म्हेबर ते जोगेमिंबर युब् क।”^a

^a १९:१० म्हप्रिबमै म्हेबर ते जोगेमिंबर युब् ग जखायस अब्राहामए कुल, मतलब यहूदी, परमेश्वरजी त्हाँबै म्हिमैं न्होर्बै मुँलो। छैबिलेया तोगो मत्त्रे प्रभु येशूए फिर बिश्वास लइर च आछयाँबै केए सजैद क्याले फ्रेइर परमेश्वरजी जोगेमिंभमुँ।

मारए सिक्कामें

11 येशू यरूशलेम सहर चंदो फेखमाले म्हिमैए सैर “परमेश्वरजी ग्याल्स लबै त्हे^a युनन् तब्बिले छेमैं बिबू मैडर थिए ताँ डेंदिलो। छतइर येशूजी चमैदे परमेश्वरए ग्याल्सए बारेबैं ताँ अहानदक्या बिड।”¹² येशूजी बिड, “प्लबै म्हि क्रिहेंड हेंगोबैं ह्युल क्रिहें डए हग न्होर बोखल पर्दिलै बिबै सैं लइ।¹³ चदक्या थि याब बन्दा उइंसो आफैए के लबै म्हि च्युउलो उइर ‘ड आतखन् समा चु मारए सिक्काउइंले छों लद्,’ बिडर मारए सिक्का^b क्रिहें क्रिहें पिड।

14 “छैबिलेया चए ह्युलबैं म्हिमैड च चिब आखोमलो। छतइर चिब याबै लिसों ‘चु म्हि डिए फिर म्रुँ तब डि आसैदि,’ बिड बिडर थेबै म्रुँ डारं चमैड स्यार्वो कुलइ।

15 “छैबिलेया च चिब म्रुँ तइर ताखबै बितिकन् आफैड मुइ पिथेबै के लबै म्हिमैं थि डारं उइबर ल्हैदिइ। चदक्या छों लइर चमैड कति क्मैड बिडर क्होल् म्हेइ।¹⁶ उइंसोबै के लबै म्हि खइर बिड, ‘ओ चिब, क्योइ पिबै मारए सिक्का क्रिहेंदक्या डइ सिक्का च्युउलो क्मैडमुँ।’

17 “च म्रोंडर म्रुँ बेल्ले सैं तोंडर बिड, ‘स्याबस! क्योँ स्वाबै के लबै म्हि मुँमै! च्युगुदे मालर क्योँ भर लल् खाँब तइ। छतइर तारे सहर च्युउलोए फिर क्योँ क्लहे तब्मुँ।’

18 “छलेन अर्को के लबै म्हि खइर बिड, ‘ओ चिब, क्योइ पिबै मारए सिक्का क्रिहेंदक्या डइ सिक्का इहौलो क्मैडमुँ।’

19 “चदक्या म्रुँड चलाज्यै या बिड, ‘क्योँ सहर इहौलोए फिर क्लहे तल् योँब्मुँ।’

20 “अर्को के लबै म्हि खइर बिड, ‘ओ चिब, क्योइ पिबै मारए सिक्का डइ हुमालर चोइर थेंलो। चुर मुँ नाँ बिड।²¹ क्योँ म्रोंडर ड फाइडि, तलेबिस्याँ क्योँ सारो सैं मुँबै म्हि मुँ। क्योइ थेंड आथेबै माल किंल् म्हेम्, धाइर प्लुइ आप्लुबै माल प्हेम्।’

22 “क्लहेड च के लबै म्हिदे बिड, ‘ओ, केर आफेबै म्हि! क्योइ पोबै ताँदक्याले डइ क्योए निसाफ लब्मुँ। डए सैं सारो मुँ, डइ थेंड आथेबै माल किंम्, प्लुइ आप्लुबै माल प्हेम् बिडर क्योइ सेमै।²³ छ बिस्याँ क्योइ डए मुइ बेङ्गर तले आथेंलो? बेङ्गर थेंस्याँ ड ताखमाले ब्याज योमलो।’²⁴ चदक्या च जरे रादिब्मैदे थीजी बिड, ‘च म्हिदक्या मारए सिक्का प्हेइर सिक्का च्यु मुँबै म्हिदे पिन्।’

25 “छबिमाले चमैड थीदे बिड, ‘ओ चिब चदे प्रे मारए सिक्का च्यु मुँदि!’

26 “ड क्मैदे बिमुँ, सुदे मुँ चदे भन् लेदै पिब्मुँ। सुदे आरे चदे मुँबै या प्हेयाब्मुँ।²⁷ तारे ड आखोइर ‘म्रुँ आतदिगे’ बिब्मैं चुर बोखइर डए उइंर सैयाद्।”

यरूशलेमर यामाले येशू थेबै मान लब

28 चु अहान् बिलू खाँबै लिसों येशू आफैए चेलामैं बन्दा उइंसों यरूशलेमउइं याइ।²⁹ बेधफागे ते बेथानिया बिबै नाँसए चंदो जैतुन बिबै कोर फेखमाले येशूजी आफैए चेलामैं डुह्यौलोदे छ बिडर कुलइ,³⁰ “च चंदोबै नाँसर यादु। चर यामाले सुइ आक्रेबै गधा चहज च्युँइथेब क्मैड स्याब्मुँ। च पिडर चुर बखो।³¹ च पिमाले ‘तले पिलो?’ बिडर

^a १६:११ ग्रीक क्युइर, परमेश्वरए ग्याल्स

^b १६:१३ च त्हेर मारा सिक्का म्हि क्रिहेल म्हेन प्तिलोबैं तलब मुँलो।

सुज्यै डचोएस्याँ 'प्रभुए लागि र चैदिइमुँ,' बिद्।" 32 कुल्मिंबै चेलामैँ ड्ह्यौलो यामाले येशूजी बिब् दौलेन् गधाए चहज स्याइ। 33 गधा पिबर होंमाले गधाए क्लहेइ "चु गधा तले पिलो?" बिइर डचोएइ। 34 चमैँइ गधाए क्लहेदे बिइ, "चु प्रभुए लागि र चैदिइमुँ।" 35 छले चमैँइ गधाए चहज पिइर येशू डारँ बोइ। चदक्या आफैँए क्वेँमें गधा चहजए फिर तिइर येशू क्रेल् पिंइ। 36 येशू गधा फिर क्रेइर यामाले थिए मान लबर म्हिमैँइ थेंमैँए क्वेँ प्लिइर क्यारँ तिमिंइ। 37 छले येशू यरुशलेमए चेंदो मुँबै जैतुन बिबै कोंदक्या क्योरो फेयुमाले थीजी लबै औदिबै थेगले केमैँ मैँइर थिए ताँइ चेलामैँ सैं ताँइर परमेश्वरए मिं क्वेँदे थेबै कैले ओरबर होंइ। 38 "परमेश्वरए मिंर युबै मुँ बेल्ले थेबले मुँ। स्वर्ग ते पृथबीर शान्ति तदिगे। थिए मिं खोंयोन् बिले थेब तदिगे," बिब्दै ओरइ।

39 म्हिए हुल न्होरि को-कोइ फरिसीमैँइ येशूदे बिइ, "ओ गुरु, क्योए चेलामैँदे 'छले आओरद्' बिइर हौदिद्।"

40 येशूजी चमैँदे बिइ, "ड केमैँदे बिमुँ, चुमैँ छले आपोँस्याँ युममैँ थेबै कैले ओरब्मुँ।"

यरुशलेमथेंमैँ प्रोँइर येशू क्रोब

41 येशू यरुशलेम सहर चेंदो फेखमाले। च सहर प्रोँइर थि सैं नइर क्रोइ। 42 चर्बैँ म्हिमैँए बारे थीजी छले बिइ, "शान्ति ता ताँइ बोखम् बिइर तिं केमैँइ सेस्याँ तमलो! छैँबिलेया तारे केमैँए मिइ प्रोँल् आयोँ। 43 तलेबिस्याँ केमैँए फिर छैँलि त्हिँइ खब्मुँ: शत्तुरमैँइ क्योए कारग्युले गारा रुइब्मुँ धाएर केमैँ बैरु त्हाँल् आयोँल्ले च्युथेँब्मुँ। 44 चमैँइ चु सहर फुइर चु न्होर्बैँ ताँइ म्हिमैँ या

सैयाब्मुँ। तिंए गारार युँम क्रिहेंए फिर अर्को युँम तदिब् आरे। तलेबिस्याँ 'डिं जोगेमिंबर परमेश्वर युलो!' बिबै ताँ केमैँइ क्हाँल् आखाँलो।"

येशू मन्दिरर याब

45 च लिसोँ येशू यरुशलेम सहरबैँ मन्दिरर याइर चर्बैँ छोँ लबै ताँइ म्हिमैँ ल्हाइ। 46 चदक्या चमैँदे बिइ, "परमेश्वरजी थिए छवेर 'डए तिं प्राथना लबै तिं तब्मुँ,' बिइर छ्हिइमुँ, छैँबिलेया केमैँइ योमैँए तिं लमैँ।"

47 छले येशूजी त्हिँइ क्हाँसे मन्दिरर म्हिमैँ लोमिमलो। छतइर खो पिंबै खेगि चिब्मैँ, शास्त्रिमैँ ते चिबनाँब्मैँ क्हिइर येशू सैल् म्हैमलो। 48 छैँबिलेया थि सैबै लागि र चमैँइ ताइ निउँ आयोँलो। तलेबिस्याँ येशूजी लोमिंबै ताँ बेल्ले छचाँब मादिइर म्हिमैँइ डेंमलो।

येशूए हक

20 तिगैँ येशूजी मन्दिरर परमेश्वरदक्याले खबै सैं तोबै ताँमैँ म्हिमैँ लोमिंदिलो। छतइर चिबनाँब्मैँ, खो पिंबै खेगि चिब्मैँ ते शास्त्रिमैँ येशू डारँ खइर 2 "डिंदे बिद्, चु केमैँ लब क्योँल ता हक मुँ, क्योँदे चु हग पिंब सु जा?" बिइर डचोएइ। 3 येशूजी चमैँदे बिइ, "छ बिस्याँ डज्यैँ या केमैँदे क्रिहें ताँ डचोएम् चए ज्वाफ पिन्। 4 यूहन्नाइ म्हिमैँ क्युर प्लुइर बप्तिस्मा पिंबै हग परमेश्वरदक्याले योँइ उ म्हिमैँदक्या योँइ?"

5 चु ताँ थेइर चमैँ थें-थेंमैँए न्होरि छलफल लबर होंइ, "डचोइ खै बिब?

‘परमेश्वरदक्याले’ बिइ बिस्याँ केमैइ ‘तले यूहन्नाए ताँ आपतेलो?’ बिइर चइ बिब्मुं।⁶ ‘म्हिदक्या’ बिले बिस्याँ चुबैँ म्हिमैँ ताँनइ डचो युँमइ प्रिंइर सैयाब्मुं, तलेबिस्याँ यूहन्ना अगमबक्ता क बिइर चमैइ पतेम।”⁷ छतइर चमैइ येशूदे बिइ, “तोसि, खनिदक्या योंइ? डिइ आसे।”

⁸ येशूजी चमैदे बिइ, “छ बिस्याँ डज्यै या सुए हकदक्याले चु केमैँ लमुँ बिइर केमैँदे आबि।”

अँगुर खेतिए अहान्

⁹ च लिसों येशूजी म्हिमैँदे अहान् बिइ, “म्हि क्रिहेंड अँगुरए खेति ल्हेदिइर म्हिमैँदे आदेर पिइर थि अर्को ह्युलर याइर लेदै त्हे समा टिइ।¹⁰ अँगुर मिंबै त्हेर क्लेइ के लबै म्हि क्रिहें आदे किंबर कुलइ। छैँबिलेया आदे लब्मैइ च म्हि तोँइर कहोतेन् कुल्मिइ।¹¹ चदक्या क्लेइ अर्को के लबै म्हि कुलइ। चलाज्यै या चमैइ तोँइर इजेत वाइर ताइ आपिन्ले कहोतेन् ल्हामिइ।¹² च लिसों दबै अर्को के लबै म्हि कुलइ। चलाज्यै या चमैइ आदकल्सो लइर भ्योँयाइ।

¹³ “जगो तब्दक्या अँगुरए क्लेइ बिइ, ‘तारे सु कुलब् इहे? डए चहेदे चमैइ मान ललै, छतइर ड आफैँए खोबै चहन् कुलल् पर्दिलै झूँइर कुलइ।’¹⁴ छैँबिलेया क्लेए चह हेंगोदक्या प्रोँइर आदे लब्मैइ ‘चुम् क्लेए चह क। चुम् हक योँल् पर्दिबै म्हि क। छतइर च सैयाले, चदक्या चए सै न्होर डचोएल् तब्मुँ बिइर थेंमैँ न्होरि ताँ लबर

होंइ।’¹⁵ छ बिइर चमैइ क्लेए चह अँगुर मुँबे क्ल्हयोदक्या बैरु बोइर सैयाइ।

“तारे अँगुरए क्लेइ चमैँदे ता ललै? ¹⁶ च खइर च आदे लब्मैँ सैइर प्रों अरू म्हिमैँ पियाब्मुँ।”

चु ताँ थैइर म्हिमैँइ बिइ, “छैलि ताँ खैमैँइ आतदिगे!”

¹⁷ येशूजी चमैँ डाँइ च्योइर बिइ, “छ बिस्याँ छ्वेर प्हिबै चु ताँए मतलब ता जा?

‘गारा चोब्मैँइ केर आफे बिइर भ्योँयाबै युँमन् तेबैँ क्र युँम तइ?’

¹⁸ च युँमए फिर तेयाब्मैँ ताँइ कुदुकुदु तयाब्मुँ, छलेन सुए फिर च युँम तेमुँ च त्हुलभुँ लवाब्मुँ।”

¹⁹ येशूजी चु अहान् थेंमैँए बारेर्न पोंदिइमुँ बिइर शास्त्रिमैँ ते खेगि चिब्मैँइ कहोइ। छतइर च त्हेर्न चमैँइ येशू कहाल् म्हेइ। छैँबिलेया चमैँ म्हि हुल प्रोँइर फाआइँमलो।

बालि फोले उ आफोले?

²⁰ येशूजी बिबै ताँमैँदक्या थी फसेइर रोमी क्रथेए योर पियाबै दाउ चमैँइ च्योदिलो। छतइर छचाँबै के लब्मैँ दाँ ब्योन्ले म्हिमैँ छैँ लबर चमैँइ येशू डाँर कुलइ।²¹ चमैँइ येशूदे बिइ, “ओ गुरु, क्योँइ छचाँबै ताँ पोमुँ धाइर सुलाज्यै या आफेलल्ले परमेश्वरए होलिनबै ताँ छेनाले लोमिंम बिइर डिइ सेइमुँ।²² छतइर डिदे बिमिन्। डिँड रोमी कैसर प्रुँ बालि फोल् पर्दिम् उ आपार्दि?”²³

²³ छैँबिलेया थिए सैँ किंबर चमैँइ छले ताँ डचोएब् क बिब् सेइर येशूजी चमैँदे बिइ,

^a २०:२२ चमैँए सैँर येशूजी “फोल् पर्दिम्” बिस्याँ थेंमैँए यहूदी म्हिमैँ सैँ नइर थिए लिलि आप्रमलो। “फोल् आपार्दि” बिस्याँ रोमी म्रुलाइ मान आलमलो बिइर रोमी पुलिसमैँइ थी कहाइर भेलर च्युयामलो बिइर मैल।

24 “खोइ डदे मुइ क्रिहें उँइँन्दि। च मुइर सुए नक्सा ते मिं छाप्दिइमुं?”

चमैइ बिइ, “कैसर मुँए मिं ते नक्सा मुँ।”

25 येशूजी चमैदे बिइ, “छ बिस्याँ कैसर मुँ पिंल् पर्दिबै माल कैसर मुँ पिंन्। परमेश्वरए मिं पिंल् पर्दिबै माल परमेश्वरन् पिंन्।”

26 छबिमाले म्हिमैए उँइँसो चमैइ येशूए ताँ कहाबै कल्ह्यो आयोँलो। बरु येशूजी बिबै ताँ थैइर चमै प्लेटोयाइर ताइ आबिल्ले टिइ।

सिब्दक्याले सोगों तइ खबै ताँ

27 च लिसों दबै को-कोइ सदुकी टोलिबै यहूदीमै येशू डारं खइ। चमैइ “सिबै लिसों म्हि दबै सोगों आत,” बिमलो। छतइर चमैइ येशूदे उच्योएइ, 28 “गुरु, मुँयुं क्रिहें ब्ह्या लइर प्हसैं आतल्ले सियाइ बिस्याँ, आगेंए लागिंर सन्तान तदिगे बिइर चए अलिइ आफैए चों ब्ह्या लल् पर्दिम् बिइर त्हम्द मोशाइ उच्योए लागिंर ठिम प्हिथेंइमुँ। 29 तिं क्रिहेंर त्येमै डिउँलो मुँलो। मुख्याइ ब्ह्या लइ। छैबिलेया च्ह चमि आतल्ले च सियाइ। 30 छतइर म्हेलाइ आफैए चों बोखइ। छैबिलेया चै या प्हसैं आतल्ले सियाइ। 31 च लिसों साँइँलाज्यै या चों बोखइ। चै या प्हसैं आतन्ले सियाइ। छलेन चमै ताँनइ पलो पलोले चोंदे ब्ह्या लइ, छैबिलेया चमै या प्हसैं आतल्ले ताँइ सियाइ। 32 लिसों च चमिरि या सियाइ। 33 छतइर सियाब्मै दबै

सोगों तमाले च चमिरि सुए प्हेंस्यो तलै? तलेबिस्याँ च चमिरि त्ये डिउँलोए प्हेंस्यो तल् खाँलो।”

34 येशूजी चमैदे बिइ, “चु ह्युलर म्हिमै ब्ह्या लमुँ, ब्ह्या लमिमुँ। 35 छैबिलेया सिब्दक्याले सोगों तइर स्वर्गर याबै योग्यबै ठर्दिबै म्हिमैइ ब्ह्या आल, ब्ह्या आलमिं। 36 तलेबिस्याँ चमै स्वर्गदूत दोंबन् तम्। चमै सिइर दबै सोगों तब्दक्या चमै परमेश्वरए सन्तान क। छतइर चमै खैमैइ सिदिब् आरे।

37 “छैबिलेया सिब्मै दबै सोगों तइर परमेश्वरदे टिम् बिबै ताँ मोशाज्यै या लुँदिबै भयाडए बारेर प्हिमाले याहवेहदे ‘अब्राहामए परमेश्वर, इसहाकए परमेश्वर ते याकूबए परमेश्वर’ बिइर प्रमाण उँइँमिंइ। 38 याहवेह सियाबै म्हिमैए परमेश्वर आडिं, सोगों तब्मैए परमेश्वर क, तलेबिस्याँ थिए लागिंर ताँइ म्हि सोगों मुँ।”^a

39 थिए ताँ थैइर को-कोइ शास्त्रिमैइ बिइ, “ओ गुरु, क्योइ ठिकन् बिइ।” 40 च लिसों सुज्यै या थीदे ताइ ताँ या उच्योएबै आँट लल् आखाँ।

ख्रीष्ट दाऊद मुँए कुल ते प्रभु क

41 येशूजी चमैदे बिइ, “‘परमेश्वरदक्याले कुलिंम्बे मुँ ख्रीष्ट, दाऊद मुँए हगदक्याले युब् क’ बिइर म्हिमैइ खैले बिल् खाँम्? 42 तलेबिस्याँ

^a २०:३८ थिए लागिंर ताँइ म्हि सोगों मुँ याहवेहजी च ताँ मोशादे बिबै त्हेर अब्राहाम, इसहाक ते याकूब सियाल् खाँलो। सिल् खाँलेया याहवेहजी चमै सोगों मुँ बिइ।

‘प्रभु परमेश्वरजी डए प्रभुदे बिइ,
43 “डइ क्योए शतुरमै क्योए प्हेले
न्होर आथेन् समा

क्यों डए क्योलो हार टिद्,”

बिइर भजनजगोर दाऊद मुँइ बिइमुँ। 44 छले
दाऊद आफै ख्रीष्टदे प्रभु बिइमुँ बिस्याँ ख्रीष्ट
दाऊदए चह खैले तइ?”^a

शास्त्रिमैदे न्ह क्रों मि क्रोले टिद्

45 छले ताँइ म्हिमैइ ताँ डेंदिमाले येशूजी
आफैए चेलामैदे बिइ, 46 हिंबै कवे खेइर
“शास्त्रिमै प्हेइर छाइ-छुइ बजारजरे
प्रमाले म्हिमैइ मादिदिगे झूँब, च्हों तिंजरे
यामाले म्हिमैइ थेब् लदिगे झूँब छलेन
भत्यारजरे यामाले मान तबै क्ल्हयोर कुँल्
म्हैबै शास्त्रिमैदे जोगेरइर टिद्। 47 चमैइ
म्हरेस्योमैए तिं नाँ लुडिइर म्हिमैए उँइँसो
बिस्याँ बेल्ले प्राथना लब् प्हेम्। छैलि
म्हिमैइ भन् थेबै सजैँ योँब्मुँ।”

म्हरेस्योए भेटि

21 थीजी च्योदिमाले प्ल-प्लबै म्हिमैइ
मन्दिरबै भेटि बकसर भेटि चोदिब्
प्रोइ। 2 चदक्या झूँदु म्हरेस्यो क्रिहेंइ मुइ
झिँफुँ चोबे या थीजी प्रोइ। 3 छतइर थीजी
बिइ, “होलिन् ड केमैदे बिमुँ, च ताइ
आरेबै म्हरेस्योइ अरूमैइ बन्दा लेदै भेटि
चोइमुँ। 4 तलेबिस्याँ अरूमैइ आफैदे मुँबै लेदै

मुइदक्याले लेदै चोइ, छैबिलेया चु म्हरेस्यो
झूँदु तलेया थीदे तिफुँइ आचैल्ले आफैदे मुँबै
मुइ ताँइ चोइ।”

यरूशलेमबै मन्दिर फुयाम् बिब

5 “छचाँ-छचाँबै युँमजगो ते परमेश्वरए
मिर पिबै छचाँ-छचाँबै मालमैइ सिडॉर्दिइर
चु मन्दिर बेल्ले छचाँब तइमुँ,” बिइर
येशूए को-कोइ चेलामैइ ताँ लदिमाले येशूजी
बिइ, 6 “केमैइ चु ताँइ मालमै तोगो प्रोइमुँ,
छैबिलेया तिरो चु ताँइ फुयाब्मुँ। युँम क्रिहेंए
फिर अर्को युँम आचैल्ले नास तयाब्मुँ।”^b

नुयाबै त्हेए चिनुमै

7 “ओ गुरु, चु ताँइ चिनुमै खोंयोँ तम्? चु
तबि छेइ बिइर म्हिमैइ खैले सेल् खाँम्?”
बिइर चमैइ येशूदे डयोएइ।

8 येशूजी बिइ, “न्ह क्रों मि क्रोले टिद्,
केमैदे सुज्यै लुल् आखाँदिगे। लेदै म्हिमै डए
मिं किंइर खब्मुँ, ‘ड परमेश्वरजी कुलबै
मुँ ख्रीष्ट क’ बिब्मुँ, चदक्या अरू म्हिमैइ
‘ख्रीष्ट युबै त्हे चेंदो तखइमुँ’ बिब्मुँ,
छैबिलेया चमैए लिसों आल्हैदिद्, चमैइ बिब
आडिन्। 9 ल्हडें ते प्हांब नेब तइमुँ रो बिब
केमैइ थेब्मुँ च त्हेर फाआडिँन्, तलेबिस्याँ
म्हिए चह युब् बन्दा उँइँसो चु ताँइ ताँमै तले
पर्दिम्। छ तलेया ह्युलए नास अभै तदिब
आरे।”

^a २०:४४ मतलब, ख्रीष्ट दाऊद मुँए कुल तस्याँ दाऊद बन्दा च्योब तम्। चदक्या ख्रीष्ट दाऊद मुँए प्रभु तस्याँ दाऊद बन्दा थेबले तम्। इह्योलो खैले तम्? उत्तर, ख्रीष्ट पक्का म्हि तइर दाऊदए कुलर युइ, छलेन पक्का परमेश्वर तब्द क्या थि दाऊदए प्रभु या तइ।

^b २१:६ चु भविष्या बाणि प्लिच्यु बर्ष लिसों होलिन् तलो, मतलब बि. सं. १२७ सालर (ई. सं. ७० सालर) रोमी फौजइ मन्दिर नास लवाइ।

10 येशूजी दबै बिड़, “ह्युलए बिरोधर ह्युल, ग्याल्सए बिरोधर ग्याल्स रेइर ल्हडें तब्मुं। 11 क्ल्हयो क्ल्हयोरि थेब् थेबै सयो खब्मुं, अङ्गल तब्मुं, चदक्या फाङ्गिन् तबै हिंमै खब्मुं। मुर थेब् थेबै फाङ्गिन् तबै चिनुमै प्रोब्मुं। 12 चु ताँइ मालमै तब् बन्दा उँईसों म्हिमैइ केमै हुगुदिब्मुं। चमैइ केमै क्हाइर च्हां तिंजरे बोइर केमैए मिंर मुद्दा चोइर भेलर च्युयाब्मुं। केमैइ डए मिं किब्दक्या मुंमै ते क्रथेमैए उँईसों बोब्मुं। 13 छैबिलेया चमैदे सैं तोबै ताँ बिबै मौका च त्हेर केमैइ योब्मुं। 14 छतइर आफै जोगेबै लागि र खै बिब् डहे बिइर केमैइ न्हँ लल् आपार्दि। 15 तलेबिस्याँ डइ केमैदे छैलि ज्ञान बुद्धिए ताँ पौल् पिब्मुं, च ताँ पौब्ले लमाले चमैइ केमैए ताँए ज्वाफ पिंल् खाँदिब् आरे, केमैए ताँ थोल् खाँदिब् आरे। 16 आफैए बा-आमा, आगों-अलिमै, आफैए थुमै ते हजे-म्हजेमैज्यै केमै शत्तुरमैए योर पिंयाब्मुं, चदक्या केमैए न्होरि को-कोइ चमैइ सैयाब्मुं। 17 केमैइ डए मिं किब्दक्या ताँइ म्हिमैइ केमै हेल लब्मुं। 18 छैबिलेया केमैए क्र प्हो क्रिहें या नास तदिब् आरे। 19 छतइर आप्लाहद्, आसिन् समा सैदिद्, छलस्याँ केमै खैमैइ बिलै सोइर परमेश्वरदे टिल् योब्मुं।”

यरूशलेम सहर नास तबै ताँ

20 येशूजी दबै बिड़, “यरूशलेम सेनामैइ घेर्दिब् प्रोमाले तारे यरूशलेम नास तबै त्हे तबि छेमै बिब केमैइ सेद्। 21 च त्हेर यहूदीया ह्युलर मुंब्मै कोउँइ भौदिदिगे। यरूशलेम सहर न्होर मुंब्मै सहर बैरु भौदियादिगे, छलेन नाँसर मुंब्मै यरूशलेम सहर न्होर आहोदिगे। 22 तलेबिस्याँ परमेश्वरए छ्वे

प्हिबै ताँमै ताँइ पूरा तबै लागि र परमेश्वरजी बदला किंबै त्हिँइ च तब्मुं। 23 च त्हेर प्हसं नोब्मै ते क्वेंदर कोलो मुंबै आमामै खै लब ओछेंमै! तलेबिस्याँ ह्युल भरिन् बेल्ले फाङ्गिन् तबै दुःख खब्मुं, चदक्या चु हेंए फिर परमेश्वर सु खब्मुं। 24 शत्तुरमैइ चमै को-कोइ सेलाँइ (तरवारइ) सैयाब्मुं, कोइ फैइर ह्युल ह्युलर बोब्मुं। परमेश्वरजी चमैदे तोक्दिबै त्हे आतन् समा अरू हेंबै म्हिमैइ यरूशलेम थेमैए न्होर थेंब्मुं।”

परमेश्वरदक्याले कुल्मिंबै म्हिए च्हा तायुबै चिनु

25 येशूजी दबै बिड़, “लइ, त्हेँइ ते मुबै सारजगोर औदिबै चिनुमै प्रोब्मुं। थेबै कैले खबै मा ड्युँइए भेलइ लमाले ताँइ ह्युलर्बै म्हिमै फाङ्गिंइर बेल्ले आतिदिब्मुं। 26 ह्युलर फाङ्गिन् तब्मुं बिइर म्हिमै मुर्छा तयाब्मुं। तलेबिस्याँ च त्हेर मुबै मालमै या लायाब्मुं। 27 च लिसों म्हिए च्हा थेबै शक्ति ते म्हारल्ले म्हस्योर युदिब म्हिमैइ प्रोब्मुं। 28 छैलि ताँ तबर होंमाले केमै रेइर क्र कैडो लद्। तलेबिस्याँ च त्हेर्न केमै जोगेमिंबै त्हे चेंदो तब्मुं।”

तुँबु दुँदक्या लोमिबै ताँ

29 थीजी चमैदे चु अहानै बिड़, “तुँबु दुँ ते अरू सिं दुँमै च्योद्। 30 च सिं दुँमै छारा प्हो पलेब् प्रोइर केमैइ बर्ख लैदिमै बिइर सेम्। 31 छलेन डइ बिबै चु ताँइ ताँमै तखब् प्रोइर परमेश्वरए ग्याल्स चेंदोन् मुंमै बिब केमैइ सेद्। 32 होलिन् ड केमैदे बिम्, डइ बिबै चु

ताँइ ताँमै पूरा आतन् समा चु पुस्ता म्हदिब् आरे। ³³मु ते पृथ्वी नास तयाब्मुं, छैबिलेया डइ बिबै ताँ म्हदिब आरे।

न्ह क्रों मि क्रोंले टिद्!

³⁴“छतइर केमै खैले टिल् पर्दिम् बिइर सैर मैइर टिद्। लेदै चब-थुंबए लिसों आप्रद्, लेदै पा थुँइर आम्हेरद् धाइर छ्ह खैले थोब् इहे बिइर न्हुँ आलद्। छले ह्युलबै मालर सै यादिमाले थाइ आसेल्ले तिखेर्न च त्हिँइर केमै डेर स्याब् दाँले स्याब्मुँ। ³⁵तलेबिस्याँ छलेन थाइ आसेल्ले पृथ्वीबै ताँइ म्हिमैए फिर च त्हिँइ खब्मुँ। ³⁶छतइर च फाङ्गिन् तबै ताँमैदक्या जोगेरइर म्हिए च्हेए उँइसाँ राल् योबै लागिर परमेश्वरदे प्राथना लब्दे लइर न्ह क्रोंले टिद्।”

³⁷येशूजी त्हिँइ क्हांसे मन्दिरर परमेश्वरए ताँमै लोमिमलो। धाइर म्हुँइँसर जैतुन बिबै कौर याइर बास टिब्ले लमलो। ³⁸चदक्या थीजी लोमिबै ताँ डेबर न्हांकर्न म्हिमै मन्दिरर खमलो।

यहूदा इस्करियोतइ येशू कहाल् पिंब

22 च त्हेर प्लेढा आचोंबै क्हे क्चबै चाड खबि छेलो। च त्हिँइदे दुःखदे फ्रेबै चाड बिमलो। ²खो पिंबै खेगि चिब्मै ते शास्त्रिमै बिस्याँ येशू खैले सैब् इहे बिइर दाउ च्योदिलो। छैबिलेया म्हिमै म्रोंइर चमै फाआङ्गिमलो। ³च त्हेर्न यहूदा इस्करियोतए सैर दुष्ट होइ। च यहूदा येशूए च्युसे इह्यौलो चेलांमै न्होबै क्रिहेँ मुँलो। ⁴यहूदा खो पिंबै

खेगि चिब्मै ते मन्दिर रूबर टिबै सिपाइमै न्होबै कप्तानमै डार याइर, “डइ येशू डो सेमिस्यो बिइर सल्ला लइ।”

⁵यहूदाए ताँ डेँइर चमै सै तोंइर “डिइ क्यो मुइ पिस्यो,” बिइर बाछा फैइ।

⁶चमैइ छबिमाले इस्करियोतइ “तम्” बिइर म्हिए हुल आरेबै त्हेर येशू कहाल् पिंबै दाउ च्योइ।

येशूजी चेलांमैदे दुःखदे फ्रेबै चाडए भोज चब

⁷प्लेढा आचोंबै क्हे क्चबै चाडर म्हिमैइ क्यु च्हेज खो पिँइर दुःखदे फ्रेबै चाड मादिमलो। ⁸थीजी पत्रुस ते यूहन्नादे “याइर ड्योए लागिर दुःखदे फ्रेबै चाडए भोजए तौदु लद्,” बिइर कुलइ।

⁹चमैइ थीदे “ओ गुरु, डिइ चु भोज खनर तौदु लले?” बिइर ड्योएइ।

¹⁰येशूजी चमैदे बिइ, “केमै सहरर फेमाले क्युए गौरि नोबै चमिरि क्रिहेँ केमैदे त्होब्मुँ। चए लिलि च होंबै तिर याद्। ¹¹चदक्या च तिं क्लहेदे ‘डइ आफैए चेलांमैदे दुःखदे फ्रेबै चाडए भोज चबै कोठा खनर जा? बिइर गुरुजी क्योदे ड्योएमुँ,’ बिद्। ¹²छले ड्योएमाले चइ केमै फितलबै छेनाले सजेथेबै कोठा उँइमिंम्मुँ। चर केमैइ भोजए तौदु लद्।” ¹³छले चमै यामाले थीजी खै बिलो छैलिन् स्याइ। चदक्या चमैइ दुःखदे फ्रेबै चाडए भोज चर तयार लइ।

¹⁴लिसों चब चबै त्हे तमाले कुल्मिंबै चेला चिब्मैदे बालो येशू चब चबर कुँइ। ¹⁵येशूजी चमैदे बिइ, “डइ दुःख नोब् बन्दा उँइसों केमैदे बालो दुःखदे फ्रेबै चाडए भोज चबै सै मुँ। ¹⁶तलेबिस्याँ ड केमैदे बिमुँ, परमेश्वरए

सैर मैबू दो आतन् समा^a तारे डइ चु भोज दबै चदिब आरे।”

17 च लिसों येशूजी प्हेल छेइर परमेश्वर धन्यबाद पिंइर चेलामैदे बिइ, “चु प्हेल किंइर केमै न्होरि चुइर थुंन्।¹⁸ तलेबिस्याँ ड केमैदे बिमुं, परमेश्वरजी खन्तोदोंन् ग्याल्स आलन् समा^b डइ अंगुरए खु दबै थुदिब आरे।”

19 चदक्या येशूजी योर कहे किंइर परमेश्वर धन्यबाद पिंइर कहे लुंइर चेलामै चुमिंइर बिइ, “चु कहे डए ज्यु क। केमैए लागि र डए ज्यु खो पिंब क। छतइर ड मैबै लागि र छैलिन् कहे चब्ले लद्।”²⁰ छलेन कहे चल खांबै लिसों येशूजी प्हेल क्रिहे छेइ, चदक्या चमैदे पिंइर बिइ, “चु केमैए लागि र बगेबै डए को क। चु को परमेश्वरजी केमैदे फैबै छार बाछाए छाप क।

21 “छैबिलेया च्योद! ड कहाल पिंबै म्हि डदे बालोन् चदिइमुं।²² तलेबिस्याँ परमेश्वरजी बिबू दोलेन् म्हिए चह सिल पर्दिबुं। छैबिलेया धिक्कार मुं ड शतुरमैए योर पियाबै म्हि चइ थेबै दुःख योबुं।”²³ चु ताँ थेइर चेलामैइ “डचोए न्होरि छैलि के लब सु मुंगे?” बिइर थें-थेमैन् डचोएबर होंइ।

सु थेबले बिबै बारेर

24 च लिसों “डचोए न्होर ताँइ बन्दा थेबले सु तबू ड्हे?” बिइर चेलामैए न्होरि हानथाप तबर होंइ।²⁵ छतबू म्प्रोइर येशूजी चमैदे बिइ,

“चु ह्युलबै म्प्रुमैइ जनताए फिर हुकुम लम्। छले हुकुम लबमैइ थेमैदे छचांबै के लबै म्हि बिद् बिइर बिबर ल्हेदिम्।²⁶ छैबिलेया केमै न्होरि छ तल् आत। केमै न्होरि ताँइ बन्दा थेबै म्हि ताँइ बन्दा च्योनि तल् पर्दिम्। धाइर चिबै के लबै म्हिइ अरूमैए सेवा लल् पर्दिम्।²⁷ चबू चबर टिबै म्हि ते चबू पांमिबै म्हिए न्होरि सु थेबू जा? चबू चबर टिबै म्हि थेबू आडिं आ? छैबिलेया केमै न्होरि डम् सेवा लबै म्हि दो तइमुं।

28 “छतइर केमै डए दुःखर ल्होलू खांबै तद्।²⁹ डए आबाजी ड ग्याल्स क्रिहे पिंइ। डज्यै या केमैदे पिंमुं।³⁰ चदक्या केमै या डए ग्याल्सर डदे बालो चलू योबुं, थुंलू योबुं। धाइर राजगदिर कुंइर इसाएलबै च्युसे ड्ह्यौलो कुलए निसाफ लबुं।”

पत्रुसइ “थि डो आसे” बिम् बिइर येशूजी उँइसोंन् बिब

31 “ओ सिमोन, सिमोन, डेन्! म्हिमैइ नौलिर गहुं टाबू दोले दुष्टइ क्यो टालू योदिगे बिइर यो छचुं लइमुं।³² छैबिलेया क्योए बिश्वास आम्हदिगे बिइर डइ क्योए लागि र प्राथना लइ। छतइर क्यो दबै ड डॉइन ताखबुं, क्योए सै ड डॉइ ताबै लिसों आफैए आगें अलिमैए सै पांबू लमिन्।”

33 छबिमाले सिमोन पत्रुसइ थीदे बिइ, “ओ प्रभु, ड क्योदे बालुन् भेलर टिल् पर्दिलेया, सिल् पर्दिलेया तयार मुं।”

^a २२:१६ परमेश्वरए सैर मैबू दो आतन् समा ग्रीक क्युइर, परमेश्वरए ग्याल्सर परमेश्वरए ग्याल्स आखन् समा

^b २२:१८ ग्रीक क्युइर,

34 येशूजी पत्रुसदे बिइ, “पत्रुस, ड क्योदे बिम्, क्योइ सोंखे समा ड डो आसे आबिन् समा तियाँ नग भाले ओरदिब् आरे।”

सेलाँ ते मुइए ताँ

35 येशूजी चमैदे बिइ, “डइ केमै मुइ, भोला, जुत्ता ताइ आबोल्ले कुलामले केमैदे ताइ माल खाँचो तल् आ?”

चमैइ “अहँ, ताइ खाँचो आत,” बिइ।

36 येशूजी बिइ, “छैबिलेया तारे ‘मुइ मुँबैइ मुइ किन्, भोला मुँबैइ भोला नोद्’, चदक्या ‘सेलाँ आरेबैइ आफैए बखु चुँइर सेलाँ किदिगे।’^a 37 ड केमैदे बिम्, ‘थि अपराधिमै दोंबन तइ’ बिइर प्हिबै ताँ डए छहर पूरा तलै पर्दिम्। होलिन् डए बारेर प्हिबै ताँ पूरा तसिन् मुँ।” 38 छैबिलेया सेलाँ बारैबै ताँ तिफुँए आकहोइर चेलामैइ बिइ, “ओ प्रभु, च्योत्ति! चुर सेलाँ इह्यौलो मुँ।”

छबिमाले येशूजी “तइ! मुँदिगे,” बिइ।

जैतुन कोर येशूए प्राथना

39 च क्लह्योदक्याले त्होइर सोदा याब दोले येशू जैतुन कोउँइँ याइ। चेलामै या थिए लिलिन् याइ। 40 च क्लह्योर फेखइर येशूजी चेलामैदे बिइ, “केमै डोर आफेदिगे बिइर प्राथना लद्।”

41 च लिसों येशू दे क्याइबदे याइर च्हि तुँइर छले प्राथना लइ। 42 “ओ बा, क्योए इच्छा मुँस्याँ डदक्या चु दुःख स्योमिन्। छैबिलेया डए इच्छा आर्डि, क्योए इच्छा पूरा तदिगे।”

43 च लिसों स्वर्गदक्याले स्वर्गदूत क्रिहें येशू डारं युइर थी सैदिल् खाँबै भों पिंइ। 44 च त्हेर येशूए सैर बेल्ले दुःख मुँलो। छतइर यो छयुँ लब्दै थीजी प्राथना लदिमाले थिए छैब् थे-थेबै कोए थब्लो दों तब सर तेदिलो।

45 छले प्राथना लइर येशू आफैए चेलामै डारं ताखमाले चमै शोकइ लमाले प्लहाइर रोदिब् स्याइ। 46 येशूजी चमैदे बिइ, “केमै तले रोदिलो? रेद्, पापर आचहोदिगे बिइर प्राथना लद्।”

येशू कहाइर बोब

47 येशूजी छ बिदिमाले म्हिए हुल चर फेखइ। च्युसे इह्यौलो चेलामै न्होबै यहूदा च म्हिमैए नसों नसों खइर येशूलाइ म्वे लबर थिए डारं खइ। 48 येशूजी चदे बिइ, “ओ यहूदा, ‘क्योइ’ म्हिए च्हेदे म्वे लब् दों लइर थिए फिर धोका पिपिं डूँइमुँ आ?”^b

49 येशूदे मुँबै चेलामैइ तबि छेबै ताँमै कहोइर “ओ प्रभु, डिइ चमै सेलाँइ प्रियाले आ?” बिइर डचोएइ। 50 चदक्या चेलामै न्होबै क्रिहेंइ सेलाँ (तरबार) ट्हुइर खो पिबै खेगि क्रथेए के लबै म्हि क्रिहेंए क्योलोउँइँबै न्हपे च्वाट्टन् थोवाइ।

51 छैबिलेया येशूजी “तइ मुँदिगे! छ आलद्।” बिइर थीजी च के लबै म्हिए न्हपे छुइर फैल् लमिंइ।

52 खो पिबै खेगि चिबमै, मन्दिरबै थेबै फौजमै ते यहूदीमैए चिबनाँबमै येशू कहाबर खलो। छले खब् प्रोंइर येशूजी चमैदे बिइ, “ड यो आ? छले केमै सेलाँ ते प्हेर छेइर ड कहाबर खब? 53 ड त्हिँइ क्हांसे केमैदे

^a २२:३६ मतलब, दुःख तबै त्हे खब्मुँ। चु ताँ सैर मैदिल् पर्दिम्।

^b २२:४८ म्वे लब माया उँइँब् ग। यहूदाइ

माया लब् दों लइर येशूलाइ धोका पिंइ।

बालोन् मन्दिरर मुँमाले केमैइ ड आकहालो। छैंबिलेया तारे केमैए त्हे तइमुँ। छतइर केमै ता के लबर खलो, च के लद्, तलेबिस्याँ मिछु खैबर्बे शक्तिए^a के लबै त्हे चुन् क।”
54 च त्हेर्न म्हिमैइ येशू कहाइर खो पिबै खेगि क्रथेए तिंर बोइ, पत्रुस बिस्याँ दे हेंगोदक्या थिए लिसों लिसों याइ।

पत्रुसइ “येशू डो आसे” बिब

55 खो पिबै खेगि क्रथेए तिंरै ह्युर म्हिमै मि त्हेदिलो। छतइर पत्रुसै या चमैदे बालोन् कुँइ।
56 केब्स्यो क्रिहेंड पत्रुस मि त्हेदिब म्रोइर च डाँइ च्योइर “चु म्हि या येशूदे बालोन् मुँलो,” बिइ।

57 छैंबिलेया पत्रुसइ च चमिरिदे “ओ नानि, डइ थि डो आसे,” बिइ।

58 तिस्याँदे लिसों अर्को म्हि क्रिहेंड च म्रोइर बिइ, “क्यों या चमै न्होर्बे आडिं आ?”

छैंबिलेया पत्रुसइ चदे या “अहँ, ड चए थु आडिं,” बिइ।

59 घण्टा घिदे लिसों अर्को म्हि क्रिहेंड बिइ, “चु म्हि या येशूदे बालो मुँलो। तलेबिस्याँ चु या गालीलथेन् मुँमै।”

60 छैंबिलेया पत्रुसइ बिइ, “अबुइ, ता ताँ ललो? क्योँइ बिबै ताँ डइ ताइ आकहो!” पत्रुसइ छ बिदिबै तोर्न नग भाले ओरइ।
61 छतइर प्रभु येशूजी लिग्याँ तोइर पत्रुस च्योमाले “क्योंइ सोखे समा ड डो आसे आबिन् समा नग भाले ओरदिब आरे,” बिइर येशूजी बिबै ताँ पत्रुसइ मैइ।
62 चदक्या पत्रुस बैरु त्हाँयाइर बेल्ले क्रोइ।

येशू तोब

63 येशू रुँबै म्हिमैइ थि प्हुइर तोइ।
64 चमैइ थिए मि हुइर प्रिंइर “लु अगमबाणि बिद्, बित्ति क्योँ प्रिब सु जा? बिइर डचोएइ।”
65 चमैइ थिए बिरोधर अरू लेदै इजेत वाबै ताँमै या बिइ।

येशू थेबै म्हि च्हाँए उँइसों राब

66 नाँ न्होर्बै बितिकन् यहूदी ह्युलर्बै चिब्मै, खो पिबै खेगि चिब्मै ते शास्त्रिमै ताँइ खागु तइर येशू थेबै म्हि च्हाँए उँइसों बोमाले चमैइ बिइ,
67 “क्यों परमेश्वरजी कुल्मिबै मुँ ख्रीष्ट क बिस्याँ डिदे बिद्।”

येशूजी चमैदे बिइ, “डइ बिलेया केमैइ आपते।
68 डइ ता डचोएलै या केमैइ ज्वाफ आपिं।
69 छैंबिलेया तारे म्हिए च्हाँ परमेश्वरए थेबै पो ते शक्ति मुँबै क्योलो हार टिब्मुँ।”

70 चमै ताँनइ बिइ, “छ बिस्याँ क्यों परमेश्वरए च्हाँ आ?”

येशूजी बिइ, “ड चन् क बिइर क्हेमैजिन् बिइमुँ।”

71 येशूए ताँ थेइर चमैइ थें-थेंमैन् बिइ, “डचोइ चए सुँदाक्या डेंइ, छतइर डचोदे अरू ग्वाइ तले चैदिइ?”

येशू रोमी क्रथे पिलातसए उँइसों राब

23 च लिसों थेबै च्हाँ तिंर मुँबै म्हिमैइ येशू क्रथे पिलातस डार बोइर

^a २२:५३ मिछु खैबर्बे शक्तिए मतलब, दुष्ट बिबै मोमैए मुँए शक्ति।

2“चुइ ‘रोमी मुँ बालि फोल् आपर्दि,’ बिम्, दबै ‘ड ख्रीष्ट मुँ क,’ बिइर चुइ डचोए म्हिमें भाँडियाइ,” बिइर चमैइ येशूए फिर छचाब् ल्हैदिबर होंइ।

3चमैए ताँ थेइर पिलातसइ येशूदे “क्यों यहूदीमेंए मुँ आ?” बिइर डचोएइ।

येशूजी चदे बिइ, “क्योंइन छ बिदिइमुँ।”

4“डइ चु म्हिदे ताइ दोष आयोंलो बिइर खो पिबै खेगि चिब्मै ते चर मुँबै हुलदे पिलातसइ,” बिइ।

5छैबिलेया चमैइ बेल्ले सारले ओरदै बिइ, “चुजी ताँइ यहूदीया ते गालील ह्युलदक्याले किंइर तोगो चु यरूशलेम सहर समन् थिए ताँ लोमिंइर भाँडिदिइमुँ।”

हेरोद मुँए उँइसों येशू राब

6छ बिब् थेइर पिलातसइ “चु म्हि गालीलथें आ? बिइर डचोएइ।” 7छले डचोएमाले येशू हेरोद मुँए ह्युलबै म्हि मुँमें बिब् सेइर चइ येशू हेरोद डार कुलइ, तलेबिस्याँ च त्हेर हेरोद मुँ यरूशलेम सहरनं मुँलो।

8येशू प्रॉल् योंमाले हेरोद बेल्ले सैं तोइ। तलेबिस्याँ येशूजी लबै थेबै केमैं ते छचाँबै तामैंए बारेर हेरोदइ उँइसों थेलो। छतइर उँइसोंदक्या हेरोदए सैंर येशू प्रॉल् योंस्याँ तमलो झूँदिलो। धाइर येशूजी लबै औदिबै चिनु च्योबै सैं मुँलो। 9हेरोद मुँइ येशूदे लेदै तामैं डचोएइ। छैबिलेया येशूजी ताइ ज्वाफ आपिं। 10चर रादिबै खो पिबै खेगि चिब्मैं ते शास्त्रिमैं बिस्याँ येशूए बिरोधर सार-सारले ओरइर थिए फिर छचाब् ल्हैदिबर होंइ। 11च लिसों हेरोद ते चए सिपाइमैइ येशूए इजेत वाइर बेल्ले प्हइ। च लिसों मुँइ खेब दोँ

तबै क्वें येशू खेमिंइर पिलातस डार तामिंइ। 12च त्हिंइदक्या हेरोद ते पिलातस क्हिइइ। चु बन्दा उँइसों चमैं ड्ह्यौलो आक्हिमलो।

येशू सिबै सजैं पिब

13च लिसों पिलातसइ खो पिबै खेगि चिब्मैं ते इस्राएल ह्युलबै चिबनाँबमैं खागु लइर 14बिइ, “चु म्हिजी म्हिमें भाँडिवाइ बिइर केमैइ चु ड डार बोखइ। तोगो केमैए उँइसों डचुँलु च्युलु लमाले केमैइ चुए फिर ल्हैदिबै छचाब् डइ ताइ आयोंलो। 15हेरोद मुँज्यै या चुए फिर ताइ छचाब् आयोंइर चु डचो डार तामिंइ। चुइ सिबै सजैं योबै के ताइ आलइमुँ। 16छतइर डइ चु कोर्राइ पुइर पिमिम्।” 17चमैए छचार साले क्हांसे दुःखदे फ्रेबै चाडर पिलातसइ भेलदक्या म्हि क्रिहें पिल् पर्दिमलो।

18छैबिलेया म्हिए हुलइ थेबै कैले “चु आडिं! डिए लागिर बारब्बा पिमिन् बिइर ओरइ।” 19च बारब्बा सहरर आछचाँबै के लइर म्हि सैबै केसर भेलर च्युथेलो।

20हुलइ छ बिलेया पिलातसइ येशू पिपि झूँइर “चु पियाले बिइर” दबै चमैदे ताँ लइ। 21छैबिलेया “च कूसर च्योयाद्! कूसर च्योयाद्!” बिब्दै चमैं ओरइ।

22छैबिलेया पिलातसइ सोखेबै लारै या बिइ, “तले? चु म्हिजी आछचाँबै के ता लइमुँ? चु सैबै सजैं पिबै कारण डइ ताइ आयोंइमुँ। छतइर चु कोर्राइ मत्त्रे पुइर पिमिम्।”

23छैबिलेया चमैं भन् बेल्ले थेबै कैले “च कूसर च्योल पर्दिम् बिब्दै ओरइ।” लिसों पिलातसइ चर मुँबै म्हिमैइ बिब् दोन् लल पर्दिइ। 24छतइर पिलातसइ चमैइ बिब्

दोले येशू क्रूसर च्योडर सैबै सजै पिंइ।
 25 छले चमैइ बिब् दोलेन् म्हि सैडर भेलर
 च्युथैबै बारब्बा पिमिंडर चमैइ बिब् दोलेन्
 पिलातसइ येशू चमैए योर्न पिंयाइ।

येशू क्रूसर च्योयाब

26 छले रोमी सिपाइमैइ येशू क्रूसर च्योबर
 बोदिमाले सिमोन बिबै कुरेनीथे नांसदक्या
 सहरउंडे युदिमाले चमैइ च कहाइर येशूए
 क्रूस नोइर थिए लिसों लिसों प्रबर ल्हैदिइ।
 27 म्हिए हुल येशूए लिसों प्रदिलो। चमै न्होरि
 चमिरिमै या मुंलो। चमै सै आतोइर क्रोदिलो।
 28 येशूजी लिंग्यां तोइर चमैदे बिइ, “ओ
 यरूशलेम सहरबै चमिमै, केमै डए लागिर
 आक्रोद्, केमै आफै ते आफैए च्ह-चमिए
 लागिर क्रोद्। 29 तारे लिसों बेल्ले दुःख तबै
 त्हे खम्। च त्हेर ‘प्हसं आतबै थरिमै ते
 इहे तुइंल् आपर्दिबै चमिरिमै इहो सब्मै क
 बिसि म्हिमैइ,’ बिब्मुं। 30 च त्हेर म्हिमैइ
 ‘कोमैदे डिए फिर उंयान् बिब्मुं, धाइर नुबै
 डिस्कामैदे डि हुइर म्यारवाद्’ बिबर होंब्मुं।
 31 तलेबिस्यां चमैइ सिदुं पिडक्यो ब्योब
 छचांब मुंबर छ लम् बिस्यां कारयामाले खै
 ललै?”^a

32 सिपाइमैइ आछचांबे के लबै म्हि इह्यौलो
 या येशूदे बालोन् सैबर बोलो। 33 चमै क्र
 खोप्ले बिबै क्ल्ह्योर फेनेइर चमैइ येशू
 क्रूसर च्योयाइर च आछचांबे के लबै म्हि
 इह्यौलो या क्रिहें थिए क्योलोउंडे, क्रिहें थिए
 त्हेब्रेउंडे क्रूसर च्योयाइ। 34 च त्हेर येशूजी
 बिइ, “ओ बा, चुमै क्षमा लमिन्, तलेबिस्यां
 ता लदिइमुं बिब चुमैइ था आसे।” छैबिलेया

सिपाइमैइ येशूए क्वें चिट्टा चोइर थंमैए न्होरि
 चुइ।

35 म्हिमै राइर च्योदिलो। यहूदी चिबनांब्मैइ
 येशूदे प्हइर बिइ, “चुइ अरूमै जोगेमिंइ। चु
 परमेश्वरजी कुल्मिबै मुं ख्रीष्ट क बिस्यां चुइ
 आफै या जोगेदिगे।”

36 सिपाइमै या खइर आलिंबै पा क्युं पिंइर
 येशू प्हइ। 37 “क्यों यहूदीमैए मुं क बिस्यां
 आफै जोगेद्।”

38 “चु यहूदीमैए मुं क” बिइर छचाब्
 ल्हैदिबै तां प्हिइर थिए क्हावांडे क्रूसर
 टाउंडेदिथेंलो।

39 च क्रूसर च्योयाबे आछचांबे के लबै म्हि
 क्रिहेंइ येशूदे प्हइर बिइ, “क्यों परमेश्वरजी
 कुल्मिबै मुं ख्रीष्ट आडिं आ? डिबन् बिस्यां
 क्योलाज्यै जोगेद्, डिलाज्यै या जोगेमिन्।”

40 छैबिलेया अर्को आछचांबे के लबै
 म्हिइ चदे हौदिइर बिइ, “क्यों परमेश्वर
 प्रोइर फाआङ्गिं आ? थीजी योबु दों तबै
 सजै क्योज्यैया योदिइमुं। 41 छैबिलेया
 डचो इह्यौलोम् आछचांबे के लइर योल्
 पर्दिबै सजै योदिइमुं, छैबिलेया चु म्हिजीम्
 आछचांबे के ताइ आलइमुं।” 42 छबिइर
 चइ येशूदे बिइ, “ओ येशू, क्यों मुं तइर
 युमाले डलाज्यै मैमिन् ओ।”

43 येशूजी चदे बिइ, “होलिन् ड क्योदे बिमुं,
 क्यों तिं डदे स्वर्गर तब्मुं।”

येशूजी सो पिब

44 त्हाँइ आद तमाले ह्युल भरिन् घण्टा
 सोदे समा मिछु खैयाइ। 45 त्हाँइ या चारब
 म्हयाइ। च त्हेर्न यरूशलेम सहरबै मन्दिरर

^a २३:३१ मतलब, दोष आरेबै म्हिए फिर जगो थेबै दुःख पिंइ बिस्यां दोष मुंब्मै भन् खै तलै?

च्योथेंबै पर्दा क्वें या ङ्ङिबाँ फैले माजोर टोयाइ।

⁴⁶ चदक्या येशूजी थेबै कैले बिइ, “ओ बा, डए प्लह डइ क्योए योर थेंमुं।” जगो बिइर येशूजी थिए सो पिइ।

⁴⁷ छतब प्रोइर “होलिन् चु म्हि धर्मि मुंमै!” बिबदै रोमी कप्तानइ परमेश्वरए मिं क्वेइ। ⁴⁸ चर च्योबर खबै म्हिमैइ छ तब प्रोइर बेल्ले सैं नइर आ-आफैए तिर प्रिइर तिर तायाइ। ⁴⁹ छलेन थी डो सेबमैं ते गालील ह्युलदक्याले थिए लिसों खबै चमिरिमैं हेंगोन् राइर चर तदिबै घटना च्योदिलो।

येशू पाब

⁵⁰ योसेफ मिं मुंबै म्हि क्रिहें स्वाब ते धर्मि म्हि मुंलो। च थेबै म्हि च्होंबैं चिब मुंलो। ⁵¹ येशू सैले बिइर मत लबै म्हिमैदे योसेफ आक्हिलो। च यहूदीया ह्युलबैं अरिमथियाथें मुंलो। परमेश्वरजी खन्तोदोन् ग्याल्स खोंयों लब् इहे बिइर चइ क्यो च्योदिलो। ⁵² च पिलातस डारं याइर येशूए सिनु छिइ। ⁵³ चदक्या क्रूसदक्याले सिनु तमिइर। च सिनु सुतिए क्वेंइ म्होरइ धाइर पारा कोप्दिइर बनेबै उर थेंइ। उँडंसों च उर सुए आथेंलो। ⁵⁴ प्रिबै त्हिंइ खब्लि छेलो। छतइर च त्हिंइ न्हागबै प्रिबै त्हिंइए लागिर ताँइ माल तौदु लथेंल् पर्दिबै त्हिंइ मुंलो। ⁵⁵ गालील ह्युलदक्याले येशूदे खबै चमिरिमैं योसेफए लिसों याइर सिनु थेंबै क्ल्हयो च्योइ। ⁵⁶ च लिसों चमैं थेंमैं टिबै क्ल्हयोर तायाइर येशूए सिनु फोब् बिइर अत्तर ते मलममैं बनेइ।

चदक्या छ्वेर बिब् दोले प्रिबै त्हिंइर चमैइ पो न्हइ।

प्रभु येशू सिइर दबै सोगों तइर खब

24 चदक्या आइतबार नानरि चमिरिमैं थेंमैइ बनेबै लिंबै थाँ खबै छच्युगु बोइर येशू थेंबै उर याइ। ² चर फेनेमाले उए सुँर हुथेंबै युंम स्योथेंब चमैइ प्रोइ। ³ चमैं उ न्होर होंमाले प्रभु येशूए सिनु आम्रों। ⁴ छतइर चमैं अलमल्ल तदिलो। च त्हेर्न फोसे ब्योबै चारबै क्वें खेबै मुंयुंमैं इह्यौलो थेंमैए रेर रादिब् चमैइ प्रोइ। ⁵ छैलि प्रोइर चमैं फाङ्ङिइर पत्खु तयाइ। छैबिलेया च मुंयुंमैइ चमैदे बिइ, “केमैइ सोगों म्हि छगोर तले म्हैलो? ⁶ येशू चुर आरे, थि सोगों तइर याल् खाँइ। गालीलर मुंमाले थीजी केमैदे ता बिलो च ताँ मैन्दि। ⁷ “परमेश्वरजी कुल्मिंबै म्हिए च्हा पापि म्हिमैए योर फेब्मुं, क्रूसर च्योयाब्मुं। छैबिलेया सोरोर दबै सोगों तइर खल् पर्दिम्, बिब आङिं आ?” ⁸ चमैए ताँ डेंइर चमिरिमैइ येशूजी बिबै ताँ चिइ।

⁹ च चमिरिमैं छगोंदक्याले तायाइर चु ताँ च्युसे क्रिहें चेलामैं ते अरू चेलामैंदे या बिमिंइ। ¹⁰ च चमिरिमैं मग्दलाथेंस्यो मरियम, योअन्ना ते याकूबए आमा मरियम बिब् मुंलो। चमैदे मुंबै अरू चमिरिमैज्यै कुल्मिंबै चेला चिबमैदे चु ताँ बिइ। ¹¹ छैबिलेया चेलामैइ “चु स्योर ताँ ग” ङ्ङाँइर च चमिरिमैइ बिबै ताँ आपते। ¹² छैबिलेया पत्रुस रेइर छगोर न्हेयाइ, धाइर क्वारले न्होर च्योमाले ट्हि क्वें मत्त्रे प्रोइ। छैलि प्रोमाले च अचम्मा तइर तिर तायाइ।

^a २३:५४ यहूदीमैए छचार त्हेइ लिबै त्हे त्हिंइ फेर्दिबै त्हे मुंलो। छतइर प्रिबै त्हिंइर सिनु थेंल् आतमलो। छतइर येशू सिनु त्हेइ आलिबन् आतुरले पाल् पर्दिमलो।

इम्माउस नाँसर याबे क्याँर येशू

13 च त्हिंडर चेलांमै इह्यौलो इम्माउस बिबै नाँसउंड यादिलो। च नाँस यरूशलेमदक्याले च्युसे क्रिहें किलोमेटर हेंगो मुँलो। 14 छले यादिमाले भरखर तदिबै ताँए बारेर चमै ताँ लदिलो। 15 चमै ताँ लब्दै यादिमाले येशू खइर चमैदे बालो प्रबर होइ। 16 चमैइ येशू मोलेया डो सेल् आखाँलो। 17 “केमै प्रदे ता ताँए बारेर छलफल लदिलो?” बिइर येशूजी चमैदे डचोएमाले चमै प्रदिबै तोर्न सैं आतोब् दोले रायइ। 18 चमै न्होरि क्लेओपास बिबै म्हिइ येशूदे बिइ, “यरूशलेम स्युरै खज्यैया तिं न्हाग चर ता तदिइमुँ बिब क्योइ आसे आ?” 19 “ता ताँ जा?” बिइर येशूजी चमैदे डचोएमाले

चमैइ बिइ, “नासरतथें येशूए बारैबैं ताँ थि अगमबक्ता मुँलो, थीजी परमेश्वर ते म्हिमैए उँइसो शक्ति मुँबे के लइर छचाँबैं ताँमैं लोमिमलो। 20 छैबिलेया डचोए खेगि चिबमैं ते चिबनाँबमैइ सैबै सजैं पिदिगे बिइर रोमी मुँए योर पिंइर चमैइ येशू कूसर च्योइर सैयाइ। 21 ‘डचोए इस्राएलीमैं जोगेमिबैं म्हि येशून क,’ बिइर डिइ आशा ललो। छैबिलेया येशू सिइर तिं सोरो तल् खाँइ। 22 छैबिलेया डिए टोलिबैं को-कोइ चमिरिमैइ बिबै ताँ उँइर डि अचम्मा तइमुँ। चमै तिं नानरि छगोर यामाले 23 येशूए सिनु आम्रोमैं। चमै डाँर स्वर्गदूत युइर येशू सोगोन् मुँ बिइ रो। चमै खइर डिदे बिइ। 24 चमैए ताँ उँइर डिए को-कोइ थुमैं छगोर च्योबर यामाले चमिरिमैइ खै बिलो छैलिन् प्रोइ। छैबिलेया येशू बिस्याँ आम्रो।”

25 च लिसों येशूजी चमैदे बिइ, “ओ, ताँ आकहोबै आमादुमै! केमैए सैं खैले छले आकहोब तयालो? अगमबक्तामैइ बिबै ताँमैं

तिफुँए आपते आ! 26 परमेश्वरजी कुल्मिबैं जोगेमिबैं मुँ ख्रीष्टजी छैलि दुःख योल् पर्दिम्। चदक्या आफैए मान योबैं कल्हयोर याल् आपादि आ?” 27 च लिसों मोशा ते अगमबक्तामैइ थिए बारेर प्हिथेबैं ताँजगोए अर्थ थीजी चमैदे क्होमिइ।

28 चमै इम्माउस नाँसए चेंदो फेखमाले येशू अफै कयाइन याल् म्हेब् दों लइ। 29 छतइर “म्हुँइंस तबर होइ। तिं डिदे बालोन् टिमिन्!” बिइर चमैइ थीदे कर ल्हेदिइ। छबिमाले येशू चमैदे बालोन् टिबर तिं न्होर होइ। 30 चमैदे बालो चब् चबर कुँमाले थीजी क्हें किंइर परमेश्वर धन्यबाद पिंइर क्हें लुँइर चमैदे पिंइ। 31 छलमाले बल्ल चमैए मि थोइर “थीन् मुँमै!” बिइर सेइ। छैबिलेया येशू चमैदक्याले म्हायाइ।

32 छतइर चमैइ थेमैए न्होर बिइ, “थीजी डचोदे क्याँर ताँमैं लइर परमेश्वरए छ्वेबैं ताँए अर्थ क्होमिमाले डचोए सैं बेल्ले तोइर छिं झूँल, आडिं आ?”

33 च त्हेर्न चमै रेइर यरूशलेमउँइ तयाइर च्युसे क्रिहें कुल्मिबैं चेला चिबमैं ते चमैदे मुँबे अरू म्हिमेदे त्होइ। 34 चदक्या “प्रभु येशू होलिन् सोगो तखइर सिमोन डाँर प्रोखमै!” बिइर चमैदे बिइ।

35 चदक्या च चेलांमैइ क्याँर तबै ताँ ते येशूजी क्हें लुँइर पिंमाले थी डो सेबै ताँ अरू चेलांमैदे बिमिइ।

येशू चेलांमैदे त्होब

36 चमैइ चु ताँमैं लदिमाले येशू चमैए माजोर राखइर “केमैदे शान्ति तदिगे,” बिइ।

37 छबिमाले चमैइ “मोँ प्रोइ” झूँइर प्लह लोइर फाङ्गियाइ।

38 छैबिलेया थीजी चमैदे बिइ, “केमै तले आदिदिइर संका ललो? 39 डए यो पहले च्योद्! ड येशून् क, ड छुइद्। तलेबिस्याँ मोमैल से आत, हुबि या आत, डलम् हुबि मुँ स्या या मुँ बिइर केमैइ प्रोइमुँ।” 40 छ बिइर थीजी आफैए यो पहले चमैदे उँउँइ।

41 छैलि पतेलै आखाँबै ताँ प्रोमाले चमै सैं तोइर अचम्मा तइ। छतइर “केमैदे चबै मालमै ताइ मुँ आ?” बिइर थीजी चमैदे डचोएइ। 42 छबिमाले चमैइ तेबै ताँग क्रिहें थी पिंइ। 43 छले पिमाले थीजी च ताँग चमैए उँइसों चइ।

44 चदक्या थीजी चमैदे बिइ, “मोशाइ प्हिबै ठिम, अगमबकतामैइ प्हिबै तामैं ते भजनसंग्रहर डए बारेर प्हिथेबै तामैं पुरा तल् पर्दिम् बिइर डइ नसोन् केमैदे मुमाले बिलो।” 45 छ बिइर परमेश्वरए छवेबै ताँ कहोदिगे बिइर थीजी चमैए सैं प्लमिंइ। 46 येशूजी चमैदे बिइ, “‘परमेश्वरजी कुल्मिंबै मुँ ख्रीष्टजी दुःख नोल् पर्दिम्, सिइर सोरोर दबै सोगों तइर खल् पर्दिम्,’ बिइर परमेश्वरए छवेर प्हिइमुँ। 47 आफैइ

लबै आछचाँबै केमै पिइर परमेश्वरउँइ सैं तास्याँ म्हिमैइ पाप क्षमा योम् बिबै ताँ नसों यरूशलेमर बिप्रब्दक्या ताँइ हें-हेंबै म्हिमैदे बिमिल् पर्दिम्। 48 तलेबिस्याँ केमैन् चु ताँए ग्वाइ पिंभै क। 49 परमेश्वर आबाजी बाछा फैइर पिंम् बिबै बरदान डइ केमैए फिर कुल्मिंभुँ। छैबिलेया परमेश्वरजी पिंभै शक्ति केमैए फिर आयुन् समा केमै चु सहरर टिदिद्।”

परमेश्वरजी येशू स्वर्गर बोयाब

50 छ बिबै लिसों येशूजी चमै बेथानिया बिबै नाँस समा बोयाइ, धाइर आफै यो क्वेइर चमैए फिर आशिक पिंइ। 51 छले आशिक पिंदिब्दै लमा थि चमैदक्याले स्वर्गर बोवाइ। 52 छैलि प्रोइर चमै परमेश्वरए मिं क्वेदै येशू होलिन् परमेश्वर मुँमैं बिइर सैं तो-तोइ यरूशलेमउँइ ताखइ। 53 चदक्या खोयोन् बिलै परमेश्वरए मिं क्वेब्दै चमै यरूशलेमबै मन्दिरर टिदिमलो।